

# येशूक बारेम मत्तीक लिखल खुशीक खबर





येशूक बारेम  
मत्तीक लिखल  
खुशीक खबर

( दड्नगौरा थारु )

२०७०

# **The Happy News**

## **written by Matthew**

### **about Jesus**

**Trial Edition**

**2013**

**( 500 copies )**

Illustrations by the following publishers have been used with permission  
(pages listed in parentheses) by Horace Knowles (pp. 20, 62, 68). © The  
British & Foreign Bible Society, 1954, 1967, 1972. Additions and  
amendments by Louise Bass © The British & Foreign Bible Society, 1994;  
Graham Wade (pp. 7, 21, 23, 33, 38, 42, 53, 58, 71, 81, 82) and Darwin  
Dunham (pp. 8, 18, 23, 39, 50, 55, 74, 75, 76, 83). © United Bible  
Societies, 1989, Nairobi, Kenya. © David C. Cook Publishing Co., 1978  
(Cover, pp. 4, 5, 6, 9, 10, 20, 45, 55, 72, 74, 79, 80)

**Dangaura Tharu Language and Literature Project**  
**and**  
**Dangaura Tharu Translation Committee**

# मत्तीक लिखल

खुशीक खबर

## किताबक परिचय

यी किताब लिखुइया व्यक्ति मत्ती रलह। ऊ येशूक बाह्र जन चेलामध्ये एकठो रलह (मत्ती १०:३; मर्कूस ३:१८)। येशूक चेला हुइनासे आघ ऊ कर उठैना काम करँट (मत्ती ९:९)। हुँकाहार और नाउं लेवी रलहन (मर्कूस २:१४)।

मत्ती येशूक जीवनक, उहाँक करल सेवकाइक, ओ येशू मुल ओ मुवलमसे फेदोस्म जीयागैल कना बारेम लिखल। और तीन जन लेखकहुँक, मर्कूस, लूका ओ यूहन्ना, फे येशूक जिवनक बारेम लिखल। मत्ती खासकैक यहूदीन्हक लाग खुशीक खबर लिखल।

यी किताबम अघट्टे परमेश्वरक बाचा कैगिल् मुक्तिदाता येशू जो हुइट कैक लिखल बा। पुरान नियमम परमेश्वर यहूदीन्हक बीचम एकठो मुक्तिदाता पठैना बाचा कैरखलह। परमेश्वर येशूह यी संसारम पठाक आपन करल बाचा पूरा कर्ल।

मत्ती येशूक जन्मसे शुरु कैक उहाँक बप्तिस्मा, परीक्षा ओ गालीलम उहाँक करल काम ओ प्रचारक बारेम लिखल। उहाँ यरुशलेम गैलक, उहाँक जीवनक अन्तिम हृष्टम घटल घट्नक, क्रूसम मुलक ओ तीसर दिनम फेदोस्म जीलक बात ओ उहाँ आपन चेलन सारा मनैन्हकठे जाक यी खुशीक खबर प्रचार कर्ना बात फे यी किताबम उल्लेख हुइल् बा। यी किताबम पर्वत्वम येशूक देहल उपदेश (मत्ती ५-७ अध्याय) – स्वर्गक राज्यक नागरिकहुँकन चहना गुण, स्वर्गक राज्यक बारेम उहाँक कहल आहान जसिन मुख्य शिक्षा लिखल बा।

मत्ती १:१-१४

२

## येशु ख्रीष्टक वंशावली

त्रूका ३:२३-३८

अब्राहामक सन्तान, दाऊदक  
 १ सन्तान, येशु ख्रीष्टक  
 वंशावली:

२ अब्राहामक छावा इसहाक रलह।  
 इसहाकक छावा याकूब रलह।  
 याकूबक छावाहुँक यहूदा ओ  
 हुँकाहार दाङु-भैयन रलह।  
 ३ यहूदक छावन फारेस ओ जाहेर  
 रलह, हुँकन्हक डाई तामार  
 रलही।

फारेसक छावा हेस्मोन रलह।  
 हेस्मोनक छावा आराम रलह।  
 ४ आरामक छावा अम्मिनादव,  
 अम्मिनादवक छावा नहशोन,  
 नहशोनक छावा सल्मोन रलह।  
 ५ सल्मोनक छावा बोअज, हुँकाहार  
 डाई राहाब रलही।  
 बोअजक छावा ओवेद, हुँकाहार  
 डाई रूथ रलही।  
 ओवेदक छावा यिशै,

६ यिशैक छावा राजा दाऊद रलह।  
 दाऊदक छावा सोलोमन रलह,  
 हुँकाहार डाई उरियाहक गोसिन्या  
 रलही।  
 ७ सोलोमनक छावा रहबाम,

रहबामक छावा अविया,  
 अवियक छावा आसा,  
 ८ आसक छावा यहोशापात,  
 यहोशापातक छावा यहोराम,  
 यहोरामक छावा उज्जियाह,  
 ९ उज्जियाहक छावा योताम,  
 योतामक छावा आहाज,  
 आहाजक छावा हिजकिया,  
 १० हिजकियक छावा मनश्शे,  
 मनश्शेक छावा आमोन,  
 ओ आमोनक छावा योशियाह  
 रलह।

११ योशियाहक छावन यकोनियास  
 ओ हुँकाहार भैयन रलह। हुँकन्हक  
 जन्म इस्ताएलीहुँक बेबिलोनम  
 कैदी बनाक लैजागैल समयसे आघ  
 हुइलहन।

१२ बेबिलोनम लैजागैल त,  
 यकोनियासक छावा शालतिएल  
 जन्मल,  
 शालतिएलक छावा यरुबाबेल,  
 १३ यरुबाबेलक छावा अविउद,  
 अविउदक छावा एल्याकीम,  
 एल्याकीमक छावा आजोर,  
 १४ आजोरक छावा सादोक,  
 सादोकक छावा आखिम,  
 आखिमक छावा एलिउद,

१५ एलिउदक छावा एलाजार,  
एलाजारक छावा मत्तान,  
मत्तानक छावा याकूब,  
१६ ओ याकूबक छावा योसेफ  
रलह। योसेफक गोसिन्या मरियम  
रलही। यिह मरियमसे ख्रीष्ट  
कैजिना येशूक जन्म हुइलहन।

१७ असिक अब्राहामसे दाऊदसम  
चौथ पुस्ता हुइठा, ओ दाऊदक समयसे  
इस्त्राएलीहुँक्र बेबिलोनम कैदी बनाक  
लैजागैल् समयसम चौथ पुस्ता हुइठा।  
ओ बेबिलोनम लैजागैल् समयसे  
ख्रीष्टक समयसम चौथ पुस्ता हुइठा।

### येशू ख्रीष्टक जन्म

लूका २:१-७

१८ येशू ख्रीष्टक जन्म असिक  
हुइलनः येशूक हुइनावाला डाई  
मरियमक योसेफसे भवाज हुइना  
कैक ठोकौनी खारखलहिन, तर  
हुँकन्हक भवाज बिना हुइल मरियम  
गर्भवती हुइलक थाहौं हुइल। ऊ पवित्र  
आत्मक शक्तिद्वारा गर्भवती होरलही।  
१९ हुँकाहार हुइनावाला गोस्या योसेफ  
धर्मी मनैया हुइलकओर्से ऊ मरियमक  
बदनाम कर नैचहल, बेनसे गुपचुपम  
छोरदेना विचार कर्ल।

२० तर जब ऊ यी बात विचार  
कर्टीरलह, सपनम परमप्रभुक एकठो  
स्वर्गदूत हुँकहीन कल, “दाऊदक  
सन्तान योसेफ, मरियमह आपन  
गोसिन्यक रूपम स्वीकार कर जिन  
डराओ, काकरकि जे हुँकाहार गर्भम  
बाट, उहाँ पवित्र आत्मसे हुइल् हुइट।  
२१ ऊ एकठो छावा जन्मैहीं, उ लर्कक  
नाउं येशू ढरहो, काकरकि उहाँ आपन  
मनैन हुँकन्हक पापमसे मुक्ति देहर्हीं।”

२२ परमप्रभु अगमवक्ताद्वारा  
ब्वालल् बचन पूरा हुइक लाग यी  
सब हुइलक होः २३ “हेरो, एकठो  
कन्या गर्भवती हुइनेबाटी ओ एकठो  
छावा जन्मैनेबाटी। उहाँह इम्मानुएल  
कैजिने बा।” याकर अर्थ हो, “परमेश्वर  
हमारसँग बाट।”

२४ योसेफ निदमसे जग्ल त  
परमप्रभुक स्वर्गदूत सपनम कहल  
अनुसार ऊ मरियमह आपन गोसिन्यक  
रूपम स्वीकार कर्ल। २५ तर मरियम  
छावा जन्मैनासे आघ योसेफ हुँकहिनसे  
सहवास नैकर्ला। मरियम छावा जन्मैती  
त योसेफ उ लर्कक नाउं येशू ढर्ल।

### पूरुबसे आइल ज्योतिषीहुँक्र

२ हेरोद राजक समयम यहूदिया  
क्षेत्रक बेथलेहेम शहरम जब  
येशूक जन्म हुइलन्। तब पूरुबसे

मत्ती २:२-१२


४

ज्योतिषीहुँक यरुशलेम शहरम अइल  
 २ ओ हुँक मनैन पुछ्ल, “यहूदीन्हक  
 राजा होक जन्मल लर्का कहाँ बाट?  
 उहाँ जन्मलक थाहाँ देना तोरैयाँ हम्र  
 पूरुबओर देख्ली, उहओर्से उहाँह दर्शन  
 कर आरली।”

३ जब हेरोद राजा यी बात सुन्ल  
 तब अशान्तिले छटपटाइ लग्ल, ओ  
 हुँकहार सँगसँग सारा यरुशलेमक  
 मनै फे अशान्तिले छटपटाइ लग्ल।  
 ४ तबदोस्र हेरोद सब मुख्य पूजाहारीन  
 ओ धर्मगुरुन बलाक “ख्रीष्टक जन्म  
 कहाँ हुइना बाटन?” कैक सोधपुछ्ल  
 कर्ल। ५ हुँक कल, “यहूदिया क्षेत्रक  
 बेथलेहेम शहरम। काकरकि अगमवत्ता  
 लिखरख्ल:

६ ‘हेरो, बेथलेहेम शहरक मनै,  
 दुह यहूदिया क्षेत्रम रहल कौनो  
 शहरक मनैनसे कम नैहुइटो,  
 काकरकि दुन्हक शहरम एकठो  
 महान शासक जन्मुइयाबाट,  
 ओ ऊ म्वार मनै इस्नाएलीन्हक  
 रेखदेख करुइयाबाट।’

७ हेरोद ज्योतिषीहुँकन गुपचुपम  
 बलाक तोरैयाँ देखपरल्ठीक समय पत्ता  
 लग्ल। ८ तबदोस्र ऊ हुँकन असिक कैक  
 बेथलेहेमम पठैल, “जाओ, ओ मजासे ऊ



ज्योतिषीहुँक लौव जन्मलक येशूह  
 ध्याँटकर गैलक (२.२)

लर्कक खोजी करो। हुँकहिन पत्ता लगैबो  
 त, महीह फे खबर करहो, मै फे जाक  
 हुँकाहर दर्शन करम।”

९ राजक बात सुन्क ज्योतिषीहुँक  
 आपन डगर लग्ल। जैन तोरैयाँ हुँक  
 पूरुबम देख्लह ऊ तोरैयाँ हुँकन्हक  
 आघआघ लाग्ल, ओ लर्का रहल ठाउँक  
 स्वाङ्ग उप्पर पुग्क टक्कसे अन्यागैल्।  
 १० हुँक तोरैयाँह देखक एकदम आनन्दित  
 हुइल। ११ तबदोस्र हुँक घरम पैँठ्ल त  
 लर्कह आपन डाई मरियमकसँग देख्ल।  
 ओ हुँकाहार पाउ पर्क दण्डवत कर्ल,  
 दोस्र आपन आपन सन्दुक खोल्क  
 हुँकहिन स्वान, सुगन्धित धूप ओ धेर  
 महङ्ग अत्तर भेटी चहैल। १२ तबदोस्र

सपनम 'हेरोदकठे जिन जैहो' कना चेताउनी पैल त हुँक्र और डगरसे आपन देशम घुम्ल।

### भागक मिश्रदेशम गैलक

१३ ज्योतिषीहुँक्र घुम्क गैल त योसेफ सपनम परमप्रभुक स्वर्गदूतह देख्ल ओ स्वर्गदूत हुँकहिन असिक कल, "उठो, लर्का ओ हुँकाहार डाईह लेक मिश्रदेशम भागजाओ, ओ मै नैकहट्सम उहँ पलरहहो। काकरकि, हेरोद लर्कह मुवाइक लाग खोजी करटा।"

१४ तबदोन्न योसेफ उठ्क लर्का ओ हुँकाहार डाईह लेक रातीह मिश्रदेशम भागैल। १५ राजा हेरोदक मृत्यु नैहुइट्सम ऊ उहँ पलरल। असिक अगमवक्ताद्वारा परमप्रभुक ब्वालल्



हेरोद राजासे येशूह बचाइक लाग स्वर्गदूत योसेफह दर्शनम कठ (२.१३)

वचन पूरा हुइल्: "मै आपन छावह मिश्रदेशमसे बलैनु।"

१६ जब हेरोद ज्योतिषीहुँक्र हुँकहिन छकाइल बात थाहाँ पैल, तब ऊ रीसले चूर हुइल। ऊ ज्योतिषीहुँकनसे थाहाँ पाइल समयअनुसार बेथलेहेम ओ उ इलाकम रह्ल दुइ वर्षसमक सब छावा लर्कन मुवाइ लगैल। १७ असिक अगमवक्ता यर्मियक ब्वालल् वचन सत्य हुइल्,

१८ "रामा कना ठाउँम चिल्ला-  
चिल्लाक रुइट्

ओ विलाप करट् सुनमिलटा।  
राहेल आपन लर्कन्हक लाग रुइटी।  
हुँकहीन कुइ फे सुफ्लाइ नैसेकल,  
काकरकि हुँकाहार सक्कु लर्का  
ओरागैल।"

### घुम्क नासरतम अइलक

१९ राजा हेरोद मुल त परमप्रभुक एकठो स्वर्गदूत मिश्रदेशम योसेफकठे सपनम देखपर्ल ओ असिक कल,  
२० "उठो, आब छावा-डाईह लेक इस्त्राएल देशम घुम्क जाओ। काकरकि लर्कक प्राण लिह खोजुइयन मुसेकल।

२१ ऊ उठ्ल ओ छावा-डाईह लेक इस्त्राएल देशम घुम्क गैल। २२ तर यहूदियम हेरोदक छावा अर्खिलाउस

मत्ती २:२३-३:१०

६

आपन बाबक ठाउँम राज्य करट कना बात सुन्ल त ऊ उहाँ जाइ डरैल। तब ऊ फेदोस्र सपनम चेताउनी पैल त गालील क्षेत्रम गैल। २३ उहाँ जाक नासरत कना शहरम बैठ्ल। असिक अगमवक्तन्हक “उहाँह नासरी कैजिने बा” कना वचन पूरा हुइल्।

### बप्तिस्मा देहुइया यूहन्ना

मर्कस १:१-८; लूका ३:१-१८; यूहन्ना १:११-२८

**३** उह समयम बप्तिस्मा देहुइया यूहन्ना यहूदियक उजार ठाउँम अइल ओ असिक प्रचार कर लग्ल, २ आपन आपन पापी मन परिवर्तन करो, काकरकि स्वर्गक राज्य लग्घ आस्याकल। ३ यशेया अगमवक्ता फे यिह यूहन्नक बारेम पैल्हहैं असिक लिखरख्ल:

“उजार ठाउँम चिल्ला-  
चिल्लाक एकजन्हक आवाज  
सुनमिलटा,  
‘डगर स्वाङ्ग रगरगाँट् बनुइयाअस,  
परमप्रभुह स्वागत करक लाग  
तयार होओ’।”

४ यूहन्ना ऊटक भुट्टले बिनल लुगा घालैंट्, ओ छालक पेटी बहन्ल रहँदा।



बप्तिस्मा देहुइया यूहन्ना बप्तिस्मा  
लेना प्रचार करट (३.६)

हुँकाहार खाना फटिङ्ना ओ बन्नोम पाजैना सहत रलहन्। ५ यरुशलेम शहर, सारा यहूदिया क्षेत्र ओ यर्दन लद्यक आँजरपाँजरसे मनै हुँकाहार लग्घ आइलग्ल। ६ ओ आपन-आपन पाप स्वीकार कर्टी यर्दन लद्यम यूहन्नसे बप्तिस्मा लेल।

७ तर फरिसी ओ सदुकी समूहक बहुत मनैन बप्तिस्मा लिह आइट्देख्क यूहन्ना हुँकन कल, “दुह साँपन्हक सन्तान, परमेश्वरक दण्डसे बाँच दुहन के कहल? ८ यदि दुह आपन-आपन पापमसे मन जाटीसे घुमारख्लो कलसे, उह अनुसार चलो। ९ ‘हम्र अब्राहामक सन्तान हुइटी’ कटिम दुह उम्क पैबी कैक जिन सौँचो। मै दुहन कहटुँ, परमेश्वर यी पत्थमसे फे अब्राहामक लाग सन्तान उत्पन्न कर सेकठ। १० रुख्वक जरीम कुहार परस्याकल। उहओर्से असल फारा

२:२३ - मर्क १:२४; लूक २:३९; यूह १:४५. ३:२ - मत्ती ४:१७; मर्क १:१५.

३:३ - यशे ४०:३.

३:४ - २ राज १:८. ३:७ - मत्ती १२:३४; २३:३३. ३:९ - यूह ८:३३.

नैफरैना सब रुख्वा काट्क आगीम  
फाँकजउइया बा।

११ दुह जाटीसे आपन आपन-पाप  
स्वीकार कैक उहिमसे घुमरलो कना  
देखाइक लाग मै दुहन पानीक बप्तिस्मा  
देहटु, तर म्वार पाछ अउइया दुहन  
पवित्र आत्मा ओ आगीक बप्तिस्मा  
देहर्हीं। उहाँ महीसे शक्तिशाली बाट,  
मै त उहाँक जुत्ता बोक्ना लायक फे  
नैहुइटु। १२ ओसैना सुपा उहाँक हाँठम  
बाटन। ओसाक अनाज बखारीम ढर्हीं  
ओ भुसजुन कब्बु नैबुट्ना आगीम  
जरादेहीं।”


### येशूक बप्तिस्मा

मर्कुस १:१-११; लूका ३:२१-२२

१३ तब येशू गालीलमसे यूहन्नकठे  
बप्तिस्मा लिहक लाग यर्दन लद्यम  
अइल। १४ तर यूहन्ना उहाँह च्वाक  
खोज्ल ओ असिक कल, “का अप्न  
म्वारठे अइली? बेनसे अप्न महीह पो  
बप्तिस्मा देहपर्ना।

१५ येशू हुँकहिन कल, “आब असहैंक  
हुइदेओ, परमेश्वरक हरेक इच्छा पूरा  
करक लाग असहैंक करपठा।” यी बात  
मान्क यूहन्ना येशूह बप्तिस्मा देल।

१६ बप्तिस्मा लेक सेक्ल त येशू झट्ट  
पानीमसे ढिक्वम अइल। उ व्याला  
स्वर्ग उघ्रल् ओ उहाँ परमेश्वरक



येशूक बप्तिस्मा हुइबेरिक  
दृष्ट्य (३.१७)

आत्मह दुकुरअस आपनम परट् देखल।  
१७ तबहैं स्वर्गसे असिन आवाज आइल,  
“यी म्वार प्रिय छावा हुइट, मै  
हिँकहिनसे धेर खुशी बाटु।”

### येशूक परीक्षा

मर्कुस १:१२-१३; लूका ४:१-१३

तबदोस्त शैतान येशूक परीक्षा  
लिह कैक पवित्र आत्मा येशूह  
उजार ठाँम लैगिल्। २उ ठाँम येशू  
चालीस दिन चालीस रातसम कुछु के  
नैखैल त उहाँह माहाकर्से भुँख लग्लन्।  
३उह व्याला शैतान उहाँकठे आक  
कहल्, “अप्न जाटीसे परमेश्वरक  
छावा हुइटी कलसे, यी पत्थ्रह ‘रोटी  
होजा’ कैक आज्ञा दि।”

४ येशू जवाफ देल, “धर्मशास्त्रम  
असिक लिखल बा, ‘मनै खैना चिजले


मत्ती ४:५-१५

केल नैबँच्ट, तर परमेश्वरक मुहसे  
निक्रल् हरेक वचनले बँच्ठ।

५ तबदोम्ब शैतान येशूह पवित्र  
शहर यरुशलेमम लैगिल् ओ मन्दिरक  
टुप्पम लैजाक कहल्, ६ “अप्न  
जाटिसे परमेश्वरक छावा हुइटी  
कलसे, यिहाँसे टर फन्की। काकरकि  
धर्मशास्त्रम असिक लिखल बा,

‘परमेश्वर आपन स्वर्गदूतन खटैर्हीं  
ओ पत्थ्रम दुहाँर खारा नैठोक्याइ,  
हुँक दुहीन आपन-आपन हाँठले  
ठामडरहीं।’

७ येशू कल, “धर्मशास्त्रम असिक  
लिखल बा, ‘टैं परमप्रभु आपन  
परमेश्वरक परीक्षा कर्ना कोसिस जिन  
करसा।



येशू मन्दिरक टुप्पम बाट (४:६)

४:४ - व्य ८:३. ४:६ - भज ९:११-१२. ४:७ - व्य ६:१६. ४:१० - व्य ६:१३.

४:१२ - मत्ती १४:३; मर्क ६:१७; लूक ३:१९-२०. ४:१३ यूह २:१२.

८ फेदोम्ब शैतान येशूह भारी द्याड  
पर्वत्वम लैजाक संसारक सब राज्य ओ  
उहिमक चमक देखैटी कहल्, ९ “महिह  
दण्डवत् कर्बी कलसे, यी सब अप्नह  
देहमा।”

१० येशू ओहिह कल, “शैतान, यिहाँसे  
दूर भाग! धर्मशास्त्रम लिखैल् बा, ‘टैं  
परमप्रभु आपन परमेश्वरह दण्डवत्  
करस् ओ उहाँक केल सेवा करस्।’

११ तब शैतान येशूह छोर्क गैल्,  
तबदोम्ब स्वर्गदूतहुँक आक उहाँक सेवा  
कर्ला।

### येशूक ज्योतिअसक वचन

मर्कस १:१४-१५; लूका ४:१४-१५

१२ यूहन्ना थुन्वापारख्ल कना  
बात सुन्ल त येशू गालील क्षेत्रम  
गैला। १३ उहाँ नासरत छोर्क कफर्नहुम  
शहरम जाक बैठ लग्ला। कफर्नहुम  
शहर गालील समुद्रक लग्घ जबूलून ओ  
नप्तालीन्हक ठाउँम पर। १४ असिक  
यशैया अगमवत्तक ब्वालल् वचन पूरा  
ह्वाए आइल:

१५ “जबूलूनक मनै, नप्तालीक मनै,  
समुद्रम जैना डगरीक आसपासक  
मनै,  
यर्दन लद्यक उपारीक मनै,

ओ गालील क्षेत्रक अयहूदी मनै,  
१६ अन्धकारम रहुइयन भारी  
ज्योति देखेबाट।  
मृत्युक अन्धकारम रहुइयन्हक  
लाग एकठो भारी ज्योति  
चम्कने बा।”

१७ उह व्यालासे प्रचार कर्टी येशू  
कहलगल, “आपन-आपन पाप स्वीकार  
कैक ओहीह छोड़देओ, काकरकि स्वर्गक  
राज्य लग्घ आस्याकला।”

### येशूक शुरुक चेलाहुँक

मर्कुस १:१६-२०; लूका ५:१-११

१८ एक दिन येशू गालील समुद्रक  
किनार-किनार न्याइ-गवेर दुइठो  
जलहारीन जाल ख्यालट् देखल। हुँक  
पत्रुस कैजिना सिमोन ओ हुँकाहार  
भैया अन्द्रियास रलह। १९ येशू हुँकन  
कल, “म्वार पाछ्ल लागो, मै दुहत मनैन  
बझैना जलहारी बनैनेबाटुँ।” २० अत्रा



जाल छोरधार्क उहाँक पाछ्ल  
लग्ल (४. २२)

सुन्टिकी हुँक आपन जाल छोरधार्क  
उहाँक पाछ्ल लग्ल।

२१ उहाँसे जैटीजैटी येशू जब्दियक  
दुइ भाइ छावन, याकूब ओ हुँकाहार  
भैया यूहन्नह, भेटैल। हुँक आपन  
बाबकसँग लाउम वैट्क जाल  
टङ्ग्रटलह। येशू हुँकन फे बलैल।  
२२ तबहैं हुँक आपन बाबह लाउम छोर्क  
उहाँक पाछ्ल लग्ल।

### येशूक शिक्षा ओ चङ्गाई

लूका ६:१७-१९

२३ तबदोस्र येशू ठाउँ-ठाउँक  
सभाघरम जाक मनैन सिखैटी, स्वर्गक  
राज्यक बारेम खुशीक खबर प्रचार  
कर्टी ओ हरेक किसिमक रोग बेरामसे  
मनैन चोखैटी सारा गालील क्षेत्रभर  
घुम्ल। २४ असिक उहाँक असल कामक  
बयान सिरिया देशभर फैलगिलन।  
मनै सब किसिमक रोग-व्याथा



उहाँक पाछ्ल मनैन्हक भारी भिड  
लग्लन (४. २५)

मत्ती ४:२५-५:९

१०

रहल बेरम्हेन उहाँकठे अन्ला। उहाँ भूत लागल, मृगीरोग लागल ओ प्यारालाइस रोग लागल सब मनैन चोखैला। २५ असिक उहाँक पाढ्य भारी भीड लग्लन। उ मनै गालील क्षेत्रक, डेकापोलिसक, यरुशलेम शहरक, यहूदिया क्षेत्रक ओ यर्दन लद्यक उपारीक रलहा।

## पर्वतम येशूक देहल शिक्षा आशिषित शिक्षा

५ मनैन्हक भारी भीड देखक  
येशू पर्वतम जाक बैठ्ला। ओ



पर्वतमसे मनैन्हक भीडहन शिक्षा  
देटी (५.१)

चेलाहुँक उहाँकठे गैला। २ येशू हुँकन  
शिक्षा देहलग्ल:

३ “आत्मिक रुपम अपन्हेह  
गरीब महसुस करुइयन आशिष  
पाइल मनै हुइट,  
काकरकि स्वर्गक राज्य हुँकन्हकके  
हो।

४ शोक करुइयन आशिष पाइल मनै  
हुइट,

काकरकि हुँक सान्त्वना पैहीं।

५ नम्र मनै आशिष पाइल मनै हुइट,  
काकरकि हुँक पृथ्वीम अधिकार  
कर पैनेबाट।

६ धार्मिकतक लाग भुँखाइल-  
पियासल मनै आशिष पाइल मनै  
हुइट,  
काकरकि हुँकन्हक भुँख-पियास  
मेट्ने बाटन।

७ दया करुइयन आशिष पाइल मनै  
हुइट,  
कारकि हुँक दया पैहीं।

८ शुद्ध मन रहुइयन आशिष पाइल  
मनै हुइट,  
काकरकि हुँक परमेश्वरह देखहीं।

९ मेलमिलाप करुइयन आशिष  
पाइल मनै हुइट,  
काकरकि हुँक परमेश्वरक सन्तान  
कैजहीं।

१० धार्मिकतक लाग सतावा  
पउइयन आशिष पाइल मनै हुइट,  
काकरकि स्वर्गक राज्य हुँकन्हके  
हुइटन।

११ दुह आशिष पाइल मनै हुइटो,  
जब मनै महीह विश्वास कर्लक कारण  
दुहन दुख देहीं, सतैही, निन्दा करहीं,  
ओ झूट बोल्क दुन्हक बारेम खराब  
बात बट्वैहीं। १२ तब खुशी ओ आन्दित  
होओ, काकरकि दुन्हक लाग स्वर्गम  
भारी इनाम ढैगिल्बा। अघट्टेक  
अगमवक्तन के मनै ओसहेंक दुख देक  
सताइँट।

### न्वान ओ ज्योतिसे तुलना करल येशूक शिक्षा

मर्कस ९:५०; लुका १४:३४-३५

१३ दुह पृथ्वीक न्वान हुइटो। तर  
न्वानक स्वाद गैल् कलसे फेदोस्स केर्हीले  
नोनार बनैना? उ त बाहार फँक्ना ओ  
मनै ग्वारले डब्ना बाहेक और कुछु  
कामक नैरहट।

१४ “दुह संसारक ज्योति हुइटो।  
पर्वत्वम बनल शहर तुक नैस्याकट।  
१५ दिया बार्क मनै पाथीले नैछोप्ट,  
बेनसे घरम सबजहन अजरार व्वाए

कैक द्याङ ठाउम पो ढर्ठ। १६ ओसहेंक  
दुहन्हकम रहल ज्योति मनैन्हक आध  
चम्कदेओ। ओ हुँक दुन्हक असल  
काम देखहीं ओ स्वर्गम रना दुन्हक  
परमेश्वर बाबक प्रशंसा करहीं।

### व्यवस्था पालन कर्ना बारेम शिक्षा

१७ मै मोशक देहल व्यवस्था या  
अगमवक्तन्हक ब्वालल् वचन रद्द कर  
आइल हुइटु कैक जिन सम्मो, बेनसे  
मै उ पूरा कर आइल हुइटु। १८ जाट्टिसे  
मै दुहन कहटुँ, जबसम स्वर्ग ओ पृथ्वी  
बिल्क नैजाई तबसम व्यवस्थम लिखल  
सब बात बिना पूरा हुइल उहिमक  
एकठो मात्रा या एकठो बिन्दु फे  
नैहेरैने हो। १९ व्यवस्थमक सबसे छुटी  
बातह उलझन कर्ना ओ उलझन कर  
सिखैना मनै स्वर्गक राज्यम सबसे  
छुटी ठहरने बाट। तर व्यवस्थक बात  
अप्न फे पालन कर्ना ओ औरजहन  
फे पालन कर लगैना मनैजुन स्वर्गक  
राज्यम बरा ठहरने बाट। २० मै दुहन  
कहटुँ, परमेश्वरक आज्ञह शास्त्री ओ  
फरिसीहुँकनसे मजासे पालन नैकबों  
कलसे, दुह स्वर्गक राज्यम जाइ  
नैपउइयाहुइटो।

५:१० - १ पत्र ३:१४. ५:११ - १ पत्र ४:१४. ५:१२ - २ इति ३६:१६; प्रे ७:५२. ५:१३ - मर्क ९:५०.

५:१४ - यूह ८:१२; ९:५. ५:१५ - मर्क ४:२१; लूक ८:१६; ११:३३. ५:१६ - १ पत्र २:१२.

५:१८ - लूक १६:१७.

मत्ती ५:२१-३२

१२

### रीस कर्ना बारेम शिक्षा

२१ “दुह सुनरख्लो, अघट्टेक मनैन असिक कैगिल् रह, ‘हत्या जिन करहो, जे हत्या करी ऊ दण्ड पाई’ २२ तर मै दुहन कहटुँ, आपन भैयसे रिसैना मनैया दण्ड पउइया वा। जे आपन भैयक अपमान करी ओहीह महासभम जवाफ देहपरहिँस। आपन भैयह सरपुइया त झन नरकक् आगीम पर्ने वा।

२३ उहओसे परमेश्वरह भेटी चहैनासे आध दुहाँर भैयक दुहीनसे रीस बाटन कना बात थाहाँ हुइल् कलसे, २४ दुहाँर भेटी वेदीक आध ढैक, तुरन्त जाओ ओ आपन भैयसे मेलमिलाप कैडारो। तबदोस्त आक आपन भेटि चहाओ।

२५ “अदालतम पुग्नासे आध आपन विरोधीसे डगरिहेम मेलमिलाप कैडारो, नकित ऊ दुहिन न्यायाधीशक जिम्मा लगादेहीं, ओ न्यायाधीश दुहिन सिपाहीक जिम्मा लगादेहीं त टुँ इयालखानम पर्नेबाटो। २६ जाट्रिसे मै दुहिन कहटुँ, उ ब्याला जरीमानक एक-एक पैँसा नैतिरटसम टुँ उहाँसे उम्क नैपैने हुइटो।

### व्यभिचार कर्ना बारेम शिक्षा

२७ “व्यभिचार जिन करहो” कना बात त दुह सुनरख्लो। २८ तर मै दुहन कहटुँ, कौनो महिलह कुई गलत विचारले ह्याराल् कलसे फे ऊ मनम व्यभिचार कैस्याकल रठा। २९ यदि दुहाँर दाहिन आँख पाप कर लगैठा कलसे, ओहीह झिंकक फाँकदेओ, काकरकि दुहाँर सलशरीर नरकम जैनासे त दुहाँर शरीरक अड्गमसे एकठो अड्ग फँक्ना दुहाँर लाग धेर मजा हो। ३० दुहाँर दाहिन हाँठ पाप कर लगैठा कलसे, ओहीह काटक फाँकदेओ। काकरकि दुहाँर सलशरीर नरकम जैनासे त दुहाँर शरीरक अड्गमसे एकठो अड्ग फँक्ना दुहाँर लाग धेर मजा हो।

### छोडपत्र कर्ना बारेम शिक्षा

मर्क्स १०:११-१२; लुका १६:१८

३१ असिक फे लिखल वा, ‘आपन गोसिनेह छ्वार खोजुइया छोडपत्र लिष्क छ्वावार’ ३२ तर मै दुहन कहटुँ, जे आपन गोसिनेह व्यभिचारक कारण बाहेक और कारणले छोरी, ऊ ओहीह व्यभिचार कर लगैठा ओ ओसिक छ्वावाल महिलसे जे भ्वाज कर्ठा ऊ व्यभिचार कर्ठा।

५:२१ - प्रस २०:१३; व्य ५:१७.

५:२७ - प्रस २०:१४; व्य ५:१८.

५:२९ - मत्ती १८:१; मर्क ९:४७.

५:३० -

मत्ती १८:८; मर्क ९:४३.

५:३१ - व्य २४:१-४; मत्ती १९:७; मर्क १०:४.

५:३२ - मत्ती १९:९; १ कोर ७:१०-११.

### किन्या खैना बारेम शिक्षा

३३ “अघटटेक मनैन ‘झूट किन्या जिन खैहो, तर परमप्रभुक नाउँम खाइल किन्या पूरा करहो’ कैक कहल बात त दुहन थाहाँ बा। ३४ तर मै दुहन कहटुँ, कौनो बातक फे किन्या खैबो जिन करो। स्वर्गक नाउँ लेक किन्या जिन खैहो, काकरकि उ त परमेश्वरक सिंहासन हो। ३५ पृथ्वीक नाउँ लेक फे किन्या जिन खैहो, काकरकि यी परमेश्वरक पाउदान हो। यरुशलेमक नाउँ लेक फे किन्या जिन खैहो, काकरकि उ त महाराजक शहर+ हो। ३६ आपन कपारीक किन्या फे जिन खैहो, काकरकि दुह आपन कपारीक एकठो भुट्ला फे उज्जर या कन्या बनाइ नैसेकटो। ३७ ज्या कना बा, हो कलसे हो कहो, नैहो कलसे नैहो कहो। ओहिसे बहुत कुछु बोल्बो कलसे, उ त शैतानकओर्से हो।

### बदला लेना बारेमा शिक्षा

त्रुका ६:२९-३०

३८ “आँखक बदला आँख, दाँतक बदला दाँत’ कना बात त दुह सुनरख्लो। ३९ तर मै कहटुँ, दुह कौनोजहनसे बदला जिन लेओ। यदि कौनो मनैया दुँहार दाहिन गालम चट्काई कलसे,

+५:३५ महाराजक शहर - याकर अर्थ परमेश्वरक शहर हो।

५:३३ - लेवी १९:१२; गन्ती ३०:२; व्य २३:२१. ५:३४ - याक ५:१२; यशी ६६:१; मत्ती २३:२२.

५:३५ - यशी ६६:१; भज ४८:२. ५:३८ - प्रस २१:२४; लेवी २४:२०; व्य १९:२१. ५:४३ - लेवी १९:१८.

बाँँ गाल फे सोझारदेओ। ४० कौनो मनैया मुद्दा लगाक दुँहार कमिज लैजाइ खोज्ठा कलसे, ओहिह कोट फे देडारो। ४१ कौनो मनैया एक किलोमिटरसम जैना कर लगैठा कलसे, वाकरसँग दुई किलोमिटरसम जादेओ। ४२ मङ्ना मनैन देओ, ऋण मङ्ना मनैन फे ऋण देओ।

### शत्रुन प्रेम कर्ना बारेम शिक्षा

त्रुका ६:२७-२८, ३२-३६

४३ “आपन छिमेकीह प्रेम करो, शत्रुहजुन हेल्हा करो’ कना बात त दुहन थाहाँ बा। ४४ तर मै दुहन कहटुँ, शत्रुन प्रेम करो। दुहन सतुइयन्हक लाग प्रार्थना करो। ४५ ओसिक कर्बो कलसे, स्वर्गम रना परमेश्वर बाबक छाइ-छावान हुइबो। काकरकि परमेश्वर खराब ओ सज्जन दुनुजन्हक लाग घाम लगादेठ। धर्मी ओ पापी दुनुजन्हक लाग पानी बसदिठ। ४६ दुहन प्रेम करुइयन केल प्रेम कर्ठो कलसे, दुह का इनाम पाइसेक्बो जे? ओसिन प्रेम त कर उठुइयन फे कर्ठ। ४७ दुह आपन मनैन केल आदर कर्ठो कलसे, औरजहनसे धेर का काम कर्बो जे? ओसिक त परमेश्वरकम विश्वास नैकर्ना मनै के कर्ठ। ४८ स्वर्गम रना

मत्ती ६:१-१३

१४

परमेश्वर बाबा सब बातम सिद्ध रहअस दुहँ के सब बातम सिद्ध होओ।”

### दान देना बारेम शिक्षा

**६** येशू कहटीगैल, “मनैन देखाइक लाग धर्मकर्म जिन करो, नकित दुहँ स्वर्गम रना परमेश्वर बाबसे कुछु इनाम नैपैनेहइटो।

७ दुहँ अभावम परल कौनो मनैन देहबेर कपटी मनैन्हकअस हल्ला जिन करो। हुँक्र त मनैनसे प्रशंसा पाइक लाग सभाघर ओ गल्लीम बाजा बजैटी नेइठ। जाटीसे मै दुहन कहटुँ, हुँक्र आपन पूरा इनाम पास्याकल बाट। ८ बेनसे कौनोजहन देहबेर टुँहार दाहिन हाँठले देहल् बाँक हाँठ समेत थाहाँ जिन पाए, ९ ताकि दुन्हक देहाइ सुदुक्क क्वाए। तब सब चिज देखना परमेश्वर बाबा दुहिन इनाम देहाँ।

### प्रार्थना कर्ना बारेम शिक्षा

लूका ११:२-४

५ “प्रार्थना करबेर कपटीन्हकअस प्रार्थना जिन करो। हुँक्र त और मनै द्याखैंट कैक सभाघर ओ गल्लीक चौकम ठह्याक प्रार्थना कर्ना मन परैठ। मै जाटीसे दुहन कहटुँ, हुँक्र आपन पूरा इनाम पास्याकल बाट। ६ दुहँ प्रार्थना करबेर क्वाठम जाओ ओ ड्वार

लगाक गुप्तम रना दुन्हक परमेश्वर बाबसे प्रार्थना करो, ओ गुप्तम करल काम देखना परमेश्वर बाबा दुहन इनाम देहाँ। ७ “परमेश्वरकम विश्वास नैकनार मनै करअस बर्बाक प्रार्थना जिन करो। हुँक्र त नम्मा-नम्मा प्रार्थना कर्लसे उत्तर पाजैठा कैक विचार कर्ठ। ८ तर दुहँ हुँकन्हकअस जिन होओ। काकरकि दुहँ मङ्गनासे आघहें दुहन का चिज चाहल बा कना बात स्वर्गम रना परमेश्वर बाबह थाहाँ बाटन।

९ दुहँ असिक प्रार्थना करो-

“हे हमार स्वर्गम रना परमेश्वर बाबा,  
अप्नक नाउँ पवित्र हवाए।<sup>+</sup>  
१० अप्नक राज्य आए।  
अप्नक इच्छा स्वर्गम जसिन बा,  
ओस्तहाँक यी पृथ्वीम पूरा हवाए।  
११ हमन चहना खाना आज फे दी।  
१२ हमार अपराध क्षमा कैदी,  
जसहेँक हमार विरोधम अपराध  
करुदयन हम्र क्षमा कैरखली।  
१३ हमन पापम फँसैना बातसे दूर  
ढरी,  
ओ दुष्टसे हमन रक्षा करी।  
[काकरकि राज्य, शक्ति ओ महिमा  
सङ्डभर अप्नक हो।]

<sup>+</sup>६:९ अप्नक नाउँ पवित्र हवाएः - याकर अर्थ ‘सब जन अप्नह आदर करहाँ काकरकि अप्न पवित्र बाटी’ कहल हो।

१४ “टुन्हक विरोधम् अपराध करुइयन क्षमा कर्बो कलसे, स्वर्गम् रना परमेश्वर बाबा फे टुन्हक करल अपराध क्षमा करहीं। १५ तर दुह मनैन्हक अपराध क्षमा नैकर्बो कलसे, परमेश्वर बाबा फे टुन्हक अपराध क्षमा नैकरहीं।

### ब्रत रना बारेम शिक्षा

१६ जब दुह ब्रत रबो, तब कपटीन्हकअस अन्धार मुहू लगाक ब्रत जिन रहो। काकरकि हुँक त मनैन देखाइक लाग आपन मुहू अन्धार करैठ। जाटीसे मै दुहन कहटुँ, हुँक आपन इनाम पास्याकल बाट। १७ तर दु ब्रत रहल समयम् आपन कपारिम त्याल लगाओ, ओ मुहू धोओ। १८ दुहाँ ब्रत मनै नाहीं, तर गुप्तम् रना परमेश्वर बाबा देखहीं, ओ गुप्तम् देखना परमेश्वर बाबा दुहिन इनाम देहीं।

### स्वर्गम् धनसम्पत्ति जम्मा कर्ना बारेम शिक्षा

त्रूका १२:३३-३४; १६:१३

१९ पृथ्वीम् आपन लाग धनसम्पत्ति जिन कुह्याओ, जहाँ कीरा ओ खिया खैठा, ओ च्वार चोर्क लैजैठ। २० बेनसे स्वर्गम् आपन लाग धनसम्पत्ति जम्मा करो, जहाँ ना कीरा, ना खिया खाइट्,

ओ च्वार फे नैचोर्ट। २१ काकरकि जहाँ टुन्हक धन रही, उहूँ टुन्हक मन फे रही।

२२ “शरीरक दिया आँख हो। यदि दुहाँर आँख ठीक बा कलसे, दुहार सारा शरीर अजरार हुइने बा। २३ तर दुहार आँख खराब बा कलसे, दुहार सारा शरीर अन्धार हुइने बा। यदि दुहारम रहल अजरार अन्धार होजाई कलसे, उ अन्धार कत्रा कैयाँकुचिल रही।+

२४ कुइ फे दुइ मालिकन्हक सेवा कर नैस्याकट्। काकरकि ऊ एकजहन हेल्हा करी, एकजहन प्रेम करी, कि जुन एकजन्हक कहल मानी, एकजन्हक मतलब नैकरी। दुह फे परमेश्वर ओ धनक सेवा कर नैसेकनेहुइटो।

### चिन्ता कर्ना बारेम शिक्षा

त्रूका १२:२२-३१

२५ उहओर्से मै दुहन कहटुँ, ‘आपन प्राणक लाग का खैम, का पियम कैक ओ आपन शरीरक लाग का लगैम कैक चिन्ता जिन करो।’ जीवन खैना चिजसे ओ शरीर लगैना लुगासे बरा नैहो का?

२६ आकाशम उर्ना चिरैंचुरुझगन हेरो ना। हुँक ना बुइट, ना कट्नी कर्ट, ना त अनाज बखारीम जम्मा कर्ट, तर फे परमेश्वर बाबा हुँकन खैवैठ। दुह उ चिरैं-चुरुझगनसे धेर मुल्यवान नैहुइटो

+६:२३ - ठीक आँख रहल मनैया भलो कर्ना मनैया हो ओ खराब आँख रहल मनैया स्वार्थी मनैया हो।

६:१४ - मर्क ११:२५-२६. ६:१९ - याक ५:२-३.

का? २७ चिन्ता कैक दुहमध्ये के आपन आयु डान्चे हुइलसे फे बहाइ सेकठा जे?

२८ “लुगाफाटक लाग का चिन्ता कर्ठो? मैदानम फुलल् लिली फूलह हेरो ना। हुँक ना त परिश्रम कर्ट, ना लुगा बिन्ट। २९ मै दुहन कहटुँ, सोलोमन राजा ओत्रा धनी रटि-रटि के ऊ एकठो फूला बराबर फे सँप्रल नैरलह। ३० आज रना ओ काल आगीम फाँकजैना घाँसह त परमेश्वर असिक सँप्रैठ कलसे, उहाँ दुहन झन नैसँप्रैहीं का? खै दुन्हक विश्वास? ३१ उहओर्से ‘का खैबी? का पिबी? का लगैबी?’ कैक चिन्ता जिन करो। ३२ काकरकि असिन चिजिक चिन्ता त परमेश्वरह विश्वास नैकर्ना मनै कर्ठ। यी सब चिज दुहन चहठा कना बात स्वर्गम रना परमेश्वर बाबह थाहाँ बाटन। ३३ बेनसे पैल्ह परमेश्वरक राज्य खोजी करो ओ उहाँक इच्छा अनुसार जीवन जीओ, यी सब चिज परमेश्वर दुहन देहीं। ३४ कालिहक लाग चिन्ता जिन करो, कालिहक समस्या काल समाधान हुई। आझुक दुःख आझुक लाग धेर बा।

### औरजहन दोष लगैना बारेम शिक्षा

लूका ६:२७-३८, ४१-४२

**७** येशू कहटीगैल, “औरजहन दोष जिन लगाओ, त दुहन के दोष

नैलगाजाई। २ काकरकि दुह जसहँक औरजहन दोषी ठहैबो, ओसहँक दुह फे दोषी ठहाजैबो। जौन नापले औरजहन नपबो, उह नाप दुहनफे लागू हुई।

३ आनक आँखिमक किर्किट देखुइया आपन आँखिम ठेङ्ग्रा रहल बात काजे थाहाँ नैपैटो? ४ आपन आँखिमक ठेङ्ग्रा नैदेखुइया, आपन भैयह ‘खै खै, मै दुहाँर आँखिमक किर्किट झिंकिदिउँ’ कैक कसिक कह सेकठो? ५ दुह कपटी मनै, पैल्ह आपन आँखिमक ठेङ्ग्रा झिंको, तब आपन भैयक आँखिमक किर्किट झिंकवेर छलड़ग देख्बो।

६ “पवित्र चिज कुक्कुरिन जिन देओ, यदि देबो कलसे उल्ट दुहन खप्कहीं, ओ हिरामोती सुरिन्हक आघ जिन फाँको, यदि फँक्बो कलसे ग्वारले डाङ्क काच्याकुची पारदेहीं।

### मङ्गना, खोजना, ओ ढकढकैना बारेम शिक्षा

लूका ११:९-१३

७ “मङ्गीरहो त पैबो, खोजटीरहो त भेटैबो, ढकढकैटीरहो त दुन्हक लाग ड्वार उभकजाई। ८ काकरकि मङ्गुइयन पैठ, खोजुइयन भेटैठ, ओ ढकढकुइयन्हक लाग ड्वार उभकजैठा।

९ दुहमध्येम कौन मनैया हुई, ज्याकर छावा रोटी मङ्ग्लसे पत्था दे? १० या

मच्छी मङ्गलसे सप्वा दे? ११ दुह पापी होक के आपन छाइ-छावन असल चिज देह जन्ठो कलसे, स्वर्गम रना परमेश्वर बाबा ज्ञन, उहाँसे मङ्गुइयन कत्रा धेर असल चिज देहीं। १२ और मनै दुहन जसिन व्यवहार करल् चहठो, दुह के औरजहन ओस्तहैं व्यवहार करो। व्यवस्था ओ अगमवक्तन्हक शिक्षा यिह जो हो।

### साँक्कीर ओ चाक्कीर इवारीक बारेम शिक्षा

लूका १३:२४

१३ साँक्कीर इवारीओर्से भित्तर पैठो, काकरकि विनाशम पुगैना इवार चाक्कीर ओ सजिलो रठा, ओ ओसिन इवारीओर्से पैठुइयन धेर रठ। १४ काकरकि जीवनम पुगैना इवार साँक्कीर रठा ओ डगर अण्ड्यारो रठा, असिन डगर भेटुइयन डान्चे केल रठ।

### मनै कामले चिन्मिलठ कना बारेम शिक्षा

लूका ६:४३-४४

१५ झुटा अगमवक्तनसे होशियार रहो। हुँक्र भैरीन्हक भेष लेक अझठ, तर भित्तरजुन डरलग्टिक ब्वाँसाअस रठ। १६ दुह हुँकन हुँकन्हक कामले चिन्हबो। का काँटक ब्वाँटिम अङ्गुर

या सिउँहीक ब्वाँटिम अज्जीर फर्ठी? १७ असल रुख्वम असल फारा फर्ठी, खराब रुख्वम खराब फारा फर्ठी। १८ असल रुख्वा खराब फारा फराइ नैस्याकट, ना त खराब रुख्वा असल फारा फराइ सेकठा। १९ असल फारा नैफरैना हरेक रुख्वा काट्क आगीम फाँकजउइया बा। २० असिक दुह झुटा अगमवक्तन हुँकन्हक कामले चिह्न्बो।

२१ ‘महिह ‘प्रभु, प्रभु’ कहुइया सब जन स्वर्गक राज्यम पैठ नैपउइयाहुइट। स्वर्गम रना म्वार परमेश्वर बाबक इच्छा अनुसार काम करुइयन केल पैठ पउइयाबाट। २२ उ दिन धेर जन महीह कह्हीं, ‘प्रभु, प्रभु का हम्र अप्नक नाउँम अगमवाणी नैबोल्ली? का अप्नक नाउँ लेक भुतन नैखेद्ली? का अप्नक नाउँम अचम्म-अचम्मक काम नैकर्ली?’ २३ उ ब्याला मै हुँकन कहम, ‘ऐ दुष्ट काम करुइयन, मै दुहन चिह्न्ल नैहुइट। यिहाँसे चलजाओ।’

### बुद्धिमान ओ मूर्ख मनैयक बारेम शिक्षा

२४ जे म्वार वचन सुन्क पालन कर्ठा, ऊ एकठो बुद्धिमान मनैयाअस हो। ऊ पत्थ्रक बल्वार जग डार्क घर बनाइल। २५ तब हुरी चलल, झरी करल, बाहार आइल ओ उ घरह धक्का लगाइल, तर पत्थ्रक बल्वार जग रलकओर्से उ घर

मत्ती ७:२६-८:९

१८

नैठलल्। २६ जे म्वार वचन सुन्क के पालन नैकरट, ऊ एकठो मूर्ख मनैया अस हो। ऊ बालुरम घर बनाइल। २७ तब हुरी चलल्, झरी करल, बाहार आइल ओ उ घरह धक्का लगाइल, तब उ घर ढल्क भट्याड-भुटुड होगैल्।

२८ येशू आपन चेलन असिक शिक्षा देहट सुन्क भीडक मनै छक्क पर्ल। २९ काकरकि उहाँ धर्मगुरुन्हक अस नाहीं, तर पूरा अधिकार पाइल मनैया अस सिखाइँद्र।

### कोररोग लागल मनैया चोखैलक

मर्कस १:४०-४५; लूका ४:१२-१६

येशू पर्वत्वमसे टर ओल्हाइबेर मनैन्हक भारी भीड उहाँक पाछ्य लागल। २उ ब्याला एकठो कोररोग लागल मनैया आक उहाँक पाउ पर्टी कहल, “प्रभु, अप्न चहबी कलसे महीह चोखाइ सेक्नेबाटी”

३ येशू वाकरम हाँठ ढैक कल, “मै चाहूटु, टुँ चोखाजाओ।” तबहैं कोररोग लागल मनैया चोखागैल्। ४ येशू ओहीह कल, “हेरो, यी बात किहुह जिन कह्हो। बेनसे पुजेहोकठे जाक अपन्हेह देखाओ ओ अप्न चोखैलक बात मनैन्हक आघ सावित कराइक लाग मोशक व्यवस्था अनुसार बलि चह्हाओ।”



येशू कोररोग लागल मनैय चोखैलक दृष्य (८.२)

### रोमी कप्तानक नोकर चोखैलक

लूका ७:१-१०

५ येशू कफर्नहुम शहरम पैठबेर एक जन रोमी कप्तान आक उहाँसे बिन्ती कर्ल, ६ “प्रभु, म्वार नोकर प्यारालाइस रोगले घरम थलापरल बा।”

७ येशू ओहीह कल, “मै जाक ओहीह चोखुइयावाटुँ।”

८ कप्तान कल, “मै हजुरह आपन घर लैजिना योग्यक मनैया नैहुइटु। हजुर यिहैंसे आज्ञा केल कैदी, त म्वार नोकर चोखाजाई। ९ मै के आपनसे बरा हाकिमक अधीनम रन्हुँ। म्वार अधीनम के सिपाहीहुँक्र बाट। मै एकठो मनैयह ‘जा’ कर्तुँ, त ऊ जैठा, ओ और मनैयह ‘आ’ कर्तुँ, त ऊ अइठा। आपन नोकरह ‘यी कर’ कर्तुँ, त ऊ उ काम कर्ता।

१० हुँकाहार बात सुन्क येशू अचम्म मन्ल, ओ आपन पाछ्व लागल मनैन कल, “जाटीसे मै दुहन कहटुँ, असिन भारी विश्वास त मै इस्राएलीन्हक बीचम के नैदेखलहुँ। ११ मै दुहन कहटुँ, पूरुब ओ पश्चिमसे अयहूदी मनै धेर अइहीं ओ स्वर्गक राज्यम अब्राहाम, इसहाक ओ याकूबकसँग सँग खाए बैठहीं। १२ तर स्वर्गक राज्यम रहपर्ना इस्राएलीहुँकजुन बाहार अन्धकारम फाँकजैहीं, ओ उहाँ मनै दुखले दाँत पिस्टी रुवाबासी करहीं।”

१३ तबदोन्न येशू कप्तानह कल, “आब अप्न घर जाई, अप्नक विश्वास करलअस हुइने बा।” उ नोकर तबहें चोखागैल्।

### धेर रोगीहुँक चोखैलक

मर्कुस १:२६-३४; लूका ४:३८-४१

१४ येशू पत्रुसक घर गैल। उहाँ हुँकाहार सासू जरकमार सुल्लकसुल्ल रलहीं। १५ येशू हुँकाहार हाँत छुल त हुँकहिन जर छोर्लिन। तब ऊ उट्ली ओ उहाँक मानमर्जाति कर्ली।

१६ सन्द्या हुइल् त, मनै भूत लागल धेरजहन येशूकठे अन्ल। येशू आपन बोलीले मनैन्हकमसे भूत निक्रैल ओ सक्कु बेरम्हेन चोखादेल। १७ असिक अगमवक्तन्हक कहल बात पूरा हुइल्,

“उहाँ जो हमार कमजोरी बोकदेल, ओ हमार रोग हटादेल।”

### येशूक पाछ्व लग्लसे तिरपर्ना मूल्य

लूका ९:५७-६२

१८ येशू आपन आञ्जरपाञ्जर मनैन्हक भारी भीड देखल त आपन चेलन “ले आब हम्म तल्वक उपार जाई” कैक कल। १९ उहब्याला एकठो धर्मगुरु उहाँकठे आक कल, “गुरु, अप्न जहाँ गैलसे फे मै अप्नकसँग जैमा।”

२० तब येशू हुँकहिन कल, “फेहोरेन्हक डिवान्डर रठन, चिरैचुरुड्गन्हक ठाँट रठन, तर मै मनैयक छावक आराम कर्ना ठाँउ के नैहो।”

२१ तब उहाँक चेलन्हक बीचमसे और एकठो चेला कल, “प्रभु, पैल्ह मै घर जाक आपन बाबह माटी देलिउँ, त अप्नक पाछ्व लगमा।”

२२ येशू हुँकहिन कल, “मुवलअस मनै मुवल मनैन माटी देहहीं, दुँ म्वार पाछ्व लागो।”

### येशू आँधीह शान्त पर्ल

मर्कुस ४:३५-४१; लूका ८:२२-२५

२३ येशू लाउम चिहुर्ल ओ उहाँक चेलावँ के उहाँकसँग गैल। २४ अक्चोट्टे तल्वम भारी आँधीबौखा चल लागल,

मत्ती ८:२५-३२

२०

ओ पानीक छल्कले लाउ भर लागला।  
तर येशुजुन मस्तसे निदाइल रलहा।  
२५ तब चेलाहुँक्र उहाँह असिक कटी  
जगैल, “प्रभु, हमन बचाई, हम  
मुवलग्ली।”

२६ येशु हुँकन कल, “काजे असिक  
डराइटो? खै दुन्हक विश्वास?” तब  
उहाँ उट्क आँधीबौखा ओ छल्कह  
हाकैल, त आँधीबौखा ओ छल्का जाट्से  
शान्त होगैल्।

२७ असिन हुइल् देखक सब जन छक्क  
पर्ल ओ कल, “यी कसिन मनैया हुइट?  
हिंकाहार कहल त आँधीबौखा ओ छल्का  
समेत मन्ठ!”

### भूत लागल मनै चोखैलक

मर्कुस ५:१-२०; लूका ८:२६-३९

२८ जब येशु तल्लोक उपार  
गदरिनीहुँकन्हक मुलुकम पुग्ल, तब




येशु आँधीहरीह शान्त पर्ल (C. २४)

भूत लागल दुइ जन मनै उहाँकठे अइला।  
हुँक्र दुनु जन मुवल मनै गर्ना ठाउँओर  
बैठ्द। हुँक्र माहाँ डरलग्टिक रलह, ओ  
उ डगर कुई फे नेङ्गाघुम कर नैस्याकट।  
२९ हुँक्र दुनु जन असिक चिच्याइ  
लगल, “हे परमेश्वरक छावा, अप्न  
हमन का करक लाग अइलही? का  
हमार समय बिना पुग्ल हमन दुःख  
देहक लाग अइलही?”

३० हुँकनसे टनिक दूर एकबगाल  
सुवर चह्लटलह। ३१ भूत उहाँह असिक  
कैक बिन्ती कर्ल, “हमन निक्राइ जो  
चहटी कलसे हमन उह सुरिन्हकम  
जाइदी।”

३२ तबदोस्त येशु हुँकन कल, “जाओ।”  
तब हुँक्र निकर्क सुरिन्हकम गैल, त  
सक्कु सुवर भीरमसे ढनमनैटी समुद्रम

भूत लागल दुइठो मनैन येशु  
चोखैठ (C. २९)

गिर्क मुगैला। ३३ सुवर चहुइयन भाङक शहरम गैला। शहरम जाक सक्कु घटना ओ भूत लागल मनै कसिक चोखैल कना बातसमेत सुनादेल। ३४ यी बात सुन्न त येशूह भ्याट कर सारा शहरक मनै उलट्क अइल। उहाँह देखल त, मनै आपन क्षेत्रसे जाइक लाग बिन्ती कर्ल।


### येशू पाप क्षमा देल

मर्कुस २:१-१२; लूका ५:१७-२६

**१** तबदोस्त येशू लाउम चिहुर्ल ओ धुम्क तल्वक उपार आपन बैठल शहरम गैला। २ मनै प्यारालाइस रोग लागल एकठो मनैयह बिस्तारासैंट बोक्क क उहाँकठे अन्त। हुँकन्हक विश्वास देष्क येशू उ रोग्यह कल, “भैया, साहस करो, दुहाँर पाप क्षमा होगैल।

३ येशूक कहल यी बात सुन्क धर्मगुरुमध्ये कत्रा जन मनमन विचार करलगल, “यी त परमेश्वरक बदनाम करटा।”

४ तर येशू हुँकन्हक मनक बात बुझडर्ल ओ कल, “दुह मनम काकर दुष्ट विचार करटो?” ५ यी मनैयह ‘दुहाँर पाप क्षमा होगैल’, कना ओ ‘उठ्क नेड्गो’ कना कौन सजिलो हो, कहो त? ६ हेरो, मै, मनैयक छावह यी पृथ्वीम मनैन्हक पाप क्षमा कर्ना अधिकार बा



सुवर पछ्वमसे ढनमनैटी समुद्रम  
गिर्लक दृष्य (८. ३२)

कना बात मै दुहन देखैम।” तब ऊ बेरम्हेह कल, “उठो, आपन बिस्तारा बोक्क घर जाओ।” ७ तबदोस्त उ मनैया जुरुक्कसे उठल, ओ आपन घर गैल्। ८ यी अचम्मक काम देष्क भीडक मनै डरैल, ओ मनैन असिन शक्ति देना परमेश्वरक प्रशंसा कर्ल।

### येशू मत्तीह बलैल

मर्कुस २:१३-१७; लूका ५:२७-३२

९ येशू उहाँसे जाइबेर एक जन मत्ती नाउँक मनैयह कर उठैना अड्डम बैठल देखल। तब येशू उ मनैयह कल, “म्वार पाछ्ल लागो।” मत्ती उठ्ल ओ उहाँक पाछ्ल लग्ल।

१० येशू ओ उहाँक चेलन मत्तीक घर खाए बैठल ब्याला कर उठुइयन ओ और पापीहुँक्र फे अइल, ओ उहाँहुँकन्हकसैंग खाए बैठ्ल। ११ यी देष्क फरिसी समूहक मनै उहाँक चेलन कल, “काजे दुन्हक गुरु

मत्ती ९:१२-२१

२२

कर उठुइया ओ पापीन्हकसँग खनपिन कर्ठ?"

१२ हुँकन्हक बात सुन्क येशू कल, "निरोगी मनैन डाक्टर नैचहटन, तर रोगी मनैन चहठन। १३ दुह परमेश्वरक वचनम लिखल बातक अर्थ बुझपर्था: मै पशुक बलि नाही, दया करल चहृुँ।" मै धर्मीन नाही, तर पापीन बलाए पो आरनु।"

### ब्रत रना बारे शिक्षा

मर्क्स २:१८-२०; लूका ५:३३-३५

१४ तबदोन्न बप्तिस्मा देना युहन्नक चेलन येशूकठे आक उहाँह पुछ्ल, "हम्म ओ फरिसीहुँक ब्रत रठी, तर अप्नक चेलन काजे ब्रत नैरट?"

१५ येशू हुँकन आहानम जवाफ देल, "दुल्हा भोजरेन्हकसँग रहदसम हुँक्र शोक कर नैपर्टन, तर उ दिन आई जब दुल्हा हुँकन्हकठेसे लैजाजहीं, तब हुँक्र ब्रत रहहीं।

### येशूक सिखाइल लौव शिक्षा सम्बन्धम

मर्क्स २:२१-२२; लूका ५:३६-३९

१६ पुरान लुगम कुई फे लौव लुगक पिउँडा नैलगाइट। यदि लगैना हो

कलसे, लौव पिउँडा मारी पैस्क पुरान लुगह खिँच्ठा त झन कर्से फटादेठा। १७ ओसहेँक, छालक पुरान थैलीम कुई फे अड्गुरिक लौव मद नैढरट। यदि ढर्ना हो कलसे, थैलीह फुटादेठा ओ अंगुरिक मद अँराजैठा। अंगुरिक ताजा मद छालक लौव थैलीम ढरपर्था, ओ थैली ओ मद दुनु जोगठा।"

### याइरसक छाई ओ बेराम महिला चोखैलक

मर्क्स ५:२१-४३; लूका ८:४०-५६

१८ येशू हुँकन यी बात कटीकटी एक जन यहूदी शासक उहाँ आपुगल। ओ येशूक पाउ पर्टी बिन्ती कर्ल, "हजूर, म्वार छाई आब भक्खर बितल, हजूर आक वाकरम आपन हाँठ ढैदेबी कलसे, ऊ जीजैने बा।" १९ येशू उठल ओ आपन चेलन्हकसँग हुँकाहार पाढ्ह लगल।

२० उह व्याला एक जन बाह्र वर्षसे रगत बहना रोग लागल महिला पाढ्हओरसे आक येशूक लुगक किनार छुली। २१ काकरकि 'येशूक लुगड केल

हुइलसे के छुवम कलसे चोखाजैम' कना  
हुँकहिन लागल रलहन।

२२येशू पाछ्वओर घुम्क हेर्ल त  
महिलह देख्ल, ओ कल, “बाबु,  
साहस करो। दुहाँर विश्वासले दुहिन  
चोखाराखला।” तबहैं उ महिला  
चोखागैली।

२३ तबदोस्र जब येशू यहूदी शासककू  
घर पुग्ल, उहाँ त शोककू बाजा  
बजुइयन ओ भीडक मनैन रुवाबासी  
करट देख्ला। २४ उहाँ हुँकन कल, “दुह्ल  
सब जन बाहार जाओ। यी बाबु मुवल  
नैहुइटी, निदाइल केल बाटी।” यी बात  
सुन्क हुँक्र उहाँह हँस्ला। २५ उहाँ भीडक  
सब मनैन बाहार निकार्क अप्न भित्तर  
गैल, ओ लैरिक हाँठ पकर्क उठेल त  
लैन्या उठगैल। २६ तबदोस्र यी बातक  
बयान साराओर फैलौल।



एकठो महिला येशूक लुगक टुप्पा छुक  
चोखैलक (९. २१)

### दुह जन आन्धर मनै चोखैलक

२७येशू उहाँसे जाइबेर दुइ जन  
आन्धर मनै “हे दाउदक सन्तान,+  
हमन दया करी” कटी उहाँक पाछ्वपाछ्व  
लग्ल।

२८येशू घरम पैठ्ल त, उ दुह जन  
आन्धर मनै के उहाँ आपुग्ल। येशू हुँकन  
कल, “का मै दुहन चोखाइ सेकम कना  
दुन्हक विश्वास बा?” हुँक्र कल, “बा,  
प्रभु!”

२९ तब येशू हुँकन्हक आँख छुक  
कल, “दुन्हक विश्वास अनुसार दुहन  
ह्वाए।” ३० तबदोस्र हुँक्र देख्ना होगैल।  
येशू हुँकन कर्का आज्ञा देल, “हेरो, यी  
बात कौनोजहन जिन बट्कैहो।” ३१ तर  
हुँक्र उहाँसे गैल त सारा इलाकम उहाँक  
करल कामक बात फैलादेल।

३२ जब उहाँहुँक्र निकर्क जाइटलह,  
तब मनै भूत्वा लाग्क लाट हुइल् एकठो  
मनैयह उहाँकठे अन्ल। ३३ येशू भूत्वह



आन्धर मनैन चोखैलक दृष्य (९. ३१)

+९:२७ - यी ख्रीष्टह संकेत करक लाग कैजिना एकठो यहूदी तरीका हो।

मत्ती ९:३४-१०:८

२४

वाकरमसे निक्रादेल त, उ लाट मनैया ब्वाल लागल। यी देखक भीडक मनै अचम्म मन्ती कह लगल, “इस्राएलम असिन बात कबु फे नैदेखौलरह।”

३४ तर फरिसी समूहक मनैजुन असिक कहलगल, “यी त भूतन्हक रज्वक शक्तिले भूतन निक्रिठा।”

### काम करुइयन डान्चे केल बाट

३५ येशू शहर-शहर ओ गाउँ-गाउँक सभाघरम शिक्षा देटी, स्वर्गक राज्यक खुशीक खबर प्रचार कर्टी ओ सब किसिमक रोगमसे मनैन चोखैटी नेझ्गल। ३६ मनैन्हक भीड देखक उहाँ द्याले भरगैल। काकरकि हुँक त चहुइया नैरहल भैरीअस हैरान ओ बेसहारा रलहा। ३७ तब उहाँ आपन चेलन कल, “सहयार पर्ना बाली धेर बा, तर काम करुइयन डान्चे केल बाट। ३८ उहओसे बालीक मालीकसे बाली सहेना कामकरुइयन पठादेहीं कैक बिन्ती करो।

### बाह्र जन चेलन्हक सेवकाई

मर्क्स ३-१३-१९; ६:७-१३; १३:१-१३;

लूक ६:१२-१६; ३:१-६; १२:२-९; २१:१२-१७

**१०** येशू आपन बाह्रजहन चेलन बलैल, ओ हुँकन भूत निक्रैना, ओ हरकिसिमक रोग लागल मनैन चोखैना अधिकार देल।

२ बाह्र जन प्रेरित हिँक्रहे हुइट - पैल्ह पत्रुस कैजिना सिमोन, ओ हुँकाहार भैया अन्द्रियास, जब्दियक छावन याकूब, ओ हुँकाहार भैया यूहन्ना, ३ फिलिप ओ बारथोलोमाइ, थोमा ओ कर उठैना मत्ती, अल्फायसक छावा याकूब, थेदियस, ४ देशभक्त दलक सिमोन, ओ यहूदा इस्करियोत, जे पाढ्य येशूह धोखा देहल।

५ येशू उ बाह्र जन चेलन असिक आज्ञा देक पठैल, “दुह अयहूदी मनैन्हकठे जिन जाओ ओ सामरीन्हक शहरम जिन पैঠो। ६ बेनसे इस्राएलीन्हकठे जाओ, जे हेराइल भैरीअस बाट। ७ ओ परमेश्वरक राज्य लग्घ आस्याकल कटी प्रचार करो। ८ बेरम्हेन चोखाओ, मुवल मनैन जियाओ, कोररोग लागल मनैन शुद्ध पारो ओ भूतन निकारो। दुह बिना मूल्यक पैलो, औरजहन फे बिना

९:३४ - मत्ती १०:२५; १२:२४; मर्क ३:२२; लूक ११:१५.

९:३५ - मत्ती ४:२३; मर्क १:३९; लूक ४:४४.

९:३६ - गन्ती २७:१७; १ राज २२:१७; २ इति १८:१६; इज ३४:५; मर्क ६:३४.

९:३७-३८ - लूक १०:२.

१०:७-१५ - लूक १०:४-१२.

मुल्यक देओ। ९ दुह स्वान, चाँदी, रुप्या-पैंसा कुछु जिन बोको। १० यात्रम झोली, फेनी लुगा, जुत्ता, या टेक्नी कुछु जिन बोको। काकरकि काम करुइयन खाइ पाइ पठा।

११ दुह गाउँ या शहरम जैबो कलसे दुहन स्वागत कर्ना मनैयह खोजो ओ उ गाउँसे नैजाइट्सम उह मनैयक घरम पलरहो। १२ दुह घरम पैँट्बो त 'दुहन शान्ति हवाए' कैक कह्हो। १३ यदि उ घरमक मनै शान्ति पैना योग्यक बाट कलसे, उहाँ शान्ति रने बा। तर यदि उ घरमक मनै योग्य नैहुइट, कलसे शान्ति दुन्हकठे घुम्क आजाई। १४ यदि कौनो घर या शहरम मनै दुहन स्वागत नैकरहीं या दुन्हक बात नैसुनहीं कलसे, उ ठाउँ छोर्क जाइबेर आपन ग्वारक धुर झराअइहो। १५ जाटीसे मै दुहन कहटुँ, न्यायक दिनम उ शहरक दशा सदोम ओ गमोरा शहरक दशासे फे कर्रा हुइहीन्। १६ हेरो भैरीन ब्वाँसन्हक बीचम पठाइअस मै दुहन पठाइटु। उहओर्से दुह साँपअस चलाक ओ दुकुरअस स्वाङ्ग होओ।

१७ मनैनसे होशियार रहो, काकरकि हुँक्र दुहन पर्कक अड्डा-अदालत लैजैहीं ओ सभाघरम कोरा लगैहीं।

१८ दुह म्वार कारण हाकिम ओ शासकन्हक आघ लैजाजैबो, उ व्याला दुह अयहूदीन्हक आघ म्वार बारेम साक्षी देहपर्ने बा। १९ तर जब दुहन पक्रैहीं, तब का बोल्ना, कसिक बोल्ना कैक चिन्ता जिन करो। उहव्याला ब्वाल पर्ना ठीक वचन दुहन देजाई। २० काकरकि बोलुइया दुह नैहुइबो, तर परमेश्वर बाबक आत्मा जो दुहद्वारा बोलहीं।

२१ मनै आपन डाडुभैयन मुवाइक लाग पक्रादेहीं, डाईबाबा आपन छाइछावन, छाइछावा आपन डाईबाबन्हक विरोधम उठहीं ओ मुवाइ लगैहीं। २२ म्वार कारणले सब जन दुहन हेल्हा करहीं। तर जे अन्तिमसम स्थिर रही, ऊ बचाजैने बा। २३ मनै दुहन एकठो शहरम सतैहीं कलसे, दुह और शहरम भागजैहो। मै जाटीसे दुहन कहटुँ, दुह इस्त्राएलक हरेक शहरम काम सेक्ल नैरबो त मै, मनैयक छावा, फेदोस आजैम।

२४ कौनो चेला आपन गुरुसे बरा नैरहट, ओ कौनो नोकर आपन मालिकसे बरा नैरहट। २५ चेला आपन गुरुअस, ओ नोकर आपन मालिकअस हुइलसे धेर हो। यदि हुँक्र मै घरमालिकह त

१०:१० - १ कोर ९:१४; १ तिसो ५:१८. १०:१४ - प्रे १३:५१. १०:१५ - मत्ती ११:२४; उत १९:२४-२८.

१०:१६ - लूक १०:३. १०:२२ - मत्ती २४:९-१३. १०:२४ - लूक ६:४०; यूह १३:१६; १५:२०.

भूतन्हक रज्वा बालजिबुल कठ कलसे,  
घरपरिवारन झन का कहीं?

२६ “उहओर्से मनैनसे जिन डराओ,  
काकरकि नुकाक ढैल सब चिज छर्लड़ग  
देखपर्ने बा, ओ गोप्यम रहल सब  
बात खुलस्त पारजैने बा। २७ ज्या  
बात मै अन्धारम कैरखु, उ सब  
बात अजाराम कैदेओ, ओ ज्या  
बात एकान्तम सुन्रख्लो, उ सब  
बात खुल्लमखुल्ला प्रचार कैदेओ।  
२८ हुँकनसे जिन डराओ जे शरीरह  
केल मुवाइ सेकठ, तर आत्मह मुवाइ  
नैसेकट। बेनसे आत्मा ओ शरीर दुनु  
नरकम नाश कर सेक्ना परमेश्वरसे  
डराओ। २९ का एक पैसम दुइठो  
गिउरा नैविकट? उह के परमेश्वर  
बाबक इच्छा बिना एकठो गिउरा के  
भुइँयम नैगिरट। ३० दुन्हक कपारीक  
भूत्ला एक-एक कैक गनगैल्बा।  
३१ उहओर्से जिनडराओ, गिउरनसे दुह  
धेर मूल्यवान बाटो।

३२ जे महीह मनैन्हक आघ स्वीकार  
करी, मै के ओहीह स्वर्गम रना आपन  
परमेश्वर बाबक आघ स्वीकार करम।  
३३ तर जे महीह मनैन्हक आघ इन्कार  
करी, मै के ओहीह स्वर्गम रना आपन  
परमेश्वर बाबक आघ इन्कार करम।

३४ मै पृथ्वीम शान्ति आनक लाग  
अइनहुँ कैक जिन सम्झो। मै त शान्ति  
आनक लाग नाहीं, तर तरवाल चलाइक  
लाग पो अइनहुँ। ३५ मै त

छावा आपन बाबक विरोध,  
छाइ आपन डाईक विरोध  
ओ पटोइह्या आपन सासूक विरोध  
कराइक लाग अइनहुँ।  
३६ मनैयक शत्रु त वाकर आपन  
घरक मनै हुइनेबाट्स।

३७ जे आपन डाईबाबह महीसे धेर  
प्रेम करी ऊ म्वार चेला हुइना योग्यक  
नैहो। ओसहँक जे आपन छाइछावह  
महीसे धेर प्रेम करी ऊ के म्वार चेला  
हुइना योग्यक नैहो। ३८ जे आपन कूस  
बोक्क म्वार पाछ्व नैलागट, ऊ म्वार  
चेला हुइना योग्यक नैहो। ३९ आपन  
जीवन बचाइ खोजुइयन जीवन गुमैहीं।  
तर म्वार पाछ्व लग्लक कारण आपन  
जीवन गुमुइयन जीवन पैहीं।

४० दुहन स्वीकार करुइयन महीह  
स्वीकार कर्ठ, ओ महीह स्वीकार

१०:२५ - मत्ती ९:३४; १२:२४; मर्क ३:२२; लूक ११:१५.

१०:३३ - २ तिमो २:१२. १०:३५-३६ - मीका ७:६.

१०:३९ - मत्ती १६:२५; मर्क ८:३५; लूक ९:२४; १७:३३; यूह १२:२५.

१०:२६ - मर्क ४:२२; लूक ८:१७.

१०:३८ - मत्ती १६:२४; मर्क ८:३५; लूक ९:२३.

करुइयन महीह पठुइयह स्वीकार कर्ठा। ४१ अगमवक्तह ‘अगमवक्ता हुइट’ कैक स्वागत कर्ना मनै अगमवक्तन्हकअस इनाम पैहीं। धर्मी मनैयह ‘धर्मी हुइट’ कैक स्वागत करुइयन धर्मी मनैन्हकअस इनाम पैहीं। ४२ जे यी छोटीसेछोटी चेलामध्ये एकजहन म्वार चेला मान्क एक गिलास जुर पानी केल हुइलसे फे पिएक लाग देहल कलसे, मै जाटीसे कहटुँ ऊ आपन इनाम अवश्य पैनेबा।”

### येशू ओ बप्तिस्मा देना यूहन्ना

लूका ७:१८-३५

**१९** आपन बाह्र जन चेलन उ बात कैक सेक्ल त येशू हुँकन्हक शहर-शहरम मनैन शिक्षा देह ओ खुशीक खबर प्रचार कर गैल।

**२ बप्तिस्मा देना यूहन्ना** इयालखानम रहल समयम येशूक करल कामक बारेम सुन्ल त, ऊ आपन चेलन येशूकठे यी बात पुछ पठैल, ३ “हमार बट्या ह्यारल खीष्ट अप्न जो हुइटी कि हम्र और केक्रो बट्या हेरी?”

४ येशू हुँकन कल, “दुह ज्या देखरख्लो ओ सुनरख्लो उ सकु बात यूहन्नकठे जाक कैदेओ। ५ आन्धर मनै देखडार्ट, नाङ्गर मनै नेड़गडार्ट, कोररोग्यन चोखाजाइट, बहिर मनै

सुन्डार्ट, मुवल मनै जीजाइट, ओ दुखी-गरीब मनै खुशीक खबर सुन पाडार्ट। ६ म्वार कारण विश्वासम पाछ्य नैहट्ना मनै आशिष पउइयन हुइट।

७ यूहन्नक चेलाहुँक गैल त, येशू मनैन यूहन्नक बारेम कल, “दुह उजार ठाउँम का ह्यार गैलहो? का बयालले हिल्ना छरीह ह्यार गैलहो? ८ नैहो कलसे, का ह्यार गैलहो त? का मजामजा लुगा घालल् मनैयह ह्यार गैलहो? मजामजा लुगा घालल् मनै त राजदरबारम रठ। ९ दुह का ह्यार गैलहो त? का अगमवक्तह ह्यार गैलहो? जाटीसे मै दुहन कहटुँ दुह अगमवक्तासे फे महान व्यक्तिह देख्लो। १० काकरकि परमेश्वरक वचनम यूहन्नक बारेम असिक लिखल बा,

‘हेरो, मै आपन दूतह दुहीनसे आघ पठैनेबाटुँ।

ऊ दुहाँर लाग डगर तयार पर्ने बा।’

११ मै जाटीसे दुहन कहटुँ, बप्तिस्मा देना यूहन्नासे महान मनै आम्हीसम जन्मल नैहुइट। तर फे स्वर्गक राज्यम जे सबसे कम महत्वक बा, ऊ यूहन्नासे फे महान हो।” १२ **बप्तिस्मा देना**

यूहन्ना प्रचार करलठेसे आबसम परमेश्वरक राज्य जोरसे आघ बहर्टी बा, ओ जबरजस्ती करुइयनजुन उहाँक राज्यम जोरसे भित्तर जैटी बाट। १३ बप्तिस्मा देना यूहन्नक पालासम सक्कु अगमवक्ताहुँक्र ओ मोशक व्यवस्था परमेश्वरक राज्यक बारेम अगमवाणी बोल्ला। १४ दुह स्वीकार कर्ठो कलसे, आइपर्ना एलिया यिह यूहन्ना हुइट। १५ ज्याकर सुन्ना कान बा, उह सुन्त।

१६ मै यी जमानक मनैन केहिसे तुलना करूँ? यी त बजारम खेल्ना छोटीछोटी लक्पिकाइस बाट, जे आपन संघरेन सोर निकार्क कठ,

१७ ‘हम्र दुन्हक लाग खुशीक बाजा  
बजादेली  
तर दुह नैनच्चो।  
हम्र विलापक गीत गैली,  
तर दुह नैरुइलो।’

१८ यूहन्ना खैनापिना नैकरँट, उह फे दुह हुँकहिन भूत लागल मनैया कलो। १९ मै, मनैयक छावा, खैटीपिटी अइनु त, दुह महीह ‘हेरो, खवस्ला, पियस्ला, कर उठुइया ओ पापीन्हक संघन्या’ कैक

दोष लगैठो। बुद्धि ठीक हो कना बात वाकर नतिजाले प्रमाणित हुइठा।”

### विश्वास नैकर्ना मनैन दण्ड बा

लूका १०:१३-१५

२० जौन-जौन शहरम येशु शक्तिशाली काम कैरखलह, उ शहरक मनै आपन मन परिवर्तन कर्ल नैरलह। उहओर्से येशु उ शहरक मनैन कर्रा बोलिले असिक कल, २१ “दुह खोराजीन ओ बेथसेदक मनैन धिक्कार बा! दुन्हक बीचम करल शक्तिशाली काम दुरोस ओ सिदोन शहरम करल रहट त उहाँक मनै आघहै भड्ग्रा ओहर्क, भुई घँस्क ओ पाप कर छोर्क आपन मन परिवर्तन कैडनेरलह।+ २२ मै दुहन कहदुँ, न्यायक दिनम दुरोस ओ सिदोन शहरक मनैन्हक दण्डसे दुन्हक दण्ड झन सह नैसेकना हुइने बा। २३ दुह कर्फन्हुमक मनै, का दुह स्वर्ग जाइ पैबी कैक सौँचरख्लो? दुह त नरकम खेद्वापैने बाटो। काकरकि दुन्हक बीचम करल शक्तिशाली काम सदोम शहरम कर्लसे, आम्हिसम उ शहर पलरने रहा। २४ उहओर्से मै दुहन कहदुँ, न्यायक दिनम सदोम शहरक

+११:२१ पाप कर छोर्क परमेश्वरकठे धुमल संकेतक रूपम उ समयम यहूदीहुँक भड्ग्रा ओहर्ना ओ भुई घँस्ना काम करँट।

११:१२ - लूक १६:१६. ११:१४ - मला ४:५; मत्ती १७:१०-१३; मर्क ९:११-१३. ११:२१ - यशो २३:१-१८; इज २६:१-२८; योए ३:४-८; आमो १:९-१०; जक ९:२-४. ११:२३ - यशो १४:१३-१५; उत १९:२४-२८.

मनैन्हक दण्डसे त टुन्हक दण्ड झन  
सह नैसेक्ना हुइने बा।”

### डट्करल मनैन आराम

लूका १०:२१-२२

२५ उ व्याला येशू कल, “परमेश्वर बाबा, स्वर्ग ओ पृथ्वीक प्रभु, मै अप्नह धन्यवाद देहटु, काकरकि बुद्धिमान ओ समझदार मनैनसे गुप्त ढरल बात अप्न कुछु नैजन्ना मनैन बुझादेली। २६ हो, परमेश्वर बाबा, काकरकि अप्नह यिह बात मजा लागल।

२७ म्वार परमेश्वर बाबा महीह सब चिजिक जिम्मा देरख्ल। परमेश्वर बाबा बाहेक मै छावह कुई फे नैचिन्हट। ओ मै परमेश्वरक छावा बाहेक परमेश्वर बाबह कुई फे नैचिन्हट। तर परमेश्वरक छावक चिन्हाइल मनैभर परमेश्वर बाबह चिन्हठ।

२८ “गम्हिर भन्वा बोक्क डट्करल मनै, म्वारठे आओ। मै दुहन आराम देहम। २९ म्वार जुवा बोको ओ महिसे सिखो, काकरकि मै दयालु ओ नम्र बाटुँ। दुह आपन आत्मम आराम पैनेबाटो। ३० हेरो, म्वार जुवा सजिलो ओ भन्वा हलुक बा।”

### बिसैना दिनिक प्रभु

मर्कुस २:२३-२८; ३:१-६; लूका ६:१-११

**१२** उ समयम येशू बिसैना गोहुँ बुइल खेत्वओर्से जाइटलह। भुँख लग्लकओर्से उहाँक चेलाहुँक गोहुँक बाला टुर्ने मिस्टी खाइलग्ल। २यी देखक फरिसीहुँक उहाँह कल, “हेरी त अप्नक चेलन बिसैना दिनम व्यवस्थक नियम अनुसार नैकरपर्ना काम करट।”

३ येशू हुँकन जवाफ देल, “दाऊद ओ हुँकाहार सङ्घरेन भुँखाइल व्याला दाऊद का कर्त्त्व, का दुह पहर्ल नैहुइटो? ४ कसिक ऊ परमेश्वरक घरम पैँठक उहाँह चहाइल रोटी आपन सङ्घरेन्हकसँग मिल्क खैलह, जबकि व्यवस्था अनुसार पूजाहारीहुँक बाहेक और कौनो जन उ रोटी खाइ नैपाजाए। ५ दुह व्यवस्थम नैपहर्ल हुइटो, मन्दिरम पूजाहारी बिसैना दिनम समेत काम कर्ठ? असिक हुँक्र बिसैना दिनिक नियमह भड्ग कर्ठ, उह के हुँक्र दोषी नैमान्जैट। ६ मै दुहन कहडुँ, मन्दिरसे बरा कौनो यिहाँ बा। ७ ‘मै बलि नाही, तर दया करल चहडुँ’ कैक परमेश्वरक कहल बात बुझलरटो कलसे निर्दोष मनैयह दोष

११:२४ - मत्ती १०:१५; लूक १०:१२.

११:२७ - यूह ३:३५; १:१८; १०:१५.

११:२९ - यर ६:१६.

१२:१ - व्य २३:२५.

१२:३-४ - १ शमू २१:१-६.

१२:४ - लेवी २४:९.

१२:५ - गन्ती २८:९-१०.

मत्ती १२:८-२३

३०

लगैने नैरलहो। ८ मै, मनैयक छावा,  
बिसैना दिनिक फे प्रभु हुइटु।”

९ उहाँसे निर्कर्क येशू हुँकन्हक  
सभाघरम गैला। १० उ ठाउँम एकठो  
हाँठ सुखल मनैया रह। फरिसीहुँक  
येशूह दोष लगैना विचारले प्रश्न  
पुछल, “बिसैना दिनम कौनो बेरम्हेन  
चोखैना ठीक हो का?”

११ येशू जवाफ देल, “बिसैना दिनम  
दुन्हकमध्ये केक्रो भैरी खटाहाम गिरल  
कलसे ओहीह बाहार नैनिक्रैटो का?  
१२ भैरीनसे त मनै धेर मूल्यवान हुइट।  
उहओर्से बिसैना दिनम मजा काम कर्ना  
ठीक हो।

१३ तबदोस्त येशू उ हाँठ सुखल मनैयह  
कल, “टुँहार हाँठ तन्काओ।” ऊ हाँठ  
तन्काइल त वाकर हाँठ चोखागैलस।  
१४ तब फरिसीहुँक सभाघरमसे निर्कर्क  
गैल ओ येशूह कसिक मुवाइ कैक  
सरसल्लाह कर लग्ल।

### परमेश्वरक न्वाजल सेवक

१५ आपन विरोधम सरसल्लाह करट  
कैक थाहाँ पैल त येशू उहाँसे गैगिल।  
धेर जन उहाँक पाछ्य लग्ल, ओ उहाँ  
आपन पाछ्य लगुइयन्हक बीचम रहल  
बेरम्हेन चोखैल। १६ तर उहाँ हुँकन  
यी विषयम कौनोजहनसे कुछु जिन  
बटोइहो कैक चेताउनी देल। १७ यी

यशैया अगमवक्ताद्वारा परमेश्वरक  
ब्वालल्वचन पूरा ह्वाए अझलक बात  
हो।

१८ “म्वार चुनल प्रिय सेवक यिह  
हुइट।

हिँकहिनसे मै धेर खुशी बाटुँ।  
हिँकाहारम मै आपन आत्मा  
खन्ह्यादेहम,

तबदोस्त यीह सब जातिक मनैन  
न्याय प्रचार करहीं।

१९ यी ना झैझग्रा करहीं, ना  
हल्लाखल्ला करहीं।

हुँकाहार चिच्यैलक गल्लीम कुइ  
फे नैसुनहीं।

२० ऊ मकाइल एकठो छरी फे  
नैटुटैहीं,  
जुगुर-जुगुर बर्ना दिया फे नैबुटैहीं,  
ओ अन्तम न्यायह नैजिताक  
नैछोरहीं।

२१ ओ सब जातिक मनै हिँकाहारम  
आपन आशा करहीं।”

### येशू ओ बालजिबुल

मर्कोस ३:२०-३०; लूका ६:४३-४५; ११:१४-२३

२२ मनै भूत लाग्क आँधर ओ लाट  
हुइल् एकठो मनैयह उहाँकठे अन्ल। येशू  
ओहीह चोखैल त, उ मनैया द्याख ओ  
ब्वाल सेक्ना हुइल्। २३ यी देखक सब

मनै छक्क पर्टी असिक कह लगल, “का  
यी दाऊदक सन्तान हुइट तो?”+

२४यी बात सुन्क फरिसीहुँक  
कल, “यी मनैया भूतन्हक रज्वा  
बालजिबुलक शक्तिले भूतन निक्रैठा।”

२५ तर येशु हुँकन्हक विचार थाहाँ  
पाक कल, “आपसम फूट रहल राज्य  
नाश हुइठा। असहेंक कौनो शहर या  
परिवारम फूट बा कलसे उ के नाश  
हुइठा। २६ यदि शैतान शैतानह निकर्ठा  
कलसे, ऊ आपनड विरोध कर्ठा। तब  
वाकर राज्य कसिक टिक सेकर्हैंस?  
२७ यदि दुह महीह भूतन्हक रज्वा  
बालजिबुलक शक्तिले भूतन निक्रैठा  
कठो कलसे, दुन्हक चेलन क्याकर  
शक्तिले निक्रैठ? उहओर्से दुन्हक आपन  
चेलाहुँक जो दुहन दोषी ठहैनेबाट।  
२८ मै बालजिबुलक शक्तिले नाहीं, तर  
परमेश्वरक शक्तिले भूतन निक्रैठ।  
असिक परमेश्वरक राज्य दुन्हक  
बीचम आरहल कना बात दुह थाहाँ  
पाइसेकठो।

२९ पैल्ह बलगर मनैयह बिना  
बहन्ल, के वाकर घरम जाक वाकर  
धनमाल लुट्सेकी? घरक बलगर  
मनैयह बहन्लसे केल उ घरह लुट  
सेकजैठा।

३० “म्वारसँग नैलगना मनैया म्वार  
विरोधी हो। जे महीह जम्मा कर  
मद्दत नैकरद, ऊ जम्मा करल फे  
छिट्काबिडिन पारदेठा। ३१ उहओर्से मै  
दुहन कहटुँ, मनैन्हक करल सब पाप ओ  
परमेश्वरक बदनाम कर्लक पाप क्षमा  
हुइसेकी, तर पवित्र आत्मक विरोधम  
बदनाम कर्लक पाप क्षमा नैहुइने हो।  
३२ कुइ मै, मनैयक छावक विरोधम  
बोली कलसे, ओहीह क्षमा देजाई, तर  
पवित्र आत्मक विरोधम बोलुइयह यी  
जुगम ओ अझना जुगम फे क्षमा नैदेजैने  
हो।

३३ “सँप्रल् फारा फरक लाग त  
रुख्वा फे सँप्रल् रह परल। रुख्वा  
सँप्रल् नैरहल कलसे फारा फे नैसँप्रदा।  
काकरकि फारमसे रुख्वा चिन्जैठा।  
३४ दुह साँपन्हक सन्तान! दुह अप्पन्हे  
दुष्ट बाटो कलसे, कसिक असल काम  
कर सेक्बो? काकरकि मनम ज्या  
रठा, उह मुहमसे निक्रैठा। ३५ मजा  
मनैया आपन मजा मनमसे मजड बात  
निक्रैठा, तर खराब मनैया आपन खराब  
मनमसे खराबड बात निक्रैठा। ३६ मै  
दुहन कहटुँ, जे बिनकामक बात बट्वाइ  
ओहिसे न्यायक दिनम एक-एक हिसाब  
लेजउइया बा।” ३७ काकरकि दुन्हक

+१२:२३ दाऊदक सन्तान: यहूदीहुक “दाऊदक सन्तान” कलसे “मनैन मुक्ति दिहक लाग आइल ख्रीष्ट” बुझाउँदा।

१२:२४ - मत्ती १:३४; १०:२५.      १२:३० - मर्क ९:४०.      १२:३२ - लूक १२:१०.

१२:३३ - मत्ती ७:२०.      १२:३४ - मत्ती ३:७; २३:३३; १५:१८; लूक ३:७.

मत्ती १२:३८-४९

३२

ब्वालल् वचनक आधारम टुळ दोषी या  
निर्दोष ठहाजैनेबाटो।”

### चिन्ह हेनर्न इच्छा

मर्कस ८:११-१२; लूका ११:२४-२६, २९-३२

३८ तबदोस्र धर्मगुरु ओ  
फरिसीहुँक्रमध्ये कौनो-कौनो कल,  
“गुरुजी, एकठो चिन्ह देखादी, हम्म  
ह्यार चाहटी।”

३९ येशु हुँकन जवाफ देल, “यी  
दुष्ट ओ व्यभिचारी जमानक मनै  
चिन्ह ह्यार खोज्ठ। यी मनैन योना  
अगमवक्तक चिन्ह बाहेक और चिन्ह  
नैदेखाजैने हो। ४० जसहेंक योना  
बराभारी मच्छ्रीक प्याटिम तीन दिन  
तीन रात रलह, ओसहेंक मै, मनैयक  
छावा, फे तीन दिन तीन रात पृथ्वीक  
प्याटिम रहने बा। ४१ न्यायक दिनम  
निनवे शहरक मनै यी जमानक मनैन  
उठ्क दोषी ठहुइयाबाट। काकरकि  
योना परमेश्वरक वचन प्रचार कर्ल  
त, हुँक्र आपन करल पापमसे मन  
परिवर्तन कैक परमेश्वरकठे घुम्ल।  
तर हेरो, योनासे महान कौनो यिहाँ  
बाट। ४२ न्यायक दिनम दक्षिण देशक  
रानी यी जमानक मनैन उठ्क दोषी  
ठहुइयाबाटी। काकरकि सोलोमन  
राजक ज्ञानगुणक बात सुनक लाग

ऊ धेर दूरसे अझलही। तर हेरो,  
सोलोमनसे महान कौनो यिहाँ बाट।

४३ “जब भूत्वा मनैयकमसे निक्रठा,  
तब ऊ आराम कर्ना ठाउँ खोज्टी जैठा,  
तर कहाँ फे नैभेटाइट। ४४ नैभेटाइट,  
ऊ ‘जहाँसे निक्रक अझनु, उहाँ घुम्क  
जाइपरल’ कैक कठा। घुम्क गैल् कलसे,  
ऊ पैल्हक घर खाली, सफासुग्घर ओ  
सजिसजाउ पारल भेटैठा। ४५ तबदोस्र  
जाक अप्ससे आउर दुष्ट-दुष्ट सातठो  
भूतन लेक अझठा, ओ भित्तर जाक उहाँ  
बास कर्ठ। उ मनैयक दशा पैल्हकसे झन  
खराब होजैठस। आजकाल्हिक दुष्ट  
मनैन्हक दशा फे ओसहें हुहीन।”

### येशूक डाई ओ भैयन

मर्कस ३:३१-३५; लूका ८:१९-२१

४६ येशु भीडक मनैनसे यी बात  
बटोइटीरहबेर, उहाँक डाई ओ भैयन  
आगैल, ओ हुँक्र उहाँसे बात बट्वाइ  
चाहैंद। ४७ तब एक जन येशूह कल,  
“गुरु, अप्सक डाई ओ भैयन अप्ससे  
बात बट्वाइक लाग बाहार अस्या  
लागटा।”

४८ येशु खबर अनुइया मनैयह कल,  
“म्वार डाई के हो, ओ म्वार भैयन  
के हुइट?” ४९ तबदोस्र आपन चेलन  
ऑल्याक कल, “हेरो, म्वार डाई ओ

१२:३८ - मत्ती १६:१; मर्क ८:११.

१२:३९ - मत्ती १६:४; मर्क ८:१२.

१२:४० - योना १:१७.

१२:४१ - योना ३:५.

१२:४२ - १ राज १०:१०-१०; २ इति ९:१-१२.

म्वार भैयन हिँकहे हुइटा। ५० काकरकि स्वर्गम रना म्वार बाबक आज्ञापालन करुइयन जो म्वार डाई, भैयन, ओ बहिनेन हुइटा।

### स्वर्गक राज्यक बारेम विभिन्न आहान बीया बुउइयक बारेम आहान

मर्कूस ४:१-१२; लूका ८:४-१०

**१३** उह दिन येशू घरमसे निकल बैस्ल। २ तबदोन्ह मनैन्हक भारी भीड उहाँक लग्ग अइल, उहओर्से उहाँ लाउम चिहुर्ल ओ मनैजुन समुद्रक किनारम ठह्यैल। ३ उहाँ मनैन आहानम धेर बात कल। उहाँ कल, “एकठो मनैया बीया ब्वाए निकल। ४ बीया बुइबेर आकुर बीया डगरिम परल, ओ चिरैचुरुड्गन आक खादेल। ५ आकुर बीया पत्थ्राहा जग्गम परल, जहाँ धेर गहिँरसम माटी नैरह। उ बीया झट्ट जामल। ६ तर मजासे जर ट्याक नैसेक्लकओर्से घामकमार उ झट्टहैं सुखौल। ७ आकुर बीया कैटाहा जग्गम परल, तर कौंट बाह्ल त, जम्ल बीया फे बाह नैस्याकल। ८ आकुर बीयाजुन मलगर जग्गम परल, ओ कौनो सय

गुणा, कौनो साठी गुणा ओ कौनो तीस गुणा फरल। ९ ज्याकर कान बा, उह सुन।”

१० चेलाहुँक उहाँकठे आक पुछल, “काकर अप्न मनैनसे बट्वाइबेर आहानम केल बट्वैठी?”

११ येशू हुँकन जवाफ देल, “टुह्न स्वर्गक राज्यक रहस्यमय बात बुझ्ना अक्किल देगैल् बा, तर हुँकन देगैल् नैहो। १२ काकरकि ज्याकरठे बा, ओहीह आकुर देजाई, ओ वाकरठे प्रशस्त हुइनेबाटस। तर ज्याकरठे नैहो वाकरठेसे रहल फे अघिन्जाई। १३ उहओर्से मै मनैन सिखाइबेर आहानम बोल्टु, काकरकि

हुँक हेर्ना त हेर्ठ, तर नैदेष्ट,  
सुन्ना त सुन्ठ, तर सुन्क फे नैबुझ्न।



बीया बुउइएक दृष्य (१३:९)

मत्ती १३:१४-२३

३४

१४ यशैया अगमवक्तक कहल वचन हुँकन्हकम द्याकक मिल्ठनः

दुह सुन्ना त सुन्ठो, तर बुझ्बो-बुझ्बो  
नैकर्टो,  
हेर्ना त हेर्टो, तर देख्बो-देख्बो  
नैकर्टो।

१५ काकरकि यी मनैन्हक मन  
भुठ्या होरलन।  
हिंकन्हक कान बहिर होरलन,  
हिंकन्हक आँख आन्धर होरलन,  
नकित हुँक्र आपन आँखिले  
देख्नेरलह,  
आपन कानले सुन्नेरलह,  
ओ आपन मनले बात बुझ्नेरलह  
ओ आपन-आपन पापमसे  
घुम्नेरलह,  
ओ मै हुँकन मुक्ति देनेरनहुँ।

१६ तर दुह आशिष पाइलमनै हुइटो,  
काकरकि दुन्हक आँख देख्ठा ओ दुन्हक  
कान सुन्ठा। १७ मै जाट्टीसे दुहन कहड़ौ,  
दुन्हक द्याखल ओ सुनल बात धेर  
अगमवक्तन ओ धर्मी मनै देख्ना ओ  
सुन्ना भारी इच्छा कैरखलह, तर  
द्याख ओ सुन नैपैल।

### आहानक अर्थ

मर्क्स ४:१३-२०; लूका ८:११-१५

१८ “आब बीया बुझ्ना आहानक अर्थ  
सुनो। १९ डगरिम परल बीया कलक  
ओसिन मनै हुइटः हुँक्र परमेश्वरक  
राज्यक बारेम वचन सुन्ना त सुन्ठ,  
तर नैबुझ्ट। तब शैतान आक हुँकन्हक  
मनम बुझ्ल् बीया अछिन्क लैजिठा।  
२० पश्चाहा जग्गम परल बीया कलक  
ओसिन मनै हुइटः हुँक्र परमेश्वरक  
राज्यक बारेम वचन सुन्टीकि खुशीसे  
स्वीकार कर्ठ। २१ तर यी वचन  
हुँकन्हक मनम गहिरसम जर द्याक  
नैपैलकओर्से, हुँक्र धेर समयसम टिक  
नैसेक्ट। परमेश्वरक वचन मन्लक  
कारण दुखकष्ट या सतावट अइटीकि  
पाछ्ह हट्जैठ। २२ कँटाहा जग्गम परल  
बीया कलक ओसिन मनै हुइटः हुँक्र  
परमेश्वरक राज्यक बारेम वचन त  
सुन्ठ, तर यी जीवनक चिन्ताफिक्री  
ओ धनसम्पत्तिक ल्वाभलालचले  
हुँकन्हकम वचनह उद्मुटादेठा।  
उहओर्से हुँकन्हकम फारा नैफरट।  
२३ मलगर जग्गम परल् बीया कलक  
ओसिन मनै हुइटः हुँक्र वचन सुन्ठ,  
बुझ्ठ ओ सय गुणा, साठी गुणा ओ  
तीस गुणा फारा फरैठ।”

### सामक बारेम आहान

२४ येशू फेदोस्त हुँकन और आहानम कल, “स्वर्गक राज्य एकठो असिन मनैयाअस हो, जे आपन खेत्वम मजा बीया बुइल्। २५ रातक सबजन सुतल व्याला मौका छोप्क वाकर शत्रु आइल ओ गोहुँ बुइल खेत्वम सामा बोक चलगैल्। २६ जब गोहुँ जाम्क बाह्ल ओ बाल लागल, तब सामा के देखपरल।

२७ “तबदोस्त घरमालिकू नोकरहुँक्र आक कल, ‘हजूर, का अप्न खेत्वम मजा बीया नैबुइलही? हेरी त, सामा कहाँसे आइल?’

२८ ऊ हुँकन कल, ‘कौनो शत्रु आक बोदेहल हुईं।’

नोकरहुँक मालिकह कल, ‘हम्र जाक उँखारदेना हो?’

२९ तर ऊ कल, ‘आब जिन उँखारो, काकरकि सामा उँखारबेर गोहुँ के उँखारजाई। ३० गोहुँ कट्ना समय नैहुइट्सम दुनु चिजह सँगसँग बाह्ल देओ। जब गोहुँ कट्ना समय आई, तब गोहुँ कटुइयन कहम, ‘पैल्ह धाँस उँखारक जराइक लाग ब्वाझा पारो, तबदोस्त गोहुँजुन जम्मा कैक बखारीम ढरो।’”

### राइक दाना ओ खमीरक बारेम आहान

मर्क्झ ४:३०-३४; लूका १३:१८-२१

३१ येशू फेदोस्त और आहान कल, “स्वर्गक राज्य राइक दानाअस हो। एकठो मनैया आपन बारीम राइ बुइठा। ३२ राइक बीया और बीयसे छुटी रठा, तर बाह्ल कलसे और सागसञ्जीसे बरा, झङ्ग्ल्यार रुख्वाअस होजैठा। ओइहेम चिरैचुरुइङ्गन आक ठाँट लगैठा।”+

३३ येशू फेदोस्त और आहान कल, “स्वर्गक राज्य खमीरअस हो। एकठो महिला दश किलो पीठम डान्चे खमीर मिलैठी ओ उ पीठा सक्कु नैफुलट्सम एकठाउँम ढर्लाठी।”

३४ येशू भीडक मनैन सब बात आहानम सिखाइँदा। उहाँ बिना आहानक हुँकन नैसिखाइँदा। ३५ असिक अगमवक्तक ब्वालल् बात पूरा हुइल्, “मै आहानम बोलम, संसारक सृष्टिसे थाहाँ नैपागैल् बात मै जनादेहमा।”

### सामक आहानक अर्थ

३६ तबदोस्त येशू मनैन छोर्क घरभित्तर गैल। उहाँक चेलन आक उहाँह कल, “हमन सामक बारेम कहल आहानक अर्थ बुझादी।”

३७ येशू कल, “मजा बीया बुउइया मै, मनैयक छावा, हुइटुँ। ३८ खेत्वा

<sup>+</sup>१३.३२ इस्राएल देशम राइक ब्वाँट बाह्ल कलसे भारी रुख्वा हुइठा।

मत्ती १३:३९-५५

३६

कलक संसार हो। मजा बीया कलक परमेश्वरक राज्यक मनै हुइट, ओ सामा कलक शैतानक मनै हुइट। ३९ सामक बीया बुउइया शत्रुजुन शैतान हो। बाली कट्ना समय कलक यी संसारक अन्त्य हुइना दिन हो, ओ बाली कटुइयनजुन स्वर्गदूतहुँक्र हुइट।

४० जसिक सामा जम्मा कैक आगीम जराजैठा, ओसहँक यी संसारक अन्त्य के हुइने बा। ४१ उ दिन मै, मनैयक छावा, आपन स्वर्गदूतन पठैम ओ हुँक्र म्वार राज्यम पाप कर्ना ओ पाप कर लगैना सबजहन जम्मा कैक ४२ आगीक भट्टीम फाँकदेहीं। हुँक्र उहाँ दुखले दाँत पिस्टी रुवाबासी कर्टीरहीं। हुँक्र उहाँ दुखले दाँत पिस्टी रुवाबासी कर्टीरहीं।

४३ तब धर्मी मनै आपन परमेश्वर बाबक राज्यम दिनअस चम्कहीं। ज्याकर कान बा, उह सुनङ।

### गारल धन ओ मोतीक बारेम आहान

४४ “स्वर्गक राज्य कौनो जग्गम गारल बहुमूल्य धनअस हो। कौनो मनैया भेटाइल कलसे, फेदोस्त भठारदेठा, ओ ऊ खुशी हुइटी जैठा ओ आपनठे रहल सक्कु सम्पत्ति बैच्क उ जग्गा किन्ठा।

४५ “स्वर्गक राज्य असल मोती खोज्ना एकठो ब्यापारीअस हो। ४६ जब ऊ बहुमूल्य मोती भेटाइल, तब आपनठे रहल सब चिज बैच्क उ मोती किनला।

### जालक बारेम आहान

४७ “स्वर्गक राज्य समुद्रम फाँकल जालअस हो, यिहिम सब किसिमक मच्छी पठ। ४८ जालम मच्छी पर्ल कलसे, मनै ओहीह ढिक्वम तन्ठ। हुँक्र बैठक मजा-मजा मच्छी भाँरम ढर्ठ, तर काम नैलग्ना मच्छी सब फाँकदेठ। ४९ यी संसारक अन्तिम दिनम अस्तै हुइने बा। स्वर्गदूतहुँक्र आक धर्मी मनैन्हक बीचमसे दुष्ट मनैन अल्गैहीं, ५० ओ आगिक भट्टीम फाँकदेहीं। हुँक्र उहाँ दुखले दाँत पिस्टी रुवाबासी कर्टीरहीं।”

५१ येशू आपन चेलन पुछ्ल, “का दुह यी सब बात बुझ्लो?” हुँक्र कल, “बुझ्ली।”

५२ उहओर्से येशू हुँकन कल, “आब स्वर्गक राज्यक शिक्षा पाइल हरेक धर्मगुरु घरक एकठो मालिकअस हो। ऊ आपन भण्डारमसे लौव ओ पुरान बहुमूल्य चिजबिज निक्रैठा।”

### आदर नैपैना अगमवक्ता

मर्कुस ६:१-६; लूका ४:१६-२०

५३ यी आहान कैक सेक्ल त येशू उहाँसे गैला। ५४ येशू आपन हुर्कलक शहरम गैला। उहाँ उ ठाउँक सभाघरम असिन शिक्षा देल, कि उहाँक शिक्षा सुन्क मनै छक्क पर्ल ओ कल, “यी मनैया असिन बुद्धि ओ अचम्मक काम कर्ना शक्ति कहाँसे पाइलहुहीं? ५५ यी

त उह सिकर्मीक छावा नैहुइट का? हिँकाहार डाईक नाउँ मरियम ओ हिँकाहार भैयन याकूब, योसेफ, सिमोन ओ यहूदा नैहुइट का? ५६ हिँकाहार बहिनेन् के हमारसँग नैरट का? तर यी मनैया असिन अचम्मक चिज कहाँसे पाइलहुर्हैं?" ५७ हुँक्र असिक कटी इन्कार कर्ल।

तर येशू हुँकन कल, "आपन गाउँधर ओ परिवारम बाहेक अगमवक्तन्हक सक्कुओर आदर हुइठा।"

५८ हुँकन्हक विश्वास नैरलक कारण येशू शक्तिक काम धेर नैकर्ल।

### बप्तिस्मा देना यूहन्नक मृत्यु

मर्कुस ६:१४-२१; लूका ९:७-९

**१४** उ समयम गालील क्षेत्रम राज्य कर्ना हेरोद येशूक करल कामक बारेम सुन्ल। १५ तबदोस्र ऊ आपन दरबारक कर्मचारीन कल, "ऊ त बप्तिस्मा देना यूहन्ना हो। ऊ मुवलमसे जीवित होगैल्। उहओर्से त ऊ असिन शक्तिशाली काम कर्ठा।"

३ पैल्ह का हुइल कलसे, आपन भैया फिलिपक गोसिन्या हेरोदियासक कारणले हेरोद यूहन्नह पर्कक इयालखानम डाररख्लह। ४ काकरकि यूहन्ना घरीघरी हेरोदह असिक कैरख्लह, "अप्न आपन भैयक

गोसिन्यह लेना ठीक नैहो।" ५ असिक कलकओर्से हेरोद हुँकहिन मुवाइक लाग रलह, तर ऊ मनैनसे डरैल, काकरकि मनै यून्ह अगमवक्ता हुइट कैक कहाँट।

६ हेरोद रज्वक जन्म दिनिक उपलक्ष्यम हेरोदियासक छाई सबजन्हक आघ नाचल। यी देखक हेरोद मोहित हुइल। ७ तबदोस्र ऊ किन्या खाक आपन छाइह कल, "टुँ ज्या मझ्ग्वो, उ टुहिन देहम।" ८ तर वाकर डाई ओहीह सिखाइल अनुसार ऊ कहल, "बप्तिस्मा देना यूहन्नक मुन्टा टथ्यम दि।" ९ यी सुन्क हेरोद एकदम दुखित हुइल। तर ओत्राधेर पहुन्हक आघ किन्या खैलकओर्से ऊ वाकर माग पूरा कर्ना हुकुम देल। १० ऊ इयालखानम यूहन्नक मुन्टा काट लगैल। ११ कटना मनैया हुँकाहार मुन्टा टथ्यम ल्यान्क उ केटीह देहल। केटीजुन लैजाक आपन डाईह देहल। १२ तबदोस्र यूहन्नक चेलन आक हुँकाहार मुवल शरीर लैजाक गर्ल, ओ जाक येशूह यी खबर देल।

### येशू पाँच हजार मनैन खैलक

मर्कुस ६:३०-४४; लूका ९:१०-१७; यूहन्ना ६:१-१४

१३ जब येशू यी बात सुन्ल, उहाँ लाउम चिहुर्क एकान्त ठाउँम गैल। मनै येशू गैल कना बात थाहाँ पैल त, हुँक

मत्ती १४:१४-२९

३८

शहर-शहरसे निकर्क उहाँक पाछ लगल।  
 १४ येशू लाउमसे उब्रवेर त मनैन्हक भीड  
 उहाँह अश्यालागटलह। हुँकन देखक  
 उहाँह स्वाग लगलन्, ओ उ ठाउम  
 आइल बेरम्हेन चोखादेल।

१५ सन्ध्या हुइल् त चेलाहुँक उहाँकठे  
 आक कल, “यिहाँ त कुछु फे नैहो,  
 सन्ध्या होस्याकल। यी मनैन बिदा दी  
 ओ हिंक गाउँम जाक खैनाचिज किन्क  
 खाइ सेकहीं।”

१६ येशू हुँकन कल, “हुँक कहों जाइ  
 नैपरट, दुह्लहे हुँकन खाइक लाग देओ।”

१७ चेलन कल, “हमारठे त पाँचठो  
 रोटी ओ दुइठो मच्छी केल बाा।”

१८ तब येशू कल, “खै रोटी ओ  
 मच्छी? म्वारठे आनो।” १९ येशू मनैन  
 दुबाहा ठाउँम बैठ लगैल, ओ पाँचठो  
 रोटी ओ दुइठो मच्छी लेक स्वर्गओर  
 हेर्टी परमेश्वरह धन्यवाद देल। तबदोस्त  
 उहाँ रोटी खन्टा-खन्टा चेलन देल। चेलाहुँक मनैन देल। २० सबजन अघा-  
 अघा खैल, ओ उब्रल टुक्रीटुक्रा उठैल त  
 बाहू छिट्वा हुइल्। २१ महिलाहुँक ओ



पाँच हजार मनै अघाअघा खैलक  
 दृष्य (१४:२१)

लकापर्का छोर्क, रोटी खउइया पुरुषहुँक  
 केल पाँच हजार रलह।

### येशू समुद्रम पानीक उप्रउप्र नेङ्गलक

मर्कुस ६:४५-५६; यूहन्ना ६:१५-२१

२२ यी काम कैक सेक्ल त येशू  
 आपन चेलन “लाउम चिहुक महीसे  
 आघ उपार जाजैहो” कैक अहैला।  
 अप्नभर मनैन बिदा करक लाग बैस्ल।  
 २३ भीडक मनैन बिदा कैक सेक्ल त उहाँ  
 अकलहे प्रार्थना करक लाग पर्वत्वम  
 गैल। रात हुइलम फे येशू अकलहे  
 उहाँ पलरलह। २४ उ ब्याला लाऊ  
 किनारसे बरे दूर पुगरलाहा। बतास  
 उल्टाओर्से चल्लकओर्से छल्का लाऊह  
 डगमगादेहटह।

२५ बिहान्नी तीन बजेओर येशू  
 समुद्रम पानीक उप्रउप्र नेङ्गटी  
 चेलन्हकठे गैल। २६ उहाँह पानीक  
 उप्रउप्र न्याङ्गट देखक हुँक डराक, “यी  
 त भूत्वा हो!” कटी चिच्यैल।

२७ तबहैं येशू हुँकन असिक कल,  
 “साँसा जिन छोरो, मै हुइदुँ जिन  
 डराओ।”

२८ यी सुन्क पत्रुस कल, “प्रभु, अप्न  
 हुइटी कलसे, महिह फे पानीक उप्रउप्र  
 नेङ्गटी अप्नकठे अइना आज्ञा दि।”

२९ येशू कल, “आओ ना त!”

पत्रुस लाऊमसे उत्रल, ओ पानीक  
उप्रउप्र नेझ्गटी येशूकठे जाइलग्ल।

३० तर बतास जोरसे चलट् देखक ऊ  
डरागैल, ओ पानीम बुर लग्ल त डरले,  
“प्रभु, महीह बचाई!” कटी चिल्लैल।

३१ येशू झट्ट हुँकहिन पकर्टी कल,  
“खै दुहाँर विश्वास, काजे शड्का  
कर्लो?”

३२ उहाँहुँक लाऊम चिहुर्ल त बतास  
फे ठम्हल्। ३३ लाऊम रहुइयन सब चेलन  
उहाँक पाउ पर्टी कल, “अप्न त जाट्टिसे  
परमेश्वरक छावा हुइटी।”

३४ उहाँहुँक उपार गनेसरेत कना  
ठाउँम गैला। ३५ जब उ ठाउँक मनै उहाँह  
चिन्ह्वल, तब आँजरपाँजर इलाक्  
मनैन खबर पठैल, ओ मनैजुन सब  
बेरम्हेन येशूकठे अन्ल। ३६ ओ हुँक  
उहाँक लुगक दुप्पा केल हुइलसे फे छुव  
पाई कैक बिन्ती कर्ल, ओ जत्रा जन  
छुल, हुँक सब जन चोखागैल।

### शुद्ध ओ अशुद्ध

मर्कुस ७:१-२३

**१५** तब कुछ फरिसी ओ  
धर्मगुरुहुँक यरूशलेम  
शहरसे येशूकठे आक कल, २ “अप्नक  
चेलावँ रीतअनुसार हाँठ बिना धुइल  
खैठ। काजे हुँक पुख्सि चल्तीआइल  
परम्परा नैमन्त?”

३ येशू हुँकन कल, “काजे दुह आपन  
परम्परा कायम करक लाग परमेश्वरक  
आज्ञह नैमन्तो? ४ परमेश्वर दुहन  
आपन डाईबाबक आदर करपर्ठा कैक  
आज्ञा नैदेरख्ल का? उहाँ दुहन आपन  
डाईबाबह सराप देहुइयन मुवादेहपर्ठा  
कैक नैकैरख्ल का? ५ तर दुह त  
मनै आपन डाईबाबह असिक कहल  
ठीक मन्ठो, ‘मै दुँहन सहायता कर  
नैसेक्लकम दुःख जिन मनहो, काकरकि  
मै दुँहन देह पर्ना चिज परमेश्वरह  
देना बाचा कैसेक्नु।’ ६ यी आपन  
डाईबाबक आदर कर्ना ठीक तरीका  
नैहो। दुह आपन परम्परा मानक लाग  
परमेश्वरक आज्ञह कुछु मतलब नैकर्टो।  
७ दुह कपटीहुँक, यशैया अगमवक्तक  
लिखल बात दुन्हकम ठ्याक्क मिल्था।  
ऊ परमेश्वरक कहल बात लिख्ल-

८ “यी मनै महीह मुहले केल आदर  
कर्ठ,



येशू समुद्रम पानीक उप्र-उप्र नेझ्लक  
दृश्य (१४.३०)

मत्ती १५:९-२५

४०

तर हुँकन्हक मन महीसे धेर दूर  
बाटन।

९ महीह करल हुँकन्हक आराधना त  
बेकार बाटन,  
काकरकि हुँक म्वार शिक्षा  
सिखाइपर्ना ठाउँम मनैन्हक  
शिक्षा सिखैठ।”

१० येशू भीडक मनैन आपनठे बलाक  
कल, “म्वार बात ध्यान देक सुनो  
ओ बुझ्ना कोसिस करो। ११ मुहओर्से  
भित्तर जैना खानाले किहुह अशुद्ध  
नैबनाइट, तर मुहओर्से बाहर निक्रना  
खराब वचनले हुँकन अशुद्ध बनैठा।”

१२ पाछ चेलावैं उहाँकठे आक कल,  
“अप्नक वचनले फरिसीन्हक चित्त  
दुखल बाटन कैक का अप्न थाहाँ  
पारख्ली?”

१३ येशू कल, “स्वर्गम रना म्वार  
बावक नैलगाइल हरेक बुट्टा उँखारजाई।  
१४ हुँकन्हक कुछु मतलब जिन करो,  
हुँक आन्धर मनैन डोन्यैना आन्धर  
अगुवन हुइट ओ हुँक सब जन खटाहम  
हर्बरुइयाबाटा।”

१५ पत्रुस उहाँह कल, “यी आहानक  
अर्थ हमन जनादी।”

१६ उहाँ कल, “का दुह आम्ही फे  
अबुझ बाटो? १७ हमार खाइल् चिज  
प्याटिम जैठा, ओ शरीरमसे निकरजैठा

+१५.२२ दाऊदक सन्तान: मत्ती १२:२३ म रहल फुटनोट हेरी।

१५:८-९ - यशी २९:१३. १५:१४ - लूक ६:३९.

कना बात का दुहन थाहाँ नैहो? १८ तर  
मुहओर्से निक्रना वचन मनमसे अइठा,  
ओ उह वचनले मनैन अशुद्ध बनैठा।  
१९ काकरकि मनमसे खराब विचार,  
हत्या, व्यभिचार, चोरी, झुट साक्षी ओ  
अपमान निक्रठा। २० मनैन अशुद्ध बनैठा  
चिज यिह हो। तर रीत अनुसार हाँठ  
बिना धुइल खैटिम मनै अशुद्ध नैहुइटा।”

### कनानी जन्नीमनैयक विश्वास

मङ्गस ७:२४-३०

२१ तब येशू ओठेसे उठ्ल, ओ दुरोसे  
ओ सीदोन शहरओर गैल। २२ उ ठाउँसे  
एकठो कनानी जन्नीमनैया अइली ओ  
चिच्यैटी कहलगली, “हे प्रभु, दाऊदक  
सन्तान, महीह दया करी। म्वार छाईह  
भूत्वा जातसे सताडारल।”+

२३ येशू ओहीह कुछु जवाफ नैदेल।  
तर उ जन्नीमनैया उहाँहुँकन्हक  
पाछ्पाछ्ल लग्लरली ओ चिच्यैटीरली।  
तब उहाँक चेलावैं अइल ओ उहाँह  
बिन्ती कर्ल, “यहीह पठादी।”

२४ उहाँ कल, “परमेश्वर महीह  
इस्माएलीन्हकठे केल पठारख्ल। हुँक  
हेराइल भैरीअस बाटा।”

२५ उ जन्नीमनैया और लग्घ अइली  
ओ येशूक पाउ पर्क कली, “हे प्रभु, महीह  
सहायता करी।”

२६ उहाँ कल, “लर्कन्हक रोटी कुकुरीन्हक आघ फँक्ना ठीक नैहो।”

२७ ऊ कली, “हो प्रभु, तर कुकुर फे त आपन मालिकन्हक खसाइल टुक्रिटुक्रा खैठ।”

२८ तब येशू हुँकहीन कल, “हेरो बाबु, दुहार विश्वास भारी बा। दुहार कहलअस ह्वाए।” तवहें हुँकाहार छाई चोखागैली।

### येशू धेर बेरम्हेन चोखैलक

२९ येशू ओठेसे गैल ओ गालील समुद्रक किनार-किनार हुइटी पर्वत्वम चिहुर्ल ओ बैठ्ल। ३० तब मनैन्हक भारी-भारी भीड नाइगर, लुल, आन्धर, लाट ओ और धेर बेरम्हेन लेक उहाँकठे अइल। हुँक्र उ सबजहन उहाँक आघ ढैदेल ओ उहाँ सबजहन चोखादेल। ३१ यिहाँसम कि, लाट मनैन ब्वालल, लुल मनैन चोखाइल, नाइगर मनैन न्याइगर, ओ आन्धर मनै देख्नाहा हुइल् देख्क सारा भीडक मनै छक्क पर्ल। ओ हुँक्र इस्राएलीन्हक परमेश्वरक प्रशंसा कर्ल।

### येशू चार हजार मनैन खैलक

मर्कुस ८:१-१०

३२ तबदोन्न येशू चेलन आपनठे बलाक कल, “यी मनै म्वारठे रहल

आज तीन दिन होसेक्लन्, ओ हिँकन्हकठे खैना चिज कुछु फे बाँकी नैहुइटन। उहओसे हिँकन देख्क महीह स्वाग लागटा। हिँकन भुँख्ल घर पठैना हो कलसे, हिँक डगरीहम मूच्छा पर फे सेकहीं।”

३३ चेलावँ उहाँह कल, “यी गाउँबस्ती नैरहल ठाउँम अत्रा धेरजन्हक लाग कहाँसे खाना जुटैना हो?”

३४ येशू हुँकन पुछ्ल, “दुन्हकठे कैठो रोटी बा?”

हुँक्र कल, “सातठो रोटी ओ डान्चे छुटी-छुटी मच्छी बाट।”

३५ उहाँ भीडक मनैन भुँझ्यम बैठ्ना आज्ञा देल। ३६ उहाँ सातठो रोटी ओ मच्छी लेक परमेश्वरह धन्यवाद चहैल। उहाँ रोटी खन्टिखन्टा पर्ल ओ चेलन देल। हुँक्र उ रोटी मनैन बाँटदेल। ३७ हुँक्र सब जन अघा-अघा खैल, ओ उब्रल् खन्टिखन्टा रोटी बरा-बरा छिट्टोक सात छिट्वा उठैल। ३८ रोटी खउइया, जन्नीमनै ओ लर्किर्का छ्वार, पुरुषहुँक्र केल चार हजार रलह। ३९ तब येशू भीडक मनैन बिदा देल,

मत्ती १६:१-११

४२

ओ अप्नजुन लाऊम चिहुर्क मगादान क्षेत्रओर गैल।

### स्वर्गक चिन्हक माग

मर्कुस ८:११-१३; लूका १२:५४-५६

**१६** एक दिन कुछ फरिसी ओ सदुकीहुँक्र येशूकठे आइल, ओ उहाँक जाँच कर्ना उदेश्यले स्वर्गसे एकठो चिन्ह देखामङ्गल।

२ उहाँ हुँकन जवाफ देल, “सन्द्याक आकाश लाल हुइल् कलसे, दुह ‘काल दिन मजा रहइया बा’ कठो। ३ तर बिहान्क आकाश लाल ओ कन्या बन्नी आइल बा कलसे, दुह ‘आज पानी अउइया बा’ कठो। दुह आकाश हेर्क मौसम कसिन हुउइया बा कना बात जन्ठो, तर आजकाल का हुइटी बा कना बात नैजन्टो। ४ दुष्ट ओ



चार हजार मनै अघाअघा खैलक  
दुष्य (१५. ३९)

व्यभिचारी मनै चिन्ह खोज्ठ, तर हुँकन अघट्टेक अगमवक्ता योनक जीवनम घटल घट्नक चिन्हबाहेक और कौनो चिन्ह नैदेजाई।”+ तबदोस्र येशू हुँकन छोर्क ओठेसे गैगिल।

### फरिसी ओ सदुकीन्हक खमीर

मर्कुस ८:१४-२१

५ चेलावँ समुद्रक उपार पुग्ल, तर हुँक खाइ पुग्ना रोटी लैजाइ बिस्तारखलह। ६ येशू हुँकन कल, “जागा रहो, फरिसी ओ सदुकीन्हक खमीरसे होशियार रहो।”

७ हुँक अप्न-अप्न बटोइल, “हमारठे रोटी नैहो, उहओसे कहुहुहीं।”

८ येशू यी बात थाँहा पाक हुँकन कल, “खै दुन्हक विश्वास! रोटी नैहो कैक दुह काकर बटवाइटो? ९ का दुह आम्ही के नैबुझ्टो? पाँच हजार मनैन पाँचठो रोटीले खवैलक बात का दुह बिस्ताडलो? तब दुह उब्रल दुक्रिटुक्रा कै छिट्वा उठेलहो? १० ओ चार हजार मनैन सातठो रोटीले खवाइबेर उब्रल दुक्रिटुक्रा कै छिट्वा उठेलहो? ११ मै रोटीक बारेम बटोइलक नैहुइटुँ। दुह काजे बात नैबुझ्टो? मै त दुहन फरिसी ओ सदुकीन्हक खमीरसे होशियार रहो

+१६.४ यी चिन्ह का रह कलसे, योना समुद्रम फँकवापैल, एकठो बरानक मञ्ची हुँकहीन लिलल, परमेश्वर तीन दिन पाढ्य उमच्छाह उन्ठी कर लगैल। यिह चिन्हक बारेम येशू बटवैल जौन चिन्हल उहाँह मृत्युह सकेत करा।

१६:१ - मत्ती १२:३८; लूक ११:१६.

१६:४ - मत्ती १२:३९; लूक ११:२९.

१६:६ - लूक १२:१.

१६:९ - मत्ती १४:१७-२१.

१६:१० - मत्ती १५:३४-३८.

पो कनहुँ।” १२ बल्ल हुँक बात बुझल, कि येशू रोटी फुलैना खमीरक बात नाहीं तर फरिसी ओ सदुकीन्हक शिक्षासे होशियार रहहो कैक बट्वाइटलह।

### पत्रुसक स्वीकार

मर्फ़िस ८:२७-३०; लूका ९:१८-२१

१३ येशू आपन चेलन्हकसँग कैसरिया फिलिप्पी कना शहरक आसपासम रहल ठाउँम पुगला। उहाँ आपन चेलन पुछल, “मनै मै मनैयक छावक बारेम बट्वाइबेर महीह ‘के हो’ कैक कठ?”

१४ हुँक जवाफ देल, “कौनो जन अप्नह ‘बप्तिस्मा देहुइया यूहन्ना हुइट’ कठ, कौनो जन ‘एलिया हुइट’ कठ, कौनो जनजुन यर्मिया या और अगमवक्तामध्ये एक जन हुइट’ कठा!”

१५ तब येशू हुँकन पुछल, “दुह जे, म्वार बारेम कह पर्लसे का कबो?”

१६ सिमोन पत्रुस जबाफ देल, “अप्न जीवित परमेश्वरक छावा ख्रीष्ट हुइटी।”

१७ येशू हुँकहीन कल, “योनक छावा सिमोन, टुँ आशिष पाइल मनैया हुइटो, काकरकि यी बात दुहिन कुई फे नैसिखाइल तर स्वर्गम रना म्वार बाबा प्रकट कैदेला। १८ मै दुहिन कहदुँ, कि टुँ पत्रुस हुइटो। मै आपन मण्डली

यिह चट्टानम बनैम, ओ ओहीह मृत्यु जित नैसेक्ने हो।+ १९ मै दुहिन स्वर्ग राज्यक द्वार खोल्ना साँचा देहम। ज्या टुँ पृथ्वीम बहन्बो, उ स्वर्गम बाहान्जाई, ओ ज्या टुँ पृथ्वीम छोबो, उ स्वर्गम छोरजाई।” २० तबदोस्त येशू अप्न मनैन मुक्ति देहुइया ख्रीष्ट रहल बात किहुह जिन कहहो कैक चेलन कर्रा आज्ञा देल।

### येशू आपन मृत्युक बारेम पैल्ह फ्यारा बटोइठ

मर्फ़िस ८:३१-९:१; लूका ९:२२-२७

२१ तबठेसे येशू अप्न भ्वागपर्ना दुखक बारेम आपन चेलनसे बट्वाइलगल। उहाँ कल, “मै यरूशलेम जैम, उहाँ अगुवन, मुख्य पुजेहोन, ओ धर्मगुरुनसे दुख पैम। मै मुवावापैम, तर तीसर दिनम फेदोस्त जीजैमा।”

२२ पत्रुस उहाँह एकओर लैजाक हप्काइलगल, “परमेश्वर असिन हुइनासे रोकही, प्रभु, अप्न असिक नैबट्वाइपर्ना रहा।”

२३ येशू पत्रुसकोर घुम्क कल, “शैतान, ओटटी जा! टैं म्वार डगरीम ठ्यास लग्ना पत्थ्रा ढर खोज्या। टैं परमेश्वरक हिसाबले नैसौँच्या, तर मनैन्हक हिसाबले सौँच्या।”

+१६.१८ येशू हुँकाहार लौव नाउँ “पत्रुस” हैदेल, ज्याकर अर्थ चट्टान हो। यिह चट्टान कलक “अप्न जीवित परमेश्वरक छावा ख्रीष्ट हुइटी।” कैक पत्रुसक करल स्वीकार हो। हुँकाहार यिह विश्वासक जगम येशू आपन मण्डली बनुइया रलह।

मत्ती १६:२४-१७:९

४४

२४ तबदोस्र येशु आपन चेलन कल, “यदि कौनो मनैया म्वार चेला हुइ चहठा कलसे, उ आपन इच्छा छ्वारपर्ठा ओ मुव पर्लसे फे इच्छुक होक आपन क्रूस ब्वाकपर्ठा ओ म्वार पाछ लागपर्ठा। २५ आपन प्राण बचाइ खोजुइया सत्य जीवन गुमाई, तर म्वार चेला हुइलक कारण आपन प्राण गुमुइया सत्य जीवन पाई। २६ संसारभरीक धनसम्पत्ति हाँठ पार्क फे, मनैया आपन प्राण गुमाइल कलसे, ओहीह का फाइदा? अथवा मनैयक प्राणसे धेर मूल्यक और कुछु चिज वा का? २७ मै मनैयक छावा आपन परमेश्वर बाबक महानताम स्वर्गदूतन्हकसँग अइम, ओ हरेक मनैयह वाकर कामअनुसारक इनाम देहम। २८ मै दुहन जाटीसे कहटुँ, कि अठे ठह्याइल कौनो-कौनो मनै मै मनैयक छावह आपन राज्यम आइल नैद्याखट्सम नैमुनेहुइट।”

### येशूक रूप परिवर्तन

मूर्क्स १:२-१३; लूका १:२८-३६

**१७** वाकर छ दिन पाछ्व पत्रुस, याकूब ओ हुँकाहार भैया

यूहन्नह येशु आपनसँग लेक पर्वतोम गैल। २ चेलावँ हेर्टीहेर्टी येशूक रूप बद्ललन्। उहाँक अनुहार दिनअस चम्कलिन, ३ ओ उहाँक लुगाजुन चहकार उज्जर हुइलन। तब एकचोटे अघटटेक अगमवत्तन एलिया<sup>+</sup> ओ मोशा येशूसे बात बट्वाइट देखपर्ल।

४ पत्रुस येशूह कल, “प्रभु, हम्र यिहाँ रलक धेर मजा हुइल्। यदि अप्न चहबी कलसे, मै यिहाँ तीनठो झाँप्री बनैम, एकठो अप्नक लाग, एकठो मोशक लाग, ओ एकठो एलियक लाग।”

५ पत्रुस बोल्टी-बोल्टी चहकार बद्री आक उहाँहुँकन छोप्लन ओ बद्रीमसे असिन आवाज आइल्, “यी म्वार प्रिय छावा हुइट। हिँकहिनसे मै धेर खुशी बाटुँ। दुह हिँकाहार कहल मनहो।”

६ यी आवाज सुन्क चेलावँ एकदम डरैल ओ घोपट्यागैल। ७ तर येशु आक हुँकन छुल ओ कल, “उठो, जिन डराओ।” ८ हुँक्र उठक हेर्ल त येशूह बाहेक और किहुह नैदेख्ल।

९ उहाँहुँक्र पर्वतोमसे ओल्हाइबेर, येशु हुँकन आज्ञा देल, “मै मनैयक छावा मुवलमसे फेदोस्र नैजीएट्सम, यी दर्शनक विषयम किहुसे जिन बटोइहो।”

<sup>+</sup>१७.३ एलिया: इस्त्राएल देशम आहाव राजा रहुल समयम एलिया अगमवत्ता सेवकाई कर्लह। उहाँक वारेम थप जानकारी पाइक लाग १ राजा १७, १८ ओ १९ अध्याय हेरी।


१६:२४ - मत्ती १०:३८; लूक १४:२७. १६:२५ - मत्ती १०:३९; लूक १७:३३; यूह १२:२५.

१६:२७ - मत्ती २५:३१; भज ६२:१२; रोम २:५. १७:१-५ - २ पत्र १:१७-१८.

१७:५ - उत २२:२; व्य १८:१५; भज २:७; यशे ४२:१; मत्ती ३:१७; १२:१८; मर्क १:११; लूक ३:२२.

१० तब चेलावँ उहाँह पुछ्छल, “ख्रीष्टसे आघ एलिया फेदोस्र संसारम आइपर्ठा कैक धर्मशिक्षकहुँक काजे कठ?”

११ उहाँ हुँकन जवाफ देल, “हो, सब चिज ठीकठाक पारक लाग, एलिया अवश्य आइपर्ठा। १२ मै दुहन कहुँदूँ, ‘एलिया फेदोस्र आरलह, तर मनै हुँकहीन नैचिन्हल ओ हुँक जसहँक मन लग्लन, हुँकहीनसे ओसहँक दुर्व्यवहार कर्ला। मै मनैयक छावह फे हुँकन्हक हाँठसे दुःखकष्ट भ्वाग परुझ्याबा।” १३ तब येशू त बप्तिस्मा देहुइया यूहन्नक बारेम बात बट्वाइट्लह कैक हुँक बुझ्ला।



येशू भूत्वा लागल लाँरह  
चोखादेल (१७. १८)

### भूत्वा लागल लाँरा चोखैलक

मर्कस १:१४-२१; लूका १:३७-४३

१४ येशू चेलन्हकसँग भीड रहल ठाउँम घुम्क अइल त, एकठो मनैया उहाँक पाउ पर्क कहल, १५ “प्रभु, म्वार छावह दया करी, मिर्गीरोग लग्लकओसे यी धेर दुख पाइटा। यी कबु आगीम, कबु पानीम पर्टीरठा। १६ मै यहीह अप्नक चेलन्हकठे अन्तु, तर हुँक यहीह चोखाइ नैसेकला।”

१७ येशू कल, “दुह कस्सिन भ्रष्ट मनै हुइटो, एक्को विश्वास नैकर्टो! मै कैह्यासम दुन्हकसँग रहम? मै कहाँसम सहुँ? ओहीह यिहाँ आनो।” १८ येशू वाकरम रहल भूत्वह हप्कैल। तब उ भूत्वा वाकरमसे निकर्क गैल् ओ उ लाँरा तबहँ चोखागैल्।

१९ पाछ चेलावँ उहाँह गुपचुपम पुछ्छल, “हम्र काजे उ भूत्वह निक्राइ नैसेक्ली?”

२० येशू हुँकन जवाफ देल, “दुन्हक विश्वास कमजोर रलक कारणले हो। जाट्टीसे मै दुहन कहुँदूँ, कि एकठो राईक दाना बराबर दुन्हक विश्वास रहट कलसे, दुह यी पर्वत्वह ‘अठेसे हट्जा’ कलसे यी हट्जैनेरह। ओ दुह ज्या फे कर सेक्ने रलहो। २१ [तर असिन किसिमक भूतन त ब्रत रहक प्रार्थना कर्लसे केल निक्राइ सेक्जैठा]”+

+१७.२१ धेर भरपर्ना ग्रीक भाषक स्रोतम यी पद नैरलकओसे यिहाँ कोष्ठम लिख्छौल वा।

मत्ती १७:२२-१८:६

४६

**येशु आपन मृत्युक बारेम  
द्वासर फ्यारा बटोइठ**

मर्क्स ८:३१-३:१; लूका ९:२२-२७

**२२** येशु आपन चेलन्हकसँग गालीलम रहल समयम हुँकन कल, “मै, मनैयक छावा, दुष्ट मनैन्हक हॉठम सुम्पवापैम। २३ हुँक्र महीह मुवहीं, तर मुलक तीसर दिनम फेदोब्र जीजैमा।” यी सुन्क चेलावँ धेर दुःखित हुइल।

**मन्दिरम तिरपर्ना कर**

**२४** येशु ओ उहाँक चेलावँ कफर्नहुमम पुल त, मन्दिरक कर उठुइयन पत्रुसकठे आक कल, “टुन्हक गुरु फे मन्दिरम तिरपर्ना कर तिठ ना, कि नैतिर्ति?”<sup>+</sup>

**२५** ऊ जवाफ देल, “तिठ जे, का नैतिरही?”

पत्रुस घरम पैँठ्ल त, येशु हुँकहीन कल, “सिमोन, यी संसारक राजाहुँक्र केहीसे कर उठैठ? आपन देशक जनतनसे कि औरजहनसे? दुहाँर विचार का बा?”

**२६** पत्रुस जवाफ देल, ‘औरजहनसे’।

येशु हुँकहीन कल, “ओसिन हो कलसे, आपन देशक जनताओँ छुट पारछल। २७ तर फे हम्र हुँकन रिस नैलगाई। दुँ समुद्रम जाक बन्सी लगाओ, ओ बन्सीम सबसे पैल्ह बाझल मच्छीक

+१७.२४ बीस वर्षी पुगल या ओहीसे धेर उमेर रहल हरेक यहुदी पुरुषहुँकन सालो मन्दिरक कर तिरपरन। उ कर एकठो कामदारक दुड़ दिनिक ज्याला बराबर रह आ उठल पैसा मन्दिर ममत कर्ना कामम खन्ने ह्वाए (प्रस्थान ३०:१३-१६; २ इतिहास २४:९-१४; नहेम्याह १०:३२)।

१७:२४ - प्रस ३०:१३; ३८:२६.      १८:१ - लूक २२:२४.

मुह खोलो। दुँ वाकर मुहम एकठो चाँदीक पैसा भेटैबो। उह पैसा लैजाक मन्दिरम दुहाँर ओ म्वार तिरपर्ना कर तिरदेओ।”

**स्वर्गक राज्यम सबसे महान्**

मर्क्स ९:३३-३७, ४२-४८; लूका ९:४६-४८; १७:१-२

**१८** उह समयम चेलावँ येशुकठे आक पुछ्ल, “स्वर्गक राज्यम सबसे महान् के हो?”

२ तब येशु एकठो लर्कह बलैल ओ ओहीह हुँकन्हक बीचम ठहेइल, ३ ओ कल, “जाटीसे मै दुहन कहदुँ, यदि दुह आपन मन परिवर्तन कैक असिन छोटी लर्काअस नैहुइबो कलसे, दुह स्वर्गक राज्यम केइ गन्या नैजैबो। ४ यी लर्ककअस अपन्हे नम्र हुउइया जो स्वर्गक राज्यम सबसे महान् हुउइया बा।

५ म्वार नाउँम असिन लर्कह स्वीकार करुइया महीह जो स्वीकार कर्ठ।

६ “म्वारम विश्वास करुइया यी छोटी लर्कामध्ये किहुह विश्वाससे जे बहकाई, वाकर घ्याँचम चक्या झुलाक गहिर समुद्रम फाँकदेनासे त, परमेश्वरसे पैना दण्ड झन डरलग्टिक हुइहींस्।

९ “धिक्कार बा यी संसारक मनैन! काकरकि हुँकन पापम फँसैना चिज धेर बा। मनैन पापम फसैना अवस्था त अइबोकर्ठा, तर औरजहन पापम फसाइ खोज्ना मनैन धिक्कार बा! १० यदि दुँहार हाँठ या ग्वारा दुहिन पाप कर लगैठा कलसे, ओहीह काट्क फॉकदेओ! काकरकि दुनु हाँठ या दुनु ग्वारा लेक नरककू नैबुट्ना आगीम फँक्वापाइलसे त, एकठो हाँठ या ग्वारा लेक स्वर्गम जैना मजा हो। ११ यदि दुँहार आँख दुँहीन पाप कर लगैठा कलसे, ओहीह निकार्क फॉकदेओ! काकरकि दुनु आँख लेक नरकम फँक्वापाइलसे त, एकठो आँख लेक स्वर्गम जैना मजा हो।

### हेराइल् भैरोक आहान

त्रुका १५:३-७

१० “होशियार रहो, यी छोटी लर्कामध्ये किहुह फे हेल्हा जिन करो। मै दुहन कहटुँ, हुँकन्हक रेखदेख कर्ना स्वर्गदूतहुँक स्वर्गम म्वार बाबक सामुन्नेम सड्डभर पलरठा! + ११ [काकरकि मै मनैयक छावा त हेराइल मनैन बचाइक लाग अइनहुँ।]†

१२ “यदि एकठो मनैयक सयठो भैरी बाट, तर एकठो हेरागैल् कलसे, ऊ

उनान्सयठो भैरीन चहनम छोर्क एकठो हेराइल् भैरोक खोजी नैकरट् का? १३ मै दुहन जाटीसे कहटुँ, यदि ऊ ओहीह भेटाइल कलसे, ऊ नैहेराइल उनान्सयठो भैरीन्हक लागसे उ भेटाइल एकठो भैरोक लाग धेर खुसी हुउइया बा। १४ असहेंक स्वर्गम रना दुन्हक बाबा यी छोटी लर्कामध्ये एकजहन फे नाश हुइल् नैचहटा।

### पाप करुइयह सम्झैना तरीका

१५ “यदि दुहाँर भैया दुहाँर विरुद्धम पाप करल कलसे, वाकरठे अवकलहे जाक ओहीह सम्झाओ। यदि ऊ दुहाँर कहल मानल कलसे, ऊ फेदोस्त दुहाँर भैया हुइल्। १६ तर यदि ऊ दुहाँर कहल नैमानल कलसे, और एक या दुइजहन सँग लैजाक ओहीह फेदोस्त सम्झाओ। काकरकि हरेक झैझगरा कम्तिम फे दुइ या तीन जन साक्षी बैठ्क मिलाइपठा। १७ यदि ऊ अत्रा कैक फे नैमानल कलसे, उ बात सारा मण्डलीम जानकारी करादेओ। यदि ऊ मण्डलीक करल निर्णय फे नैमानल कलसे, ओहीह परमेश्वरकम विश्वास नैकरुइया ओ कर उठुइया भ्रष्टाचारी मान्क छोरदेहो।

+१८:१० परमेश्वर हरेक व्यक्तिह सुरक्षा देहक लाग स्वर्गदत्तन पठेठ (भजनसंग्रह ९:११; हिन्दू १:१४)।  
†१८:११ धेर भरपर्ना ग्रीक भाषक स्रोतम यी पद नैरलकओर्से यिहाँ कोष्ठम लिख्यैल् बा।

१८:८ - मत्ती ५:३०.    १८:९ - मत्ती ५:२९.    १८:११ - लुक १९:१०.    १८:१५ - लुक १७:३.

१८:१६ - व्य १९:१५.

१८ “जाटीसे मै दुहन कहटुँ, दुहन ज्या पृथ्वीम बहन्बो, उ स्वर्गम बाहान्जाई, ओ दुह ज्या पृथ्वीम छोबों, उ स्वर्गम छोरजाई।

१९ “यी बात फे याद करो, यदि पृथ्वीम दुह दुइ जन एक्क मन होक कुछु चिज मझ्बो कलसे, स्वर्गम रना म्वार बाबा उ चिज दुहन देहर्हीं।  
२० काकरकि जहाँ दुइ कि तीन जन विश्वासीहुँक्र म्वार नाउँम जम्मा हुइठ, उहाँ मै हुँकन्हक बीचम रनुँ।”

### क्षमा देना बारेम आहान

२१ तब पत्रुस उहाँकठे आक पुछ्ल, “प्रभु, म्वार विरोधम पाप कर्ना मनैयह मै कै फ्यारासम क्षमा देहपर्ठ? सात फ्यारासम?”

२२ येशू जवाफ देल, “सात फ्यारासम केल नाहाँ, सतहत्तर गुणा सात फ्यारा!”+

२३ “स्वर्गक राज्य असिन बा: एक दिन एकठो राजा आपन नोकरचाकरहुँकनसे हिसाबकिताब लेना विचार कर्ल। २४ उ राजा हिसाबकिताब लेना क्रमम दश हजार स्वानक पैसा ऋण लेहइया एकठो ऋणी हुँकाहारठे आनगैल्। २५ तर उ मनैया ऋण तिर नैस्याकला नैस्याकल त वाकर मालिक ओहीह ‘अपन्हेह,

आपन गोसिन्यह, आपन लर्कापर्कन ओ सारा श्रीसम्पत्ति बैच्क ऋण चुक्ता कर्’ कैक हुकुम देलस्।

२६ “उ मनैया आपन मालिकक पाउ पर्क कह लागल, ‘महीह दया करी, मै अप्नक पैसा सब चुक्ता कैदेहमा’

२७ ओहीह देखक उ मालिकह स्वाग लगलन ओ ओहीह छोरदेल ओ वाकर सब ऋण मिनाहा कैदेल।

२८ “तब उ नोकर निकर्क गैल्। जैटी-जैटी ऊ आपनसँग काम कर्ना और संघरेह भेटाइल। उ संघन्या ओहीसे एक सय चाँदीक पैसा ऋण लेरखलाहा। ऊ त एकचोट्टे वाकर घाँटी पकर्क कहल, ‘म्वार पैसा तुरुन्त तिरा’

२९ “उ संघन्या वाकर पाउ पर्क कह लागल, ‘महीह दया करी, मै अप्नक पैसा सब चुक्ता कैदेहमा’

३० “तर ऊ नैमानल, ओ ऋण नैतिरट्सम ओहीह झ्यालखानम डारदेहल। ३१ उ दुनुजहनसे सँगसँग काम कर्ना और नोकरहुँक यी सब घटना देखक धेर दुखित हुइला। हुँक्र मालिककठे जाक यी सब घटना बट्वादेल।

३२ “तब मालिक उ नोकरह आपनठे बलाक कल, ‘टैं दुष्ट नोकर हुइट्या। टैं ‘महीह दया करी’ कल्या त मै ट्वार सब ऋण मिनाहा कैदेनु। ३३ मै टोहीह दया करलअस, टैं फे आपनसँग काम

+१८.२२ याकर अर्थ क्षमा देना कामक हिसाब नैकरपरट कहल हो।

कर्ना आपन संघरेह दया करपना नैरह का?’ ३४ तब वाकर मालिक रिसले चूर हुइल ओ उ नोकर सब ऋण नैतिरट्सम ओहीह इयालखानम डारदेल।

३५ “यदि दुह आपन भैयह आपन हृदयसे क्षमा नैदेबो कलसे, स्वर्गम रना म्वार बाबा फे दुहनसे अस्तै व्यवहार करुइयाबाटा!”

### छोडपत्र कर्ना बारेम शिक्षा

मर्कुस १०:१-१२

**१९** अत्रा बात बट्वाक सेकल त येशू गालीलसे यर्दन लद्यक पुरुब यहूदीया क्षेत्रओर गैल। २ मनैन्हक भारी-भारी भीड उहाँक पाछ्प-पाछ्ल लग्लन, ओ उहाँ बेरम्हेन चोखैल।

३ कुछ फरिसीहुँक उहाँकठे अइल ओ उहाँह बातबातम फँसैना उद्देश्यले एकठो बात पुछ्ल, “का कौनो मनैया जैनटैन कारण देखाक आपन गोसिनेसे छोडपत्र कर्ना ठिक हो?”

४ येशू जवाफ देल, “का सृष्टिकर्ता परमेश्वर शुरुम पुरुष ओ महिला बनैलक बात दुह पहर्क फे नैबुझ्टो? ५ उहओर्से त मनैया आपन डाई-बाबह छोर्क आपन गोसिनेसे मिल्लरठा, हुँक दुइ जन मिल्क एक हुइठ। ६ आब हुँक दुइ जन नैहुइट, तर एक हुइट। उहओर्से

परमेश्वरक मिलाइल जोहेह कुइ के अल्याइ नैपरट्ट।”

७ हुँक्र उहाँह पुछ्ल, “काजे मोशा छोडपत्र कागत लिख्क कौनो मनैया आपन गोसिनेह छ्वार सेक्ना अनुमति देरख्ल?”

८ येशू जवाफ देल, “मोशा त दुह परमेश्वरक आज्ञापालन कर इन्कार कर्लकओर्से दुहन आपन गोसिनेह छ्वार सेक्ना अनुमति देलह। तर शुरुम परमेश्वरक इच्छा ओसिन नैरलहन। ९ मै दुहन कहटुँ, कि व्यभिचार बाहेक और कारणले आपन गोसिनेह छोर्क द्वासर भ्वाज कर्ना मनैया व्यभिचार कर्ठा, [ओ छोडपत्र पाइल जन्नीमनैयह भ्वाज कर्ना मनैया फे व्यभिचार जो कर्था]।”

१० चेलावं उहाँह कल, “यदि आपन गोसिनेसे छोडपत्र कर सेकैना आधार ओत्र केल हो कलसे, काजे भ्वाज कर्ना?”

११ येशू हुँकन कल, “यी वचन सब जन स्वीकार कर नैसेक्ट, तर परमेश्वर कुछ मनैन यी वचन स्वीकार कर सेक्ना बनारख्ल। १२ भ्वाज नैकर्ना विभिन्न कारण हुइ सेक्ठा। काकरकि कत्रा जन त जर्मटिहिक नपुंसक रठ, कत्राजहन और मनै नपुंसक बनादेरख्लन, ओ

१९:४ - उत १:२७; ५:२.

१९:५ - उत २:२४.

१९:७ - व्य २४:१-४; मत्ती ५:३१.

१९:९ - मत्ती ५:३२; १ कोर ७:१०-११.

कत्रा जनजुन स्वर्ग-राज्यक लाग अपन्हे  
भ्वाज नैकर्ट। आब यी बात जे मान  
सेकठा, उह माना।”

### येशू ओ लकाँौं

मूर्खस १०:१३-१६; लूका १८:१४-१७

१३ येशू लर्कन्हकम आपन हाँठ ढैदेहीं  
ओ हुँकन्हक लाग प्रार्थना कैदेहीं कना  
विचारले, कुछ मनै आपन लर्कन उहाँके  
अन्ल। यी देख्क चेलावँ उ मनैन हप्कैल।

१४ तर येशू कल, “लर्कन म्वारठे  
आइदेओ, हुँकन जिन रोको, काकरकि  
स्वर्गक राज्य अस्त मनैन्हक लाग  
हो।” १५ येशू उ लर्कन्हक कपारीम हाँठ  
है-है आशिष देल, ओ ओठेसे गैल।



येशू लर्कन मैयाँ मन्ठ (१९.१५)

### धनी मनैया

मूर्खस १०:१७-२१; लूका १८:१८-२०

१६ एकठो मनैया उहाँकठे आक  
कहल, “गुरु, अनन्त जीवन पाइक  
लाग महीह का असल काम कर परी?”

१७ उहाँ ओहीह कल, “असल कामक  
बारेम टुँ महीह काजे पुछ्टो? असल त  
परमेश्वर केल बाट। तर यदि टुँ अनन्त  
जीवन पाइ चाहटो कलसे, उहाँक आज्ञा  
पालन करो।”

१८ उ मनैया पुछ्ल, “कौन-कौन  
आज्ञा कहटी?” येशू कल, “यिह त हो:  
हत्या नैकर्ना, व्यभिचार नैकर्ना, चोरी  
नैकर्ना, झुट साक्षी नैबक्ना, १९ आपन  
डाई-बाबक आदर कर्ना, ओ आपन  
छिमेकीन अपन्हेअस प्रेम कर्ना।”

२० उ जवान मनैया कल, “यी सब त  
मै पालन कर्टीआइलबाटुँ। और का कर  
परी?”

२१ येशू ओहीह कल, “यदि टुँ सिद्ध  
हुइ चाहटो कलसे, जाओ ओ आपन  
सबचिज बैंचक गरीबन बाँट्देओ। उ  
कर्बो कलसे, टुँ स्वर्गम धन पैबो। ओ  
आक म्वार पाछ्व लागो।”

२२ यी बात सुनल त, उ जवान मनैया  
अन्धार मुहू लगाक चलगैल। काकरकि  
ऊ आपनठे रहल धेर सम्पत्ति गुमाइ  
नैचाहल।

२३ तब येशु आपन चेलन कल, “जाटीसे मै दुहन कहुँ, धनी मनैन स्वर्गक राज्यम जैना धेर करा परहिन।

२४ वास्तवम कना हो कलसे, उँट्टोह सुइक नाखीम छिनसे त, धनी मनैन स्वर्गम जैना करा परहिन।”

२५ यी सुन्क चेलावँ अचम्म मन्टी कल, “ओसिन हो कलसे, के स्वर्ग जाइसेकी तो?”

२६ येशू हुँकन हेर्क कल, “मनैन्हक लाग यी बात सम्भव नैहो, तर परमेश्वरक लाग सब चिज सम्भव बाए।”

२७ तब पत्रुस उहाँह कल, “हेरी, हम्र त सबचिज छोर्क अप्नक पाछ्व लागरली। हम्र का पैबी तो?”

२८ येशू हुँकन कल, “जाटीसे मै दुहन कहुँ, मै, मनैयक छावा, लौव राज्यम आपन महान सिंहासनम बैठम। उ समयम दुह म्वार पाछ्व लगुइयन फे बाह्रठो सिंहासनम बैठ्बो, ओ इसाएलक बाह्र कुलक न्याय कबो। २९ म्वारम विश्वास कर्लक कारण, आपन डाङु-भैया, दिदी-बहिन्या, डाईबाबा, छाई-छावा, या जग्गाजमिन छोरुइया मनै सय गुणा धेर पैहीं, ओ अनन्त जीवन फे पैहीं। ३० तर आजकाल सबसे उच्च रहल धेर मनै पाछ्व सबसे टर्का दर्जम

रहहीं, ओ आजकाल सबसे टर्का दर्जम रहुइयन धेर मनै पाछ्व सबसे उच्च हुइहीं।”

**ज्यालादारी काम करुइयन्हक आहान**

**२०** “येशू मनैन सिखैना क्रमम कल, “स्वर्गक राज्य जग्गक एकठो मालिकअस हो। एक दिन बिहान्नी उ मालिक आपन जग्गम काम कराइक लाग ज्यालादारी मनैन ख्वाज निकल। १ ऊ हुँक्र एक दिनम पैना ज्याला तिर्ना बातम सहमति होक हुँकन आपन अंगूर बारीम काम कर पठैल।

३ “ऊ नौ बजेओर बजार गैल त, कत्रा मनैन बिनकामक ओस्तहैं ठह्याइल देख्ल। ४ ऊ हुँकन कल, ‘यदि दुह जाक म्वार अंगूर बारीम काम कैदेबो कलसे, मै दुह पाइपर्ना ज्याला दुहन देहमा।’ ५ हुँक्र कामम गैल।

ऊ बाह्र बजेओर ओ तीन बजेओर बाहार निकल ओ औरजहन फे ओसहैंक कैक कामम लगैला। ६ ऊ पाँच बजेओर बाहर निकल त औरजहन फे बिनकामक ओस्तहैं ठह्याइल देख्ल। ऊ हुँकन कल, ‘काजे दुह यिहौं बिनकामक ओस्तहैं ठह्याइल बाटो?’

७ “हुँक्र जवाफ देल, ‘हमन कुई के काम नैदेल हो।’

“ऊ हुँकन कल, ‘टुह्रे के जाक म्वार जगम औरजन्हक सँगसँग काम करो ना ता’

८ “सन्ध्या हुइल् त, उ जगक मालिक आपन काम करुइयन्हक नाइकेह कल, ‘ज्यालादारी मनैन बलाक हुँकन्हक ज्याला देओ। देहबेर पाछ आइल मनैनसे शुरु करो ओ आध आइल मनैन पाछ देहो।’

९ “हुँक सब जन अइल, पाँच बजे कामम लागल हरेक जन दिनभरीक पूरा ज्याला पैल। १० शुरुम कामम लागल मनै ‘हम्र औरजहनसे धेर पैबी’ कैक विचार कर्ल, तर हुँक के हरेक जन दिनभरीक पूरा ज्याला केल पैल। ११ ज्याला पैल त हुँक जगक मालिकक् विरोध कर्टी कल, १२ ‘पाछ आइल यी मनै एक घण्टा केल काम कर्ल, हम्रजुन दिनभर घाम मु-मु काम कर्ली। तर अप्न हुँकन के हमन देहल बराबर ज्याला देली।’

१३ “उ मालिक हुँकमध्ये एकजहन कल, “हेरी संघारी, मै अप्नह कुछु अन्याय नैकर्लहुइटुँ। का अप्न महीसे पूरा एक दिनक ज्यालम काम कर्ना बाच्चा नैकर्लही? १४ आपन पैना ज्याला लेक जाई। यी पाछ अउइयन फे मै अप्नह देहल बराबर ज्याला देह चाहटुँ। १५ का आपन मन लागल मनैयह

आपन सम्पत्ति देना म्वार अधिकार नैहो? मै हुँकन्हक भलो कर्नु त अप्नह रिस लागल कि का?

१६ उहओर्से आजकाल सबसे उच्च रहल धेर मनै पाछ सबसे टर्का दर्जम रहर्हीं, ओ आजकाल सबसे टर्का दर्जम रहुइयन धेर मनै पाछ सबसे उच्च हुर्हीं।”

### येशू आपन मृत्युक बारेम तीसर फ्यारा बटोइठ

मर्क्स १०:३२-३४; लूका १८:३१-३४

१७ यरुशलेमओर जाइबेर येशू आपन बाह्र जन चेलन एकओहँर बलाक कल, १८ “हेरो, हम्र यरुशलेम जाइटी। मै मनैयक छावा मुख्य पुजेरोन्हक ओ धर्मगुरुन्हक हाँठम सुम्प्वापैम, ओ हुँक महीह मृत्युदण्ड पाइपर्ना दोषी ठहर्हीं, १९ ओ महीह अयहूदीन्हक हाँठम सुम्पदेहीं। हुँक महीह गिल्ला करहीं, कोरा लगैहीं, ओ क्रूसम टड्गाक मुवैहीं। तर तीसर दिनम मै मुवलमसे फेदोस्र जीजैमा।”

### डाईक बिन्ती

मर्क्स १०:३५-४५

२० तबदोस्र जब्दियक गोसिन्या आपन छावन, याकूब ओ यूहन्नह लेक

येशूकठे अडली। ऊ येशूक पाउ पर्क बिन्ती कली, “महीह दया करी।”

२१ उहाँ हुँकहीन पुछ्ल, “टुहिन का चाहल?”

ऊ उहाँह कली, “अप्न राजा हुइबी त म्वार यी दुनु छावनमध्ये एकठो अप्नक दाहिन ओ और अप्नक बाँच पाऊजर बैठ पैर्हीं कना म्वार बिन्ती बा।”

२२ तर येशू जवाफ देल, “टुह का माङ्गटो उ बात टुह नैजन्टो। मै पियपर्ना दुःखक तीत घुट्का का टुह पियसेक्वो?”<sup>+</sup>

हुँक्र कल, “सेक्वी।”

२३ तब येशू हुँकन कल, “मै सहपर्ना दुःखकष्ट टुँहन फे सहहीपरी। तर म्वार दाहिन ओ बाँच पाऊजर बैठ देना म्वार अधिकारक बात नैहो। यी त ज्याकर-ज्याकर लाग तयार कैगिल बा, हुँकन्हक लाग केल हो।”

२४ यी बात सुन्क और दश चेलावँ उ दुइजहनसे रिसैल। २५ तब येशू हुँकन सबजहन एकठे बलाक कल, “टुँहन थाहाँ बा, कि अयहूदी मनैन्हकम शासन चलुइयन मनमानी शासन चलैठ, ओ ठुलाठालीहुँक्रजुन हुँकन्हकम अधिकार जमैठ। २६ तर टुह ओसिन जिन करहो। टुहमध्ये सबसे बरा हुइखोजुइया टुन्हक सेवाचान्नी कर,

२७ ओ आघ सर खोजुइया सबजन्हक कमारा बन। २८ मै, मनैयक छावह, हेरो ना। मै सेवा पाइक लाग नाहीं, तर सेवा करक लाग, ओ और धेरजहन पापक दण्डसे छुटकारा देहक लाग आपन प्राण देह आरनु।”

### दुह जन आन्धर मनै चोखैलक

मर्कुस १०:४६-५२; लूका १८:३५-४३

२९ तबदोस्र उहाँहुँक्र यरीहो शहरओसे जाइबेर, मनैन्हक भारी भीड उहाँहुँकन्हक पाल्च लागल। ३० डगरीक पञ्च आँख नैदेख्ना दुइ जन मनै बैठल रलह। हुँक्र येशू यिह डगर आइट कना सुन्ल त जोरसे चिल्लाक कहलगल, “हे प्रभु, दाऊदक सन्ताना, हमन दया करी।”



येशू आन्धर मनैन चोखैलक (२०. ३०)

<sup>+</sup>२०.२२ दुःखक तीत घुट्का पिना कलक येशू कूसम सुवेर सहपर्ना चरम यातना हो।

<sup>†</sup>२०.३० दाऊदक सन्तान: मत्ती १२:२३ म रहल फुटनोट हेरी।

मत्ती २०:३१-२१:९

५४

३१ भीडमक मनै हुँकन 'चूप लागो' कैक हप्कैल, तर हुँक झन् जोरसे चिल्लाक कहलगल, "हे प्रभु, दाऊदक सन्तान, हमन दया करी!"

३२ येशु नेङ्गटी-नेङ्गटी टक्कसे ठह्यागैल ओ हुँकन बलाक कल, "दुह का चाहटो? मै दुन्हक लाग का कैदिऊँ?"

३३ हुँक उहाँह कल, "हे प्रभु, हम्म देखनाहा हुइ चाहटी!"

३४ हुँकन देखक येशूह स्वाग लग्लन ओ उहाँ हुँकन्हक आँख छुदेल। तबहैं हुँक देखनाहा होगैल, ओ येशूक पाढ्य लागैल।

### यरुशलेमम येशूक जयजयकार

मर्कुस ११:१-११; लुका १९:२८-४१;

शुहन्ना १२:१२-११

**२१** येशु ओ उहाँक चेलावै यरुशलेमक लग्घ जैतून पर्वत्वम रहल बेथफागे कना ठाउँम पुगल। येशु दुइ जन चेलन असिक कैक आघ पठैल, <sup>२</sup>"दुह, ऊ हाउ गाउँमा जाओ। गाउँम पैँढीकि दुह एकठो गधा ओ वाकर बच्छोह बान्धल भेटैबो।

हुँकन छोर्क यिहाँ म्वारठे अनहो। <sup>३</sup>यदि कुई दुहन कुछु कही कलसे, 'प्रभुह चाहल बाटन' कहहो, त ऊ दुहन तुरुन्त आन देहुइयाबाटा!"

<sup>४</sup>असिक परमेश्वरक बाचा पूरा हुइल, काकरकि अगमवक्ता कैरखल,

<sup>५</sup>"यरुशलेमक मनैन कैदेओ,  
हेरो, दुन्हक राजा दुन्हकठे  
अझटीबाट,  
उहाँ नम्म बाट ओ एकठो गधकम  
चिहुर्क सवार कर्ठ,  
उहाँ गधक बच्छोकम चिहुर्क  
सवार कर्ठ।"

<sup>६</sup>उ दुइ चेलावै गैल, ओ येशूक अहाइल अनुसार कर्ला। <sup>७</sup>हुँक गधा ओ वाकर बच्छोह आन्क हुँकन्हक पिठारीम आपन-आपन चद्री बिछादेल, ओ उहाँ बच्छोकम चिहुर्ला। <sup>८</sup>भीडमक मनै आपन-आपन पिछौरी डग्रीम बिछैल, ओ आकुर जन झालापाता काट्क डग्रीम बिछादेल। <sup>९</sup>उहाँक आघ ओ पाढ्य लागल भीडमक मनै

चिल्ला-चिल्लाक उहाँक जयजयकार  
करलग्ल,

“दाऊदक सन्तानक+ जय हवाए!

परमप्रभुक नाउँम अउइया धन्यक  
हुइट!

स्वर्गक परमेश्वरक जय हवाए’

१० उहाँ यरूशलेमम पैँठ्ल त, सारा  
शहरम हलचल मच्चल। मनै पुछलग्ल,  
“यी के हुइट?”

११ भीडमक मनै जवाफ देल, “यी  
गालील क्षेत्रक नासरत शहरसे आइल  
एकठो अगमवक्ता, येशु हुइट।”†



येशु मन्दिर शुद्ध पर्ट (२१.१३)

## येशु मन्दिरम

मर्कोस ११:४५-५९;

तुका १३:४५-४८; यूहन्ना २:१३-२२

१२ येशु मन्दिरम पैँठ्ल ओ मन्दिरक  
अङ्गनम व्यापार कर्ना सबजहन  
उहाँसे खेदला। उहाँ पैसा सटुइयन्हक  
टेबुल ओ पन्यावाँ बैंचुइयन्हक बैठना  
बिल्टादेल। १३ उहाँ हुँकन कल, “म्वार  
घर परमेश्वरसे प्रार्थना कर्ना घर हुई’  
कैक परमेश्वरक वचनम लिखल नैहो  
का? तर टुह यहीह डाँका मर्ना ठाउँ  
बनारख्लो।”

१४ तबदोस्र आन्धर मनै ओ नाइगर  
मनै मन्दिरम येशुकठे अइल, ओ उहाँ  
हुँकन चोखैल। १५ मुख्य पुजेहोन ओ  
धर्मशिक्षकहुँक्र येशुक करल अचम्मक  
काम देखल, ओ लर्कापर्कन मन्दिरम



मनै येशुक जयजयकार करट (२१.९)

+२१.९ दाऊदक सन्तानः मत्ती १२:२३ म रहल कुटनोट हेरी।

†२१.११ गालील क्षेत्रक मनै अशिक्षित मानजाइँद, ओ हेवा पाक व्यवहार कैजाइँद।

मत्ती २१:१६-२६

५६

“दाऊदक सन्तानह<sup>+</sup> जयजयकार ह्वाए” कैक चिल्ला-चिल्लाक कहट सुन्ना। तर हुँक्र रिसैल, १६ओ येशूह कल, “हिँक्र का कहट? का अप्न नैसुन्तुइटी?”

उहाँ हुँकन कल, “सुन्टु जो। का दुह परमेश्वरक वचनम लिखल,

‘अप्न लर्कापिर्कन ओ दूध खैना लर्कन स्तुतिप्रशंसा कर सिखारख्ली’  
कना बात नैबुझ्टो?”

१७तब उहाँ शहरमसे निर्कं बेथानिया गाउँम गैल, ओ उहाँ रात रला।

### अञ्जीरक रुख्वा

मर्फ़िस ११:१२-१४, २०-२४

१८द्वासर बिहान शहरम घुमबेर, येशूह भुँख लग्लन। १९डगरीक किनारम येशू एकठो अञ्जीरक रुख्वा देखल। बौंट्याओंट्या बा कि कैक उहाँ उ रुक्खोठे गैल, तर उ रुक्खोम पत्या केल रह। तब उहाँ उ रुक्खोह कल, “आबठेसे द्वारम कबु फे फारा जिन लागस्।” ओ उ अञ्जीरक रुख्वा तबहैं सुख्लौ।

२०यी देखक चेलावँ अचम्म मन्टी कल, “यी अञ्जीरक रुख्वा अत्रा झट्ट कसिक सुख्ल?”

<sup>+</sup>२१.१५ दाऊदक सन्तान: मत्ती १२:२३ म रहल फुटनोट हेरी।

२१:१६ - भज ८:२. २१:२१ - मत्ती १७:२०; १ कोर १३:२.

२१ येशू हुँकन जवाफ देल, “जाट्टीसे मै दुहन कहटुँ, यदि दुह विश्वास कर्ठो ओ शङ्का नैकर्टो कलसे, दुह अञ्जीरक रुख्वह म्वार करलअस कर सेक्बो। ओ अत्र केल नैहोक, यी पर्वत्तोह ‘यिहाँसे उँख्क समुद्रम खस्’ कबो कलसे, दुन्हक कहलअस हुउइया बा। २२यदि दुह विश्वास कर्ठो कलसे, प्रार्थनाम ज्या मङ्गलसे फे दुह पउइयाबाटो।”

### येशूक अधिकारम शङ्का

मर्फ़िस ११:२७-३३; लूका २०:१-८

२३उहाँ मन्दिरम जाक मनैन सिखाइट्लह। तब मुख्य पुजेहोन, धर्मगुरुहुँक्र उहाँकठे आक पुछ्ल, “यी काम कर्ना अधिकार टुँ कहाँसे पैलो? दुँहीन यी अधिकार के देहल्?”

२४येशू हुँकन जवाफ देल, “मै फे दुँहन एकठो बात पुछ्टुँ, यदि दुह वाकर जवाफ देबो कलसे, मै यी अधिकार कहाँसे पैनु कैक दुँहन कहम। २५यूहन्ना बप्तिस्मा देना अधिकार कहाँसे पैल, परमेश्वरसे कि मनैनसे?”

यी सुन्क हुँक्र अप्न-अप्न बट्वाइ लग्ल, “आब हम्र का कही? परमेश्वरसे कही कलसे, ‘काकर दुह हुँकहीन विश्वास नैकर्लो त?’ कहहीं। २६मनैनसे कही कलसे, कसिक कना हो? उहाँ फे डर बा, काकरकि यूहन्नह

सब जन अगमवक्ता हुइट कैक विश्वास कर्त।”

२७ उहओर्से हुँक्र येशूह जवाफ देल,  
“हमन थाहाँ नैहो।”

उहाँ हुँकन कल, “ओसिन हो कलसे,  
मै के यी सक्कु काम कर्ना अधिकार  
कहाँसे पैनु कैक दुँहन नैकहमा।”

### दुइ भाइ छावन्हक आहान

२८ येशू कल, “मै एकठो आहान  
कहटुँ। ऊ सुन्क दुळ आपन विचार कह  
सेकठो। एकठो मनैयक दुइ भाइ छावन  
रलहन। ऊ आपन बर्का छावकठे जाक  
कल, ‘छावा, अड्गुर लगैना बारीम  
जाक आज काम करस हाँ।’

२९ ऊ जवाफ देहल, ‘मै नैजैमा।’ तर  
वाकर मन परिवर्तन हुइलस् ओ गैल्।

३० “ऊ मनैया आपन छोट्की छावह  
उह बात कल। ऊ जवाफ देहल, ‘मै जैमा।’  
तर नैगैल्।

३१ “उ दुइ भाई छावनमध्येम बाबक  
कहल के मानल?”

मुख्य पुजेहोन, धर्मगुरुहुँक्र जवाफ  
देल, “बर्का छावा।”

येशू हुँकन कल, “मै जाटीसे दुहन  
कहटुँ, कर उठुइयन ओ वेश्या काम  
करुइयन दुहनसे आघ परमेश्वरक  
राज्यम जउइयाबाट। ३२ काकरकि

बप्तिस्मा देहुइया यूहन्ना आक दुहन  
सत्य डगर देखैल, ओ दुळ हुँकहीन  
विश्वास नैकल्लो। तर कर उठुइयन  
ओ वेश्या काम करुइयन हुँकहीन  
विश्वास कर्ल। यी देख्क फे दुळ आपन  
पापी मन परिवर्तन नैकल्लो, ओ हुँकहीन  
विश्वास नैकल्लो।”

### मोहीहुँकन्हक आहान

मर्क्स १२:१-१२; लूका २०:९-११

३३ येशू कल, “आब और आहान  
सुनो। एकठो जगाधनी आपन जगम  
अड्गुर लगाक गिन्यौरसे बेन्हवा  
बेहर्ल। ऊ अड्गुर पेना कोल ओ  
अख्वारी कर्ना मचान बनैल। तब ऊ  
अड्गुरिक खेती औरजहन अध्या देल  
ओ अप्नजुन परदेश लग्ल। ३४ अड्गुर  
दुर्ना समयम जगाधनी आपन नोकरन  
आपन बठा अड्गुर लिह हुँकन्हकठे  
पठैल।

३५ “तर हुँक्र ऊ नोकरन दुर्व्यवहार  
कर्ल। हुँक्र कौनोजहन पिट्ल,  
कौनोजहन पत्थ्रले मर्ल ओ कौनोजहन  
मार्क मुवादेल। ३६ फेदोस्त जगाधनी  
पैल्हकसे धेर नोकरन हुँकन्हकठे  
पठैल। तर हुँक्र पैल्ह करलअस हुँकन फे  
ओस्तै दुर्व्यवहार कर्ल। ३७ आखिरम  
उ जगाधनी ‘भ्वार छावह त हुँक्र

पक्कहें आदर करहीं' कैक आपन छावह हुँक्न्हकठे पठैल।

३८“तर हुँक जगाधनीक छावह देखक अप्न-अप्न कल, ‘यी त हकवाला हो। ले, यहीह मुवादे, त यी सम्पत्ति हमार होजाई।’ ३९तब हुँक ओहीह घँस्यैटी अंगूर बारीसे बाहार लैगिल ओ मार्क मुवादेल।

४०येशु पुछ्ल, “आब जगाधनी अइहीं त, उ दुष्ट मनैन का करहीं?”

४१ मुख्य पुजेहोन ओ धर्मशिक्षकहुँक उहाँह जवाफ देल, “ऊ अपन्हे आक उ दुष्ट मनैन मुवैहीं, ओ ठीकसे भाग देना और मनैन उ अङ्गुर खेती अध्या देहीं।”

४२येशु हुँकन पुछ्ल, “का उह परमेश्वरक वचन पहर्क फे नैबुझ्टो?

‘घर बनुइयन रद्दी ठहाक फाँकल्  
पत्थ्रह  
परमेश्वर कोनोक सबसे मुख्य  
पत्थ्रा बनारख्ल।  
यी काम परमप्रभुसे हुइल् हो,  
ओ यी हमार नजरम अचम्मक  
बा।’

४३“उहओर्से मै दुहन कहड़, परमेश्वरक राज्य टुन्हकमसे अद्धिन्क परमेश्वरक इच्छा अनुसार चल्ना

मनैन देजाई। ४४उ पत्थ्रम खसुइयन सब जन चकनाचुर हुहीं, तर ज्याकरम उ पत्थ्रा खसी ओहीह किचुलप्वाटा पारदी।”

४५जब मुख्य पुजेहोन ओ फरिसीहुँक येशूक कहल आहान सुन्ल, तब उहाँ हुँक्न्हकके विरोधम कलह कैक हुँक बुझ्ल। ४६हुँक उहाँह पक्रना दाउ ह्यार लग्ल, तर हुँक मनैन्हक डर डरैल, काकरकि मनै येशूह एकठो अगमवक्ता मानैंद।

### भ्वाजक आहान

लूका १४:१५-२४

**२२** येशु मनैन सिखाइक लाग फेदोस्त आहान कला। २“स्वर्गक राज्य असिन बा। एकठो राजा आपन छावक भ्वाजम धेरजहन निउंता देला। ३भ्वाजक भत्यार तयार हुइल् त, उ राजा आपन नोकरन



अंगुरिक खेती करुइयन (२१. ३७)

निउंता देहेल मनैन बलाए पठैल, तर हुँक आइ नैचहल।

४ तब ऊ फेदोस्र और नोकरहुँकन असिक कैक पठैल, “जाओ ओ निउंता देहेल मनैन कहो, ‘खैना व्याला हुइल्, ठूल-ठूल नट्वन मार्क रिझारुद्दु, सबचिज ठिकठाक पारल बा। खाए आओ’।”

५ “तर निउंता पाइल मनै कुछु मतलब नैकर्ला। एकठो खेत्वम गैल्, और व्यापारम गैल्, ६ ओ बाँकी रहल मनै उ नोकरन दुर्व्यवहार कर्ल ओ मार्क मुवादेल। ७ तब राजा रिसले चूर हुइल, ओ आपन सेना पठाक उ हत्याराहुँकन मुवाइ ओ हुँकन्हक शहरम आगी लगाइ लगैल।

८ “तबदोस्र ऊ आपन नोकरहुँकन कल, ‘भ्वाजक भत्यार तयार बा, तर निउंता पाइल मनै यिहाँ अइना योग्यक नैरलह। ९ उहओर्से गल्ली-गल्लीम जाओ, ओ भेटाइल मनैन भ्वाज खाइक लाग निउंता देओ।’ १० तब उ नोकरहुँक गल्ली-गल्लीम गैल्, ओ भेटाइल सब असल ओ खराब मनैन बलाक अन्ल। ओ भोजाहा घर भरिभराउ हुइल्।

११ “राजा पहुनन् ह्यार भित्तर अइल त, एकठो मनैयह भोजाहा लुगा बिना लगैल आइल देखल। १२ राजा ओहीह

पुछ्ल, ‘संघारी, काजे टुँ भोजाहा लुगा नैलगैलो?’ तर उ मनैयकठे कुछु जवाफ नैरलहस।

१३ “तब राजा आपन सेवकहुँकन आदेश देल, ‘वाकर हाँठ-ग्वारा बाहान्क ओहीह बाहार अन्धकारम फाँकदेओ, जहाँ मनै दुखले दाँत पिस्टी रुवाबासी कर्टीरहर्हीं।’

१४ येशू कल, “निउंता पाइल मनै धेर बाट, तर चुनगैल् मनै डान्चे केल बाटा।”

### कर तिर्ना बारेम शिक्षा

मर्क्स १२:१३-१७; लूका २०:२०-२६

१५ तब फरिसीहुँक गैल ओ येशूह बातबातम फसैना जाल जोर्ल। १६ हुँक आपन कुछु चेलन ओ हेरोदक कुछु मनैन येशूकठे असिक कह पठैल, “गुरुजी, अप्न इमान्दार बाटी कना हमन थाहाँ बा। अप्न परमेश्वरक सत्य बात ठीकसे सिखैठी ओ मनै का कहर्हीं कना मतलब फे नैकर्टी, काकरकि अप्न केक्रो पक्षपात नैकर्टी। १७ आब हमन कही, रोमी सरकारह कर तिर्ना ठीक हो कि नाही?”+

१८ येशू हुँकन्हक दुष्ट विचार थाहाँ पाक कल, “दुह कपटी मनै, दुह छ्ल कैक काकर महीह फँसाइ ख्वाजटो? १९ कर तिर्ना पैसा महीह देखाओ ता।” हुँक एकठो पैसा आन्क उहाँह देल।

+२२.१७ यी पदक शास्त्रिक अनुवाद: आब हमन कही, कैसरह कर तिर्ना ठीक हो कि नाही?

मत्ती २२:२०-३५

६०

२० येशु हुँकन पुछ्ल, “यी छाप ओ नाँ  
क्याकर हो?”

२१ हुँक येशु कल, “रोमी  
सरकारका”

तब येशु हुँकन कल, “ओसिन हो  
कलसे, सरकारक चिज सरकारह, ओ  
परमेश्वरक चिज परमेश्वरह देओ।”

२२ हुँक उहाँक बात सुन्क छक्क पर्ल,  
ओ आपन डगर लग्ल।

### मुवलमसे फेदोस्त जीक भ्वाज कर्ना बारेम शिक्षा

मर्क्स १२:१८-२७; लूका २०:२७-४०

२३ ‘मनै मुलसे फेदोस्त नैजीट’  
कहुइया सदुकी समूहक कौनो-कौनो  
मनै उह दिन येशुकठे आक पुछ्ल,  
२४ “गुरुजी, मोशा हमन परमेश्वरक  
असिन व्यवस्था देरख्ल: यदि कौनो  
मनैया सन्तान बिना जर्मैल मुवल  
कलसे, वाकर भैया भौजाइ जन्नी  
लिह ओ आपन डाङुक लाग सन्तान  
जर्माए। २५ एकठो परिवारम सात भाइ  
रलह। बर्का भ्वाज करल, तर सन्तान  
बिना जर्मैल मुगैल। तब मन्हला आपन  
भौजीह लिहेल, २६ उ के सन्तान बिना  
जर्मैल मुगैल। सन्हलक फे ओस्तै  
हुइलस्। ओसिक करट-करट हुँक  
सकु भाइ ओहीह लेल, तर सन्तान  
बिना जन्मैल मुगैल। २७ अन्तिमम उ

जन्नीमनैया फे मुगैल। २८ आब कही,  
मुवलमसे हुँक फेदोस्त जिहीं ओ स्वर्ग  
जैहीं कलसे, उ क्याकर गोसिन्या हुई?  
काकरकि सकु भैयनसे वाकर भ्वाज  
होरलहस्।”

२९ येशु हुँकन जवाफ देल, “दुह बात  
नैबुझ्ना कारण का हो कलसे, दुह ना त  
परमेश्वरक वचन जन्टो ना त उहाँक

शक्ति थाहाँ पैटो। ३० काकरकि मनै  
मुवलमसे फेदोस्त जीलसे, भ्वाजकाज  
कर्ना त बात नैहुझ्ने हो। स्वर्गम हुँक  
भ्वाज नैकर्ना स्वर्गदूतअस होजैठ।

३१ मुवलमसे फेदोस्त जीना विषयम  
परमेश्वरक कहल बात दुह पर्हक  
फे नैजन्टो का? ३२ उहाँ कल, ‘मै  
दुन्हक पूर्खन्हक परमेश्वर हुइटुँ,  
अब्राहामक, इसाहाक्क ओ याकूबक  
परमेश्वर हुइटुँ।’ परमेश्वर मुवल  
मनैन्हक नाहीं, तर जीटीह रहुइयन्हक  
परमेश्वर हुइटा।”

३३ उहाँक बात सुन्क भीडक मनै  
छक्क पर्ल।

### सबसे महान् आज्ञा

मर्क्स १२:२८-३४; लूका १०:२५-२८

३४ येशु सदुकीहुँकन चूप लगैल कैक  
फरिसीहुँक सुन्ल त, हुँक एक गुट होक  
उहाँकठे अइल। ३५ हुँकमध्ये एक जन  
धर्मगुरु उहाँह फसैना विचारले पुछ्ल,

३६ “गुरुजी, परमेश्वरक व्यवस्थम रहल सबसे महान् आज्ञा कौन हो?”

३७ येशू जवाफ देल, “परमप्रभु आपन परमेश्वरह आपन सारा हृदयले, सारा प्राणले, ओ सारा मनले प्रेम करस्। ३८ सबसे मुख्य ओ महत्वपूर्ण आज्ञा यिह हो। ३९ द्वासर आज्ञा फे अस्तै बा, आपन छिमेकीह अपन्हेहअस प्रेम करस्। ४० सारा व्यवस्था ओ अगमवक्तन्हक शिक्षा यिह दुइठो आज्ञम आधारित बा।”

### ख्रीष्ट क्याकर सन्तान हुइट?

मर्कुस १२:३५-३७; लूका २०:४१-४४

४१ येशू एक गुट होक आइल फरिसीन पुछ्ल, ४२ “ख्रीष्टक बारेम दुन्हक विचार का बा? ऊ क्याकर सन्तान हुइट?”

हुँक्र उहाँह कल, “दाऊदक सन्तान।”+ ४३ उहाँ हुँकन कल, “ओसिन हो कलसे, काजे दाऊदह परमेश्वरक आत्मा ख्रीष्टह ‘प्रभु’ कैक कह लगैल? दाऊद कल,

४४ ‘परमप्रभु म्वार प्रभुह कल,

“मै टुँहार शत्रुन  
टुँहार पौलिक टर नैपारट्सम,  
म्वार दाहिन पाज्जर बैठ्लरहो।”

४५ दाऊद अपन्हे ख्रीष्टह ‘प्रभु’ कठ कलसे, ख्रीष्ट कसिक दाऊदक सन्तान केल हुइल?” ४६ कुई फे जवाफ देह नैसेकल, ओ उ दिनठेसे उहाँह प्रश्न पुछ्ना आँट के कुई नैकर्ला।

### धर्मशिक्षक ओ फरिसीहुँकन धिक्कार

मर्कुस १२:३८-४०; लूका ११:३९-४२; २०:४५-४७

**२३** तब येशू भीडक मनैन ओ आपन चेलन कल, २ “धर्मशिक्षकहुँक्र ओ फरिसीहुँक्र मोशक व्यवस्था सिखैना अधिकार पाररख्ला। ३ उहओर्से दुह हुँकन्हक कहल सब बात मानपर्ठा, तर हुँकन्हक व्यवहारक नक्कल जिन करो, काकरकि हुँक्र औरजहन सिखैना त सिखैठ, तर हुँक्र अप्न आपन सिखाइल अनुसार नैचल्टा। ४ हुँक्र धर्मकर्मक उठाई नैसेकना भन्वा मनैन बोकैठ,

+२२.४२ दाऊदक सन्तान: मत्ती १२:२३ म रहल फुटनोट हेरी।

मत्ती २३:५-१३

६२

तर अप्नभर, उ भन्वा उठाइक लाग  
एकठो अङ्ग्रीले फे नैछुट।

५ “हुँक्र ज्या काम कर्ठ, मनैन देखाइक  
लाग केल कर्ठ। हुँक्र आपन लिल्हार  
ओ पख्रम बहन्ना व्यवस्था-पत्री+ बरा-  
बरा बनैठ, ओ अपन्हेह धर्मी देखाइक  
लाग आपन लुगक झब्राठ फे नम्मा-  
नम्मा बनैठ। ६ हुँक्र भ्वाजभत्यारम  
ओ सभाघरम मुख्य-मुख्य आसनम  
बैठ खोज्ठ, ७ ओ बजारम मनै हुँकन  
'नमस्कार' करल ओ 'गुरु' कहल चहठ।

८ “तर दुहन कुई फे 'गुरु' जिन कह,  
काकरकि दुन्हक 'गुरु' त एकठो बाट,  
ओ दुह सब जन दादुभाईअस बराबर  
बाटो। ९ पृथ्वीम किहुह फे 'बाबा'  
जिन कहो, काकरकि स्वर्गम रहुइया



मन्दिरक पूजाहारी (२३.७)

लिल्हारम बाँधल व्यवस्था  
पत्री (२३.४)

परमेश्वर केल दुन्हक 'आत्मिक बाबा'  
हुइट। १० दुहन कुई फे 'अगुवा' जिन  
कह, काकरकि दुन्हक एकठो 'अगुवा'  
ख्रीष्ट जो हुइट। ११ दुहमध्ये सबसे  
बरा हुइखोजुइया दुन्हक सेवाचाक्री  
कर। १२ अपन्हेह सबसे महान सम्ज्ञना  
मनैया सबसे छुटी हुई, ओ अपन्हेह  
सबसे छुटी सम्ज्ञना मनैया सबसे महान  
हुई।

१३ “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
स्वर्गक राज्यक द्वारीम दुह ताल्चा  
लगारख्लो। दुह अपन्हे फे भित्तर  
नैजैटो ओ और जैना मनैन फे जाइ  
नैदेटो।”

+२३.५ व्यवस्था-पत्री: व्यवस्था-पत्री छालक दुर्लिमिटि बाकसअस चिज रह। उहीम पुरान नियमक मुख्य मुख्य पद लिखल  
रह। यदूरीहुक विशेष कैक प्रार्थना करवेर पख्रम या लिल्हारिम व्यवस्था-पत्री बाँधदै।

†२३.५ लुगक झब्राठ: वाहिरी लुगम रना लुगक झब्रा सादा या रंगित रह ओ मोशक व्यवस्था अनुसार इस्त्राएली पुरुषहुँक ओसिन  
लुगा लगाइट।

२३:५ - मत्ती ६:१; गन्ती १५:३८; व्य ६:८.      २३:११ - मत्ती २०:२६-२७; मर्क ९:३५; लूक २२:२६.

२३:१२ - लूक १४:११; १८:१४.

[१४] “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
दुह विधवन्हक घरबार लुट्ठो, तर दुह  
अपन्हेह धर्मी देखाइक लाग भर नम्मा-  
नम्मा प्रार्थना कर्लक बहाना बनैठो।  
उहओसे दुह ज्ञन धेर दण्ड पैबो।]+

१५ “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
दुह एकठो मनैयह आपन धर्मम आनक  
लाग संसारभर चहर्ठो, ओ यदि कौनो  
मनैया आगैल्कलसे, दुह ओहीह आपनसे  
दोब्बर नरकक् योग्यक बनैठो।

१६ “दुह आन्धर अगुवन धिक्कार  
बा! दुह ‘मन्दिर छुक किन्या खैलसे  
कुछु नैहुइट, तर मन्दिरक स्वान  
छुक किन्या खैलसे किन्या लगठा’  
कैक सिखैठो। १७ दुह कसिन मूर्ख कि  
आन्धर बाटो! कौन धेर महत्वपूर्ण हो:  
स्वान कि स्वानह शुद्ध पर्ना मन्दिर?  
१८ दुह ‘वेदी छुक किन्या खैलसे कुछु  
नैहुइट, तर वेदीम चहाइल भेटी छुक  
किन्या खैलसे किन्या लगठा’ कैक  
फे सिखैठो। १९ दुह कसिन आन्धर  
बाटो! कौन धेर महत्वपूर्ण हो: भेटी  
कि भेटीह शुद्ध पर्ना वेदी? २० वेदी  
छुक किन्या खउइया वेदी ओ उहींम  
चहाइल सब भेटी छुक किन्या खैठा।  
२१ ओसहेंक मन्दिर छुक किन्या  
खउइया मन्दिर ओ मन्दिरम रना

परमेश्वरह छु-छुक किन्या खैठा।  
२२ ओ स्वर्गक नाउँ लेक किन्या  
खउइया परमेश्वरक सिंहासनक ओ  
उहींम बैठना परमेश्वरक नाउँम  
किन्या खैठा।

२३ “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
दुह पुदीना, सूप ओ जीराजसिन कम  
महत्वपूर्ण चिजिक फे दश भागक एक  
भाग परमेश्वरह चहैठो। तर व्यवस्थम  
रहल न्याय, दया ओ विश्वास जसिन  
धेर महत्वपूर्ण बातक कुछु मतलब  
नैकर्टो। दुह कम महत्वपूर्ण ओ धेर  
महत्वपूर्ण सब बात मान पठा। २४ दुह  
आन्धर अगुवन हुइटो। दुह भुसना  
लिलक डर पानी छन्ठो, तर ऊँटोहजुन  
लिलडर्ठो!

२५ “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
दुह भाँरावर्तन उप्रउप्र त मिस्ठो, तर<sup>२५</sup>  
दुन्हक भित्तरजुन ल्वाभ ओ दुष्टताले  
भरल रठा। २६ आन्धर फरिसीहुँक्र!  
पैल्ह दुन्हक भित्रि भाग सफा करो, ओ  
वाकर बाहर फे सफा हुइपठा।

२७ “दुह धर्मशिक्षक ओ फरिसीहुँकन  
धिक्कार बा! दुह कपटी बाटो! काकरकि  
दुह त चून लगाइल गन्याअस  
बाटो, जौन गन्या बाहारसे त एकदम  
मजा देखपठा, तर भित्तरजुन मुवल

+२३.१४ धेर भरपर्ना ग्रीक भाषक स्रोतम यी पद नैरलकओसे यिहाँ कोष्ठम लिखौलू बा।

मत्ती २३:२८-२४:२

६४

मनैन्हक हड्डी ओ अशुद्ध चिजले भरल रठा। २८ ओसहँक बाहरसे ह्यारबेर दुह मनैन्हक सामुन्ने धर्मीअस देखपठो, तर दुन्हक भित्तरजुन कपट ओ दुष्टताले भरल रठा।

२९ “दुह धर्मशिक्षक ओ फरिसीहुँकन धिक्कार बा! दुह कपटी बाटो! काकरकि दुह आपन पुर्खन्हक मुवाइल अगमवक्तन्हक गन्या सजिसजाउ बनैठो ओ आपन पुर्खन्हक मुवाइल धर्मी जन हुँकन्हक सम्झनम मजामजा गन्या बनैठो। ३० दुह कठो, ‘अघट्टे हम्र आपन पुर्खन्हकसँग रटी कलसे, अगमवक्तन मुवैना हुँकन्हक कामम सहमत नैहुइनेरलही।’ ३१ असिक अप्न अगमवक्तन्हक हत्या करुइयन्हक सन्तान रहल बातक प्रमाण दुह अपन्हे देठो। ३२ आपन पुर्खन्हक शुरु करल पाप काम पूरा करो।

३३ “दुह साँप हुइटो साँप! विषाहा साँपन्हक सन्तान! दुह नरकक दण्डसे कसिक उम्क सेक्को? ३४ उहओर्से मै दुन्हकठे अगमवक्तन, बुद्धिमान मनैन ओ धर्मशिक्षकहुँकन पठैबै। दुह हुँक्रमध्ये कत्राजहन मुवैबो, कत्राजहन कूसम टङ्गाक मुवैबो, ओ कत्राजहन सभाघरम कोरा लगैबो ओ शहर-शहरम सँतैबो। ३५ निर्दोष

हाबिलक हत्याठेसे लेक मन्दिर ओ बेदीक बीचम मुवागैल् जकरियासम्मक (ऊ बेरेक्याहक छावा रलह) रगतक सब दोष दुन्हक कपारीम परी। ३६ जाट्टीसे मै दुहन कहदुँ, यी दण्ड आजकाल्हीक मनैन्हक कपारीम परी।

३७ “यरुशलेम शहरक मनै, परमेश्वरक अगमवक्तन मुवैना ओ उहाँक पठाइल सन्देशवाहकहुँकन पथ्थले मार्क मुवैना मनै दुह हुइटो। मुर्धिन्या चिङ्नीन छवापअस, मै घरीघरी दुँहन जम्मा कैक सुरक्षा देह चहनु, तर दुह नैमन्लो। ३८ हेरो, दुन्हक शहर उजार हुउइया बा। ३९ मै दुँहन कहदुँ, दुह ‘परमेश्वरक नाउम आइल मनैयक प्रशंसा हवाए’ कैक नैकहट्सम दुह महीह फेदोस नैदेखेहुइटो।”

### अन्तिम दिनिक चिन्ह

मर्फिस १३:१-३७; लूका २१:५-४८

**२४** तबदोस्त येशू मन्दिरमसे निर्क जाइबेर उहाँक चेलावै उहाँह मजामजा पथ्थले बनल मन्दिर देखाए अझल। १ येशू हुँकन कल, “दुह यी दरवार द्याखटो ना! जाट्टीसे मै दुहन कहदुँ, एक पथ्थक

उपर और पत्था रह नैदेक सब ध्वस्त बनाजाई।”

<sup>३</sup> येशू जैतून पर्वत्वम रहबेर उहाँक चेलावँ एकान्तम उहाँकठे आक पुछ्ल, “कही गुरु, यी घट्ना कैह्या हुई, अप्न फेदोस्र अइना ओ यी संसारक अन्त्य हुइना चिन्ह का रही?”

<sup>४</sup> तब येशू हुँकन जवाफ देल, “होशियार रहो, त दुह ध्वाखा नैपैबो। <sup>५</sup> काकरकि धेर जन ‘ख्रीष्ट मैहे हुइदुँ’ कैक दाबी कर्टी अइहीं, ओ धेरजहन भ्रमम परहीं। <sup>६</sup> जब दुह घमासान लडाई ओ हूलदंगा सुन्बो, तब जिन डरैहो। यी त हुइही परी, तर संसारक अन्त्यभर तबहैं नैहुई। <sup>७</sup> काकरकि जातिक विरोधम जाति, ओ राज्यक विरोधम राज्य उठी। जहौरतहौर अनिकाल परी ओ भुइँचाल आई। <sup>८</sup> यी सब त दुखक शुरू केल हो।

<sup>९</sup> “तब मनै दुहन पक्रहीं ओ सजाय देहक लाग लैजहीं, ओ दुहन मुवाइ फे सेकही। दुह म्वारम विश्वास कलर्क कारण सब जातिक मनै दुहन हेल्हा करहीं। <sup>१०</sup> धेर जन विश्वासमसे पाछ्ह हट्जैहीं। हुँक एक औरजहन ध्वाखा देहीं ओ हेल्हा करहीं। <sup>११</sup> धेर झूटा अगमवक्तन अइहीं, ओ धेरजहन छल

करहीं। <sup>१२</sup> जहौरतहौर पापक बिगविगी रही ओ धेरजन्हक प्रेम जुर होजहीन। <sup>१३</sup> तर आखिरीसम विश्वासम पलरना मनै बचाजैहीं। <sup>१४</sup> स्वर्गक राज्यक बारेम खुशीक खबर सारा संसारम प्रचार कैजाई, ताकि हरेक जातिक मनै सुन्ना मौका पैहीं, तबदोस्र संसारक अन्त्य हुई।

<sup>१५</sup> “उहओर्से जब दुह, दानियल+ अगमवक्तक ब्वालल् वचन अनुसार, नाश करुइया घिनलगिटक दुष्टह पवित्र ठाउँम ठह्याइल देख्बो (पहुइया बुझ), <sup>१६</sup> तब यहूदियाम रहुइयन पर्वत्तोओर भगहीं। <sup>१७</sup> घरक छतम रहुइयन सरसामान लेह घरभित्तर नैजाक छतहैमसे भग्ने करहीं। <sup>१८</sup> खेत्वम रहुइयन आपन झुल्वा लेह घुम्क घर जिन अइहीं। <sup>१९</sup> उ समयम गर्भवती जन्नी मनैन्हक ओ दुध खवैना डाई मनैन्हक कत्रा बिजोग हुइहीन। <sup>२०</sup> हिउँदम या बिसैना दिनम दुहन भाग जिन पर कैक प्रार्थना करो। <sup>२१</sup> काकरकि उ समयम अस्सिन महासंकष्ट हुई, कि परमेश्वर सृष्टि करलठेसे आम्हिसम कबु फे नैहुइल हो, ना कबु हुउइया हो। <sup>२२</sup> यदि परमेश्वर उ कष्टक समय नैघटैना हो

+२४.१५ दानियल: दानियन पुरान नियमक एकठो अगमवक्ता रलह। ऊखास कैक इस्त्राएलीहुँक्रैकैदम परल समयम परमेश्वरक वचन बोल्ना सेवकाइ कलह।

२४:९ - मत्ती १०:२२.      २४:१३ - मत्ती १०:२२.      २४:१५ - दान ९:२७; ११:३१; १२:११.

२४:१७-१८ - लूक १७:३१.      २४:२१ - दान १२:१; प्रका ७:१४.

मत्ती २४:२३-३७

६६

कलसे, कुई फे नैबचुइया हो। तर आपन  
न्वाजल मनैन्हक कारणले, परमेश्वर  
उ समय घटैना निर्णय कैरख्ल।  
२३ उ व्याला कुई, “हेरो! ख्रीष्ट अठे  
बाट”, या “ओठे बाट” कही कलसे,  
विश्वास जिन करहो। २४ काकरकि  
झुटा ख्रीष्टहुँक्र ओ झुटा अगमवक्तन  
देखपरहीं, ओ सक्यासम परमेश्वरक  
न्वाजल मनैन फे उल्काइक लाग हुँक्र  
अचम्म-अचम्मक काम करहीं ओ चिन्ह  
देखैहीं। २५ हेरो, मै दुःहन सब बात  
आधहें जनादेरख्नु।

२६ “यदि मनै दुहन ‘हेरो, उहाँ  
उजार-ठाउँम बाट’ कर्हीं कलसे, उहाँ  
जिन जाओ, ओ ‘हेरो, उहाँ भित्तर  
क्वाठम बाट’ कर्हीं कलसे फे विश्वास  
जिन करो। २७ जसहेंक आकाशम ब्री  
चिम्कलसे सक्कुओरसे देखपर्था,  
ओसहेंक मै, मनैयक छावा घुम्क  
अडना दिनम सक्कुओरसे देखपरम।  
२८ डाइगर रहल ठाउँम गिढ पर्ठ।

२९ “उ महासंकटकाल ओरैटीकि

‘दिन अन्धार होजाई,  
ओ जोन्ह्या फे नैचम्की।  
आकाशमसे टोरैयाँ खसजाई,

ओ आकाशक सब शक्ति  
डगमगाजाई।’

३० “ओ अन्तम मै, मनैयक छावा,  
अइटीरहल चिन्ह आकाशम देखपरी।  
पृथ्वीमक सब जातिक मनै रुवाबासी  
करहीं, ओ मै, मनैयक छावह शक्ति ओ  
महानतासहित ब्रद्रीकसँग आइट देखहीं।

३१ तुरहीक बरा आवाज आई त मै,  
मनैयक छावा, आपन स्वर्गदूतहुँकन  
पठैम, ओ हुँक्र सारा स्वर्ग ओ पृथ्वीमसे  
म्वार न्वाजल मनैन जम्मा करहीं।

३२ “अञ्जीरक रुक्खोमसे एक बात  
सिखो: जसिक रुख्वा पल्हाक पत्या  
लागल कलसे, घाम छ्याँक लग्घ बा  
कैक टुह जन्ठो, ३३ ओसहेंक म्वार  
कहल बात पूरा हुइट देख्बो त, म्वार  
अडना दिन पुगरहल कैक जनहो।

३४ जाट्टीसे मै दुहन कहटुँ, यी सब बात  
पूरा नैहुइट्सम यी पुस्ता नैबिले हो।  
३५ आकाश ओ पृथ्वी बिल्क जाई, तर  
म्वार वचन कब्बु नैबिती।

३६ “म्वार अडना दिन कैह्या हो  
कैक ना त स्वर्गदूत जन्ठ, ना त मै,  
छावा, जन्ठुँ। यी बात परमेश्वर  
बाबा केल जन्ठ। ३७ मै, मनैयक छावा  
घुम्क अडना दिनिक अवस्था नोअक

२४:२६-२७ - लूक १७:२३-२४. २४:२८ - लूक १७:३७.

२४:२९ - यशे १३:१०; ३४:४; इज ३२:७; योए २:१०-३१; ३:१५; प्रका ६:१२-१३.

२४:३० - दान ७:१३; जक १२:१०-१४; प्रका १:७.

समयकअस रहुइया बा। ३८ जलप्रलय हुइनासे आघ, नोआ जहाजम नैपैठ्टसम मनै खैटीरलह, पिटीरलह, ओ भ्वाजकाज कर्टीरलह। ३९ परमेश्वरक कराइल जलप्रलय सबजहन नाश नैकरट्सम हुँक्र कुछु थाहाँ नैपैल। मै, मनैयक छावा, घुम्क अइना दिन फे ओस्तै हुउइया बा। ४० खेत्वम काम कर गैल् दुइ जन मनैमध्ये एकठो लैजाजाई ओ और छोरजाई। ४१ सँगसँग पीठा पिस्टी-पिस्टी दुइ जन जन्नीमनैमध्ये एकठो लैजाजाई ओ और छोरजाई।

४२ “प्रभुक अइना दिन थाहाँ नैरलकओर्से, जागा रहो! ४३ एकठो बात याद करो: यदि घरक मालिक चोन्वा रात्क कौन समयम आइकठा कैक जन्ट कलसे, ऊ जागा रनेरलह, ओ चोरोह आपन घर फ्वार नैदेनेरलह। ४४ उहओर्से दुह तयार रहपठा, काकरकि मै, मनैयक छावा, कैह्या घुम्क अइम कना बात दुहन थाहाँ नैहो।

४५ “बुद्धिमान ओ विश्वासयोग्य काम करुइया के हो? घरमुली ओहीह आपन घरक काम करुइयन्हक खानपानक व्यवस्था करक लाग अगुवा बनैठ। ४६ मालिक घुम्क आइल समयम

यदि हुँकहीन ठीक तरिकासे काम करट् देखहीं कलसे, हुँकहीन पुरस्कार देहीं। ४७ मै जाटीसे दुँहन कहटुँ, मालिक हुँकहीन आपन सारा धनसम्पत्तिक जिम्मा देहीन्। ४८ तर यदि उ काम करुइया दुष्ट बाट ओ ‘मालिक हाली नैअझ्हीं’ कटी ४९ मतोरेन्हकसँग खैनापिना कर्ना ओ और काम करुइयन जथाभावी पिट्ना काम करहीं कलसे, ५० हुँकाहार नैचिताइल दिन ओ समयम मालिक अझ्हीं। ५१ तब मालिक हुँकहीन कर्द दण्ड देहीं, ओ हुँकाहार दशा कपटीन्हकअस हुउइयाबाटन। हुँक उहाँ दुखले दाँत पिस्टी रुवाबासी कर्टीरह्हीं।”

### दशठो कन्याहुँकन्हक आहान

**२५** येशू कल, “स्वर्गक राज्य असिन हो: दशठो कन्याहुँक्र आपन-आपन दिया लेक दुल्हह भ्याँट कर निकल। २ हुँक्रमध्ये पाँच जन बिनबुद्धिक ओ पाँच जनजुन बुद्धिमान रलह। ३ उ बिनबुद्धिक पाँच जन दिया त लैगिल, तर हुँक्र थप्पन त्याल नैलैगिल। ४ तर बुद्धिमानहुँक्रजुन थप्पन त्याल फे लैगिल। ५ दुल्हह अश्या लागट-लागट

बर्का रात होगिल, त हुँक झुटुर-झुटुर ओड्यैटी-ओड्यैटी भुसुक्क निंदागैल।

६ “आधा रातम ‘दुल्हा आइट! भ्याँट कर आओ!’ कना आवाज आइल त हुँक जग्ल।

७ “उ दश्यौ कन्याहुँक झर्फराक उठ्ल, ओ आपन-आपन दिया ठीकठाक पर्ल। ८ बिनबुद्धिक कन्याहुँक बुद्धिमानहुँकन कल, ‘टुन्हक त्याल हमन फे डान-डान देओ ना, काकरकि हमार दिया त बुट लागला।’

९ “बुद्धिमान कन्याहुँक्र जवाफ देल, ‘हमारठे सबजहन पुग्ना त्याल नैहो। बेनसे दोकानम जाक किनो ना।’

१० “हुँक त्याल किन गैल् ब्याला दुल्हा आगैल, ओ तयार रहल कन्याहुँक दुल्हकसँग भ्वाज खाए भित्तर गैल, ओ डिवारीम ताल्चा लागैल।



दश कन्याहुँक (२५. ५)

२५:११-१२ - लूक १३:२५.

११ “एकघरिक रहक उ बिनबुद्धिक कन्याहुँक अइल ओ कहलगल, ‘हजुर, हजुर, हमार लाग इवार उभकदेओ!’

१२ “तर दुल्हा भित्रहैसे जवाफ देल, ‘जाट्टीसे मै दुहन कहुँ, मै दुहन चिन्बोचिन्बोनैकटु।’

१३ “उहओर्से जागा रहो, काकरकि मै, मनैयक छावा, कौन दिन कौन समयम अइम कैक दुहन थाहाँ नैहो।

### स्वानक पैसक आहान

लूक १३:११-२७

१४ येशू कल, “स्वर्गक राज्य असिन हो: एकठो मनैया परदेश जाइलगल त आपन नोकरन बलैल ओ हुँकन आपन धनसम्पत्तिक जिम्मा लगैल।

१५ ऊ हुँकन्हक खूबीअनुसार एकठो नोकरह पाँचठो, द्वासर नोकरह दुइठो, ओ तीसर नोकरह एकठो स्वानक पैसा देल ओ परदेश गैल। १६ तब पाँचठो स्वानक पैसा पउइया तुरुन्त जाक उ पैसले व्यापार करल ओ और पाँचठो स्वानक पैसा कमाइल।

१७ ओसहैंक दुइठो स्वानक पैसा पउइया फे और दुइठो स्वानक पैसा कमाइल।

१८ तर एकठो स्वानक पैसा पउइयाजुन खोल्टी खान्क आपन मालिकक धन भाँठदेहल।

१९ “धेर दिनपाछ मालिक अइला। ऊ आपन नोकरन बलैल ओ के कत्रा नाफा करल् कैक हिसाब मझला।

२० पाँचठो स्वानक पैसा पउइया नोकर मालिककूठे आक कहल, ‘हजुर, अप्न महीह जिम्मा देहल पाँचठो स्वानक पैसले मै और पाँचठो स्वानक पैसा कमारझुँ।’

२१ “मालिक कल, ‘स्याबास! टैं असल ओ विश्वासयोग्य नोकर हुइद्या। टैं डान्चे चिजम फे विश्वासयोग्य हुइल्या। आब मै टोहीह धेर चिजिक जिम्मा देहम्। हम्र सँगसँग आनन्द मनाई।’

२२ “दुइठो स्वानक पैसा पउइया नोकर फे आक कहल, ‘हजुर, अप्न महीह जिम्मा देहल दुइठो स्वानक पैसले मै और दुइठो स्वानक पैसा कमारझुँ।’

२३ “मालिक कल, ‘स्याबास! टैं असल ओ विश्वासयोग्य नोकर हुइद्या। टैं डान्चे चिजम फे विश्वासयोग्य हुइल्या। आब मै टोहीह धेर चिजिक जिम्मा देहम्। हम्र सँगसँग आनन्द मनाई।’

२४ “एकठो स्वानक पैसा पउइया नोकर फे आक कहल, ‘हजुर, अप्न बरा खरो बाटी कैक महीह थाहाँ रह। अप्न ज्या नैबुइटी ओक्र कट्नी कर्ठी, ओ ज्या नैढर्टी उह लेठी।’ २५ महीह अप्नक डर

लागला। उहओर्से मै अप्नक पैसा खोल्टी खान्क भाँठरख्नुहुँ। अप्नक देहल पैसा यिहाँ बा।’

२६ “मालिक ओहीह जवाफ देल, ‘टैं दुष्ट ओ अल्ढी नोकर! यदि मै ज्या नैबुइटुँ ओक्र कट्नी कर्तु, ओ ज्या नैढर्टु उह लेठुँ कैक टैं जन्लरलहया कलसे, २७ म्वार देहल पैसा बैंकम काकर नैढल्या? ढट्या कलसे, आब मै व्याजसहित पैसा फिर्ता पैनेरनहुँ।’

२८ वाकरठेसे उ पैसा अछिन्क दशठो स्वानक पैसा रहल मनैयह देडारो। २९ ज्याकरठे बा ओहीह आकुर देजाई, त वाकरठे ज्ञन धेर हुर्हैस्। तर ज्याकरठे नैहो वाकरठेसे रहल फे अछिन्जाई। ३० यी बिनकामक नोरकह बाहार अन्धकारम फाँकदेओ। यी उहाँ दुखले दाँत पिस्टी रुबाबासी कर्टीरही।”

### छेग्रीन्हक ओ भैरीन्हक आहान

३१ “मै, मनैयक छावा, सारा स्वर्गदूतन्हकसँग आपन सानसे अउइयाबाटुँ, ओ आपन सानदार सिंहासनम बैठुइयाबाटुँ। ३२ उ व्याला सब जातिक मनै म्वार आघ जम्मा हुहीं। ओ भैरी चहुइया छेग्रीन ओ भैरीन अल्लाइअस मै हुँकन

२५:२९ - मत्ती १३:१२; मर्क ४:२५; लूक ८:१८.

२५:३० - मत्ती ८:१२; २२:१३; लूक १३:२८.

२५:३१ - मत्ती १६:२७; १९:२८.

एक और जहन से अल्गौम, ३३ ओ भैरीन आपन दाहिन ओर, ओ छेग्रीन बाँड़ ओर ढरमा।

३४ “तब मै, राजा, आपन दाहिन ओर रहल मनैन कहम, ‘दुह म्वार परमेश्वर बाबसे आशिष पाइल मनै हुइटो। संसारक सृष्टिसे दुन्हक लाग तयार पारल राज्यह अधिकार करो। ३५ काकरकि मै भुँखाइल ब्याला दुह महीह खैना चिज देलो। मै पियासल ब्याला, दुह महीह पिना चिज देलो। मै परदेशी रहल ब्याला दुह महीह आपन घरम स्वागत कर्लो। ३६ मै नड्ट रहल ब्याला दुह महीह लगैना चिज देलो। मै बेराम परल ब्याला दुह म्वार स्याहारसुसार कर्लो। मै इयालखानम परल ब्याला दुह महीह भ्याँट कर अइलो।’

३७ “तब धर्मी मनै जवाफ देहीं, ‘हे प्रभु, कैह्या हम्र अप्नह भुँखाइल देखली त खैना चिज देली? या पियासल देखली त पिना चिज देली? ३८ कैह्या अप्न परदेशी रलही त हम्र अप्नह आपन घरम स्वागत कर्ली? कैह्या अप्नह नड्ट देखली त लगैना चिज देली? ३९ कैह्या अप्न बेराम पर्ली त हम्र अप्नक स्याहारसुसार कर्ली? कैह्या अप्न इयालखानम पर्ली त हम्र अप्नह भ्याँट कर गैली?’

४० “तब मै हुँकन जवाफ देहम, ‘जाट्टीसे मै दुहन कहड़, म्वार मनैमध्ये सबसे छोटीह दुह ज्या कर्लो, उ महीह जो कर्लो।’

४१ “तब दोन्ह मै आपन बाँड़ ओर रहल मनैन कहम, ‘दुह परमेश्वरक सराप परल मनै हुइटो। यिहाँसे चलजाओ! शैतान ओ वाकर दूतन्हक लाग तयार पारल कब्बु नैबुट्ना आगीम जाओ। ४२ काकरकि मै भुँखाइल ब्याला दुह महीह खैना चिज नैदेलो। मै पियासल ब्याला, दुह महीह पिना चिज नैदेलो। ४३ मै परदेशी रहल ब्याला दुह महीह आपन घरम स्वागत नैकर्लो। मै नड्ट रहल ब्याला दुह महीह लगैना चिज नैदेलो। मै बेराम परल ब्याला दुह म्वार स्याहारसुसार नैकर्लो। मै इयालखानम परल ब्याला दुह महीह भ्याँट कर नैअइलो।’

४४ “हुँक्र असिक जवाफ देहीं, ‘हे प्रभु, कैह्या हम्र अप्नह भुँखाइल, पियासल, परदेशी, नड्ट, बेराम कि इयालखानम देखक फे अप्नक सेवा नैकर्ली?’

४५ “तब मै हुँकन जवाफ देहम, ‘जाट्टीसे मै दुहन कहड़, म्वार मनैमध्ये सबसे छोटीह दुह ज्या नैकर्लो, उ महीह जो नैकर्लो।’

४६ “तब हुँक्र अनन्त दण्डक भागीदार हुहीं, तर धर्मी मनै अनन्त जीवन पैहीं।”

### येशूह गुपचुपम मुवादेना योजना

मर्कस १४:१-२; लूका २२:१-२; यूहन्ना ११:४५-५३

**२६** अत्रा बात बद्वाक सेकल  
२६ त येशू आपन चेलन कल,  
२ “आङ्गुक दुइ दिन पाछ्य मुक्ति-दिवस  
टिहार शुरु हुइकठा कना बात दुहन  
थाहाँ बा। तब मै, मनैयक छावा,  
शत्रुन्हक हाँठम सुम्प्वापैम ओ हुँक  
महीह कूसम किल्ला ठोक्क मुवैर्हाँ।”

३ उह समयम प्रधान पुजेह्वा  
कैयाफक दरबारम मुख्य पुजेह्वोन  
ओ और अगुवन जम्मा होक बैठक  
बैस्ल। ४ उ सभम हुँक येशूह गुपचुपम  
पकर्क मुवादेना योजना बनैला। ५ तर  
हुँक कल, “टिहारक समयम यी काम  
कर्ना ठीक नैहुई, नकित मनै हूलदड्गा  
मच्चाडरहीं।”

### बास अइना बहुमुल्य चिज येशूकम खन्ह्यैलक

मर्कस १४:३-९; यूहन्ना १२:१-८

६ बेथानी गाउँक सिमोनक (पैल्ह  
हुँकहीन कोररोग लागल रलहन) घरम  
येशू रलह। ७ उहाँ खाए बैठल व्याला  
एकठो जन्नीमनैया धेर महड्ग शीशीम  
बास अइना बहुमुल्य चिज लेक अइली  
येशूक कपारीम खन्ह्यादेली।

८ यी देखक चेलावैं रिसैल ओ कल,  
“अत्रा महड्ग बास अइना चिज काजे

खर्बास पारल? ९ यी बास अइना चिज  
धेर पैसम बिक्री कैक गरीबन देलसे  
हुइनेरहा।”

१० येशूह यी सब बात थाहाँ रलहन।  
उहाँ कल, “काजे दुह हिँकाहारपर  
कचकचाइटो? यी म्वार लाग असल  
काम कैरख्ली। ११ गरीबहुँक सड्डभर  
दुँन्हकसँग पलरठ, ओ चाहल व्याला  
दुह जब के हुँकन सहायता करसेकठो।  
तर दुह महीह सड्डभर नैपैबो।  
१२ म्वार शरीर गारक लाग आधाहैं  
बास अइना चिज खन्ह्याक तयार  
पाररख्ली। १३ जाटीसे मै दुहन कहटुँ,  
सारा संसारम जहाँ-जहाँ खुशीक  
खबर प्रचार हुई, हिँकाहार सम्झनम  
हिँकाहार करल यी कामक बयान  
कैजाई।”



येशूक कपारीम बहुमुल्य त्याल  
खन्ह्यादेलक (२६.७)

मत्ती २६:१४-२५

७२

## यहूदा येशूह पक्रादेना मौका खोजलक

मर्कस १४:१०-११; लूका २२:३-६

१४ यहूदा इस्करियोत बाहू जन चेलावँमध्ये एकठो रहा। उ मुख्य पुजेरोन्हकठे जाक कहल, १५ “यदि मै उहाँह पक्रना कामम अप्नहुँकन सहायता करम कलसे, महीह का देबी?” हुँक ओहीह चाँदीक तीसठो पैंसा देल। १६ तबठेसे यहूदा येशूह पक्रादेना मौका खाज लागल्।

## प्रभुक खाना

मर्कस १४:१२-२६; लूका २२:७-२३;

यूहन्ना १३:२१-३०

१७ खमीर नैडारल रोटी खैना टिहारक पैल्ह दिन चेलावँ येशूकठे आक



प्रभु मुनासे आघ आपन चेलनसे अन्तिम खाना खाइट (२६. १९)

कल, “हम्र अप्नक लाग मुक्ति-दिवसक खाना खैना व्यवस्था कहाँ मिलाई?”

१८ उहाँ कल, “शहरम एकठो विशेष मनैयकठे जाओ, ओ हुँकहीन कहो, ‘गुरुजी कैरखल, म्वार लाग परमेश्वरक त्वाकल समय आरहल। मै आपन चेलन्हकसँग ठुहार घरम मुक्ति-दिवसक खाना खाइकटुँ’।” १९ येशूक कहल अनुसार चेलावँ कर्ल, ओ उहाँ मुक्ति-दिवसक खाना खैना व्यवस्था मिलैल।

२० सन्द्या हुइल त, येशू आपन बाहू जन चेलन्हकसँग खाइ बैठल।

२१ उहाँहुँक खैटी-खैटी येशू हुँकन कल, “मै जाटीसे ठुहन कहटुँ, ठुहमध्ये एक जन महीह पक्रा देहुइयाबाटो!”

२२ यी सुन्क हुँक धेर दुःखित हुइल ओ पालिक-पाला येशूह पुछलगल, “प्रभु, का उ मनैया मैहे हुइटुँ?”

२३ तब उहाँ हुँकन जवाफ देल, “म्वारसँग टठ्यक रसम रोटी विल्बोर्क खउइया महीह पक्रादेहुइया बा।

२४ परमेश्वरक वचनम लिखलअस मै, मनैयक छावह त, मुवही परी। तर महीह पक्रा देहुइयह धिक्कार बा। बेनसे वाकर जर्म नैहुइटीस् त मजा हुइनेरलहीस्।”

२५ उहाँह पक्रादेहुइया यहूदा पुछल, “गुरुजी, का उ मनैया मै हुइटुँ?”

उहाँ ओहीह कल, “टुँ त हुइटो”  
 २६ उहाँहुँक खाइबेर, येशू रोटी लेक  
 परमेश्वरसे आशिष मझ्गल। उहाँ रोटी  
 खन्टाक हुँकन देटी कल, “यी म्वार शरीर  
 हो, लेओ, खाओ।”

२७ तबदोस्त उहाँ अङ्गुरिक रस रहल  
 खोन्या लेक परमेश्वरह धन्यवाद  
 चहैल ओ चेलन देटी कल, “यी दुह  
 सब जन पिओ। २८ यी रस धेर जन  
 मुक्ति पाइक लाग बहाजैना म्वार रगत  
 हो। परमेश्वर मनैनसे कर्लक लौव  
 करारह यिह रगत क्रियाशील बनैठा।<sup>+</sup>  
 २९ मै दुहन कहटुँ, आबठेसे परमेश्वरक  
 राज्यम फेदोस्त नैपियतसम, मै  
 अङ्गुरिक रस पिबो-पिबो नैकरमा।”

३० तब एकठो भजन गाक ओठेसे  
 उहाँहुँक जैतुन पर्वत्तोम गैल।

### पत्रुस इन्कार करहीं कैक येशू भविष्यवाणी कर्ल

मर्कुस १४:२७-३१; लूका २२:३१-३४;

यूहन्ना १३:३६-३८

३१ येशू हुँकन कल, “आज रात्क दुह  
 सब जन महीह छोर्क जाजैबो। काकरकि  
 परमेश्वरक वचनम लिखल वा,

‘मै भैरी चहुइयह मुवैबुँ त,  
 भैरी तितरवितर हुइहीं।’

<sup>+</sup>२६:२८ इस्ताएलीहुँक परमेश्वर हुँकनसे बान्धल करारह भड्ग कैरखलह ओ हुँक लौव करारक आशम रलह। पुरान करार वनि  
 कैरेल जनावरक रगतल छाप लगाजाए ओ घरीघरी बलिक आवश्यक परा परमेश्वर मनैनसे बान्धल लौव करार येशूक रगतले  
 छाप लगागैल वा ओ घरीघरी और बलिक आवश्यक नैपरद (हिन्दू ८:३-६; ९:१५; १०:११-१८)।

३२ तर मै मुक फेदोस्त जिएम त, दुँहनसे  
 आघ गालीलम जैबुँ।”

३३ पत्रुस येशूह कल, “सब जन  
 छोर्लसे फे, मै अप्नह कब्बु नैछोरमा।”

३४ येशू पत्रुसह कल, “जाट्टीसे मै  
 दुहीन कहटुँ, आज्ञ्वु रात मुर्धा बस्नासे  
 आघ दुँ महीह तीनचो इन्कार कर्बो।”

३५ पत्रुस कल, “महीह अप्नकसँग  
 मुव पर्लसे फे, मै अप्नह इन्कार कर्बो-  
 कर्बो नैकरमा।” तब और चेलावँ फे  
 ओसहैक कल।

### येशू गेतसमनीम

मर्कुस १४:३२-४२; लूका २२:३९-४६

३६ तबदोस्त येशू आपन चेलन्हकसँग  
 गेतसमनी कना ठाउम गैल, ओ आपन  
 चेलन कल, “मै हाउठे जाक प्रार्थना  
 करकटुँ, दुह, अटठहैं पलरहो।” ३७ तर  
 उहाँ पत्रुस ओ जब्दियक दुइ भाइ  
 छावनभर आपनसँग लैगिल। उहाँ  
 शोकित ओ व्याकुल हुइ लग्ल। ३८ तब  
 उहाँ आपन चेलन कल, “मनक दुःख  
 सह नैसेक्क म्वार मुटु फुट्नाअस  
 करटा। दुह यिहैं म्वारसँग जागा रहो।”

३९ अप्न जुन टनिक दूर जाक भुइँयम  
 ढोक्रियागैल, ओ असिक प्रार्थना करलग्ल,  
 “हे परमेश्वर बाबा, हुइसेक्ठा कलसे यी  
 दुःखक तीत घुट्का पिना समय हट्जाए।

मत्ती २६:४०-४८

७४

तर म्वार इच्छा अनुसार नैहोक अप्नक इच्छा अनुसार हवाए।”

४० येशू घुम्क अइल त, हुँकन निंदाइल् देख्ल। उहाँ पत्रुसह कल, “का दुह एक घण्टा फे जगल रह नैसेकटो? ४१ जगल रहो, ओ प्रार्थना करो त पापम नैफस्वो। दुँहार मनम असल कर्ना इच्छा रलसे फे, दुँहार शक्ति नैहो।”

४२ उहाँ फेदोस्त जाक प्रार्थना कर्ल, “हे म्वार परमेश्वर बाबा, यदि अइना दुःखक तीत घुट्का मै नैपिक नैहुइना हो कलसे, अप्नक इच्छा अनुसार हवाए।”

४३ उहाँ फेदोस्त घुम्क अइल त, हुँकन निंदाइल् देख्ल, काकरकि हुँक आँख उघार नैसेकल। ४४ उहाँ हुँकन्हकठेसे गैल, ओ तीसर फ्यारा फे उह प्रार्थना कर्ल।

४५ उहाँ चेलन्हकठे घुम्क अइल ओ हुँकन कल, “का दुह आम्हिसम



येशू गेतसमनी बगैचम ढोक याख प्रार्थना करट (२६. ३९)

निन्दैलबाटो? आब आराम कर्ना समय ओराइल्। हेरो, मै, मनैयक छावा, पापी मनैन्हक हाँठम पर्ना समय आस्याकल्। ४६ उठो, हुँकन्हकठे जाई। महीह ध्वाखा देहुइया यिहाँ आइटा।”

### येशूक पक्राउ

मर्कस १४:४३-५०;

लूका २२:४७-५३; युहन्ना १८:३-१२

४७ येशू बटोइटीरलह त, उहाँक बाह जन चेलामध्ये एकठो चेला, यहूदा, आगैल्। वाकरसँग लट्ठी ओ तरवाल लेल्ह-लेल्ह एक बगाल मनै रलह। हुँकन मुख्य पुजेहोहुँक, ओ अगुवाहुँक पठारख्लहन्। ४८ येशूह ध्वाखा देहुइया, यहूदा, हुँकन एकठो ईशारा देरख्लाहा, “मै ज्याकर गाल चुमम, उह हो येशू। ओइहेह पक्रहो।”



गेतसमनीम येशूसे प्रार्थना कर गैल् चेलावँ निंदाइल बाट (२६. ४१)

४९ ऊ तुरुन्त येशूकठे जाक “गुरुजी” कहल् ओ उहाँक गाल चुमल्।

५० येशू ओहीह कल, “संघारी, टुँ ज्या कर आरलो, उ कैडारो ना!”

तब हुँक्र येशूह पक्रल। ५१ यी देख्क येशूकसँग रहलमध्ये एक जन तरवाल द्विंकक प्रधान पुजेहोक कमारह झम्काइल, त वाकर कान च्वाट्टसे काटगैलस्।

५२ तब येशू हुँकहीन कल, “दुहाँर तरवाल डाबम ढरो। तरवाल खेलुइयन तरवालीले जो कट्वापैहीं। ५३ यदि मै मङ्गडुँ कलसे, म्वार बाबा बाह्र पल्टनसे के धेर स्वर्गदूत म्वार लाग तुरुन्त पठादेनेरलह। दुह का सौँचरख्लो? ५४ तर यदि मै मङ्गना हो कलसे, परमेश्वरक वचनम लिखल बात कसिक पूरा हुई?”

५५ “तब येशू भीडक मनैन कल, “का दुह महीह डाँका सौँच्क लट्ठी ओ तरवाल लेक पक्र आरलो? मन्दिरम सिखाइबेर दिनका-दिन मै दुन्हकेसँग रहुँ, तब दुह महीह नैपकर्लो। ५६ तर म्वार बारेम परमेश्वरक वचनम लिखल बात पूरा हुइक लाग दुह महीह पक्र आरलो।” तब सब चेलावै उहाँह छोर्क भागैल।



येशूक यहुदा नाउँक चेला गाल चुम्क उहाँह पक्राइटन (२६.४९)

### येशू महासभम

मर्कस १४:५३-६५; लूका २२:४४-५५,

६२-७१; यूहन्ना १८:१३-१४, १९-२४

५७ तब हुँक्र येशूह प्रधान पुजेहोवा कैयाफक घरम लैगिल। उहाँ मुख्य पुजेहोन, धर्मगुरुहुँक्र, ओ अगुवाहुँक्र जम्मा होरलह। ५८ पत्रुस दूरज्जे येशूक पाछ्पाछ्च प्रधान पुजेहोक घरक अङ्गनम पुगल। आब का हुइठा कैक ह्यारक लाग ऊ द्वरपालेन्हकठे जाक बैठल।

५९ मुख्य पुजेहोन समेत, महासभक सारा मनै येशू मृत्युदण्ड देहक लाग उहाँक विरोधम झुटा प्रमाण ख्वाज लगल। ६० झूट साक्षी बकुइयन धेर जन

मत्ती २६:६१-७१

७६

आक उहाँह दोष लगैल, तर फे हुँक कुछु प्रमाण नैपैल।

आखिरम दुइठो मनै आघ जाक कल,  
६१ “यी मनैया ‘मै परमेश्वरक मन्दिर बिग्राक तीन दिनम यहीह बनाइ सेकुँ’ कहला!”

६२ तब सबजन्हक सामुन्नेम प्रधान पुजेहवा उठक येशूह पुछ्ल, “का टैं कुछु जवाफ नैदेहदुइट्या? का द्वार विरोधम बकल साक्षीक बारेम द्वार कहपर्ना बात कुछु नैहो?” ६३ तर येशू चामचुम पलरला।

प्रधान पुजेहवा उहाँह कल, “जीवित परमेश्वरक शक्तिले मै टोहीह आज्ञा देहटुँ, यदि टैं परमेश्वरक छावा, ख्रीष्ट, हुइट्या कलसे, ‘हुइटुँ’ कोहा!”

६४ येशू कल, “हुइटुँ नि का! आब मै का कहटुँ कलसे, अप्नहुँक्र मै, मनैयक छावह सारा शक्ति रहल परमेश्वरक दाहिन पाझ्जर बैठल् देख्बी। तबदोस्त स्वर्गमसे बद्रीकसँग आइट् देख्बी।”

६५ यी सुन्टीकि, प्रधान पुजेहवा रिसले आपन झुल्वा फर्ल ओ कल, “यी त परमेश्वरक बदनाम हो। आब हमन और साक्षी का चाहल? दुह परमेश्वरक बदनाम कर्लक त सुन्डलो। ६६ दुन्हक विचार का बा?”

हुँक्र जवाफ देल, “यहीह मृत्युदण्ड देहपर्ठा!”



येशूह महासभम सोधपुछ  
करटन (२६. ६३)

६७ तबदोस्त हुँक्र येशूक मुहम थुकदेल,  
कुई मुक्का लगैल, कुई थाप्पर लगैटी  
कल, ६८ “यदि टैं अगमवक्ता हुइट्या  
कलसे, टोहीह के पिट्ल? ल्या कोह!”

### पत्रुसक इन्कार

मर्कुस १४:६६-७२; लुका २२:५६-६२;

शहन्ता १८:१५-१८, २५-२७

६९ पत्रुस बाहर अड्गनम बैठल रलह।  
एकठो कमारी हुँकाहारठे आक कहल्, “टुँ  
फेत गालीलसे आइल येशूकसँग रलहो।”

७० तर ऊ सबजन्हक सामुन्ने  
इन्कार कर्टी कल, “टुँ का कहटो महीह  
थाहै नैहो।”

७१ पत्रुस गेटठे गैल त और कमारी  
हुँकहीन दयाखल, ओ ओठे रहल मनैन  
कहल्, “यी मनैया के नासरतसे आइल  
येशूकसँग त रहा।”

७२ फेदोन्न पत्रुस इन्कार कर्ती कल, “मै किन्या खाक कहटुँ, मै उ मनैयह चिन्हबो-चिन्हबो नैकटुँ।”

७३ टनिक बेर पाछ ओठे रहुइयन फे पत्रुसकठे आक कल, “पक्का फे टुँ उह बगालक हुइटो, काकरकि टुँहार बोलीले हम्र थाहाँ पाइटी।”

७४ तब पत्रुस अपन्हेह सराप लग्ल ओ किन्या खैटी कल, “यदि म्वार बात झुट हुई कलसे, परमेश्वर महीह दण्ड देहर्हीं! उन्हक कहल मनैयह मै चिन्हबो-चिन्हबो नैकटुँ।”

तबहैं मुर्धा बासल। ७५ ओ पत्रुस येशूक कहल् बात सम्बल, “मुर्धा बस्नासे आघ, टुँ महीह तीनचो इन्कार कर्बो।” तब ऊ बाहर जाक हवाँकहवाँक-हवाँकहवाँक रुइलग्ल।

### यहूदा झुल्क मुगैल्

मूर्क्स १५:१-१५; लूका २३:१-५,  
१३-२५; शुहन्ना १८:२८-३८

**२७** बिहान हुइटीकि सब मुख्य पुजेहोन ओ जनतन्हक अगुवन येशूह मृत्युदण्ड देहक लाग उहाँक विरोधम सरसल्लाह कर्ल। २ हुँक्र येशूह बाहान्क लैगिल ओ शासक पिलातसकठे सुम्पदेल।

३ येशूह मृत्युदण्ड देना सरसल्लाह कर्लक बात सुन्क उहाँह पक्रादेहुइया

यहूदा धेर दुःखी हुइल्। ऊ चाँदीक तीसठो पैसा लेहल, ओ मुख्य पुजेहोन ओ अगुवन्हकठे जाक ४ कहल, “मै निर्दोष मनैयह ध्वाखा देक पाप कर्नु।”

हुँक्र जवाफ देल, “वाकर हमन का मतलब? टैं अपन्हे जान्।”

५ यी सुन्क यहूदा उ पैसा मन्दिरम सुइक्क फाँकदेहला। ऊ ओठेसे गैल् ओ झुल्क मुगैल्।

६ मुख्य पुजेहोन उ पैसा उठैल ओ कल, “यी त रगतक म्वाल हो, यहीह मन्दिरक भण्डारम ढर्ना ठीक नैहो।”

७ हुँक्र अप्न-अप्न सरसल्लाह कर्ल ओ उ पैसले परदेशीन्हक लाश गारक लाग एकठो कुम्हरक जग्गा किन्त। ८ उहओर्स आजसम फे उ जग्गह ‘रगतक जग्गा’ कना चलन बा। ९ असिक यर्मिया अगमवक्तक कहल बात पूरा हुइल्, “हुँक्र चाँदीक तीसठो पैसा लेला। उ पैसा इस्ताएलीहुँक उहाँक लाग त्वाकल म्वाल रह। १० ओ परमप्रभु महीह आज्ञा देहल अनुसार हुँक्र उ पैसा एकठो कुम्हरक जग्गक लाग देला।”

११ येशू शासक पिलातसक आघ ठह्यैल त, ऊ उहाँह पुछ्ल, “का टुँ यहूदीन्हक रज्वा\* हुइटो?”

येशू जवाफ देल, “अप्नहे महीह राजा कहटी।”

१२ मुख्य पुजेहोन ओ और अगुवन येशूह धेर बातक दोष लगैल। तर जत्रा दोष लगैलसे फे उहाँ कुछु जवाफ नैदेल। १३ पिलातस उहाँह कल, “हिंक टुँहार विरोधम अत्रा धेर बातक दोष लगाइट। का दुँ नैसुन्हुइटो?” १४ तर येशू कुछु जवाफ नैदेल। यी देखक शासक छक्क पर्ल।

१५ मुक्ति-दिवस कना टिहारक समयम, पिलातस मनैन्हक माझ्गल एकठो यहूदी जातिक कैदीह छ्वारपर्ना चलन रलहन। १६ उ समयम बारब्बा नाउँ रहल एकठो डरलगिटक मनैया इयालखानम परल रह। १७ मनै भेला हुइल त, पिलातस हुँकन पुछ्ल, “ले कहो, मै केहीह छोरदिँ? बारब्बह कि ख्रीष्ट कैजिना येशूह?” १८ काकरकि हुँक येशूह बिह मुक सुम्पदेलह कना बात हुँकहीन थाहाँ रलहन।

१९ पिलातस न्याय-आसनम बैठल ब्याला हुँकाहार गोसिन्या एकठो असिन खबर पठेली, “उ निर्दोष मनैयह कुछु जिन करैहो, काकरकि आज रात्क मै उहाँक बारेम डरलगिटक सपना देख्नु।”

२० तर मुख्य पुजेहोन ओ और अगुवाहुँक भीडक मनैन सुन्याक असिक कह लगैल, “बारब्बह छोरदी, येशूह मृत्युदण्ड दी।”

२१ शासक फेदोस्त्र हुँकन पुछ्ल, “मै केहीह छोरदिँ? बारब्बह कि येशूह?”

हुँक करसे कल, “बारब्बह।”

२२ पिलातस हुँकन कल, “ख्रीष्ट कैजिना येशूह मै का करूँ तो?”

हुँक सब जन करसे कल, “ओहीह कूसम टङ्गाक मुवाई!”

२३ ऊ कल, “काजे? यी का अपराध कैरख्ल जे?”

तर हुँक और करसे कल, “ओहीह कूसम टङ्गाक मुवाई!”

२४ पिलातस कुछु सीप नैलागल देखक ओ हूलदड्गा मच्च सेकी कना डरले सारा मनैन्हक आघ आपन हाँठ धुइटी कल, “यी मनैयह मुवैलक दोष महीह नाही, दुहन जो लागि।”

२५ सारा मनै जवाफ देल, “हाँ, हाँ, यहीह मुवैलक दोष हमन ओ हमार सन्ततानन् लागि!”

२६ तब पिलातस बारब्बह छोरदेल। येशूह जुन कोरा लगाक कूसम टङ्गाइक लाग सिपाहीन्हक हाँठम सुम्पदेल।

### येशूक अपमान

मूर्क्स १५:१६-२०; युहन्ना १९:२-३

२७ तबदोस्त्र शासक् सिपाहीहुँक येशूह दरबारभित्तर लैगिल, ओ सारा पल्टनक सिपाहीहुँक उहाँकठे भेला हुइल। २८ हुँक उहाँक लुगा काहारदेल


ओ उहाँह लाल लुगा लगादेल। २९ हुँक्र काँटक मुकुट बनाक उहाँक कपारीम लगादेल, उहाँक दाहिन हाँठम एकठो लट्ठी पक्रादेल, ओ उहाँक आघ ठिहन टेक्क हियैटी कल, “यहूदीन्हक राजक जय हवाए!” ३० तब हुँक्र उहाँह थुक्ल, ओ उ लट्ठी अछिन्क उहाँकड कपारीम ठोक्ल। ३१ हुँक्र उहाँह असिक हियाहुउक लाल लुगा काहारदेल ओ उहाँकड लुगा लगादेल। तबदोस्र हुँक्र उहाँह क्रूसम टङ्गाइक लाग लैगिला।

### येशू क्रूसम

मर्कस १५:२१-३२; लूका २३:२६-४३;

यूहन्ना ११:१७-२७

३२ जैटी-जैटी हुँक्र सिमोन नाउं रहल कुरेनी शहरक एकठो मनैयह भेटैल। हुँक्र हुँकहीन बलजब्री येशूक



येशू क्रूसम टङ्गागैलक दृष्ट्य (२७.४०)

२७:३४ - भज ६९:२१. २७:३५ - भज २२:१८.

२७:४० - मत्ती २६:६१; यूह २:१९.

क्रूस बोकैला। ३३ हुँक्र गलगथा कना ठाउँम पुग्ल। गलगथा कलक खोप्रहीक ठाउँ हो। ३४ सिपाहीहुँक येशूह तीत बिच्वा मिलाइल अङ्गुरिक मद पियक लाग देल। उहाँ उ मद चिख्ल, तर पिय नैचहला। ३५ हुँक्र येशूह क्रूसम कील्ला ठोक्क टङ्गैल, ओ उहाँक लुगाजुन गोटी डार्क बँट्ला। ३६ तब हुँक्र ओठे बैठ्क उहाँह कुरटलह। ३७ उहाँह क्रूसम टङ्गना कारण लिख्ल सूचना पाटी उहाँक कपारीक उप्पर टाँसल रह। उ सूचनाम “यी येशू यहूदीन्हक रज्वा हो” लिख्ल रह। ३८ उ समयम हुँक्र उहाँक दाहिन ओ बाउं पाऊर दुइठो अपराधीन फे अल्ला-अल्ला क्रूसम टङ्गला। ३९ उ डगर नेङ्गुइयन सब जन मुन्टा हिला-हिला येशूह हियैटी कल, ४० “मन्दिर बिग्राक फेदोस्त तीनी दिनम बनाइ सेक्ना मनैया टैहे नैहुइट्या का? यदि टैं जाट्टीसे परमेश्वरक छावा हुइट्या कलसे, क्रूसमसे उतरक अपन्हेह बँच्वा।”

४१ असहेंक मुख्य पुजेहोन, धर्मगुरुहुँक ओ और अगुवन फे उहाँह हियैटी कल, ४२ “यी औरजहन त बँचाइल, तर अपन्हेहभर बँचाए नैस्याकल! यी इस्त्राएलीन्हक रज्वा क्रूसमसे उतर्क आए ना, हम्र देख्वी, तब

२७:३९ - भज २२:७; १०९:२५.

मत्ती २७:४३-५५

८०

विश्वास कर्बी। ४३ यी परमेश्वरकम भर पर ओ 'मै त परमेश्वरक छावा हुइटु' कटी न्याइग। यदि परमेश्वर यहीह चहठ कलसे, उहाँ जो यहीह बचैहर्हीं।" ४४ येशूक दाहिन ओ बाँउ पाऊजर कूसम टड्गागैल् अपराधीहुँक्र के उहाँह हियैल।

### येशूक मृत्यु

मूर्क्स १५:३३-४१; लूका २३:४४-४९;

यूहन्ना १३:२८-३०

४५ लगभग दिनक बाह्र बजेसे तीन बजेसम सारा देशम अन्धार हुइल। ४६ तीन बजेओर येशू कर्से चिल्लैल, "इलोई, इलोई, लामा सबखथनी।" याकर अर्थ हो, "म्वार परमेश्वर,



मन्दिरक पर्दा टिक्रासे टरसम हुइ भाग होक चिँझैल (२७.५३)

म्वार परमेश्वर, अप्न महीह काजे छोरदेली?"

४७ यी सुन्क ओठे ठहयाइलमध्ये कुई-कुई कल, "यी मनैया त एलियह बलाइटा।"

४८ तब एकठो मनैया दौरटी गैल् ओ आमिल मदम चिर्कुट बिल्बोर्क आनल्, ओ लट्ठीम अँट्काक येशूह पिए देहल। ४९ तर और जन कल, "हेरी, यहीह बँचाए एलिया आजैठ कि।"

५० तब येशू फेदोस्त एकचो कर्रसे चिल्लैल ओ प्राण छोर्ला।

५१ उह समयम मन्दिरक पर्दा उपरसे टरलाग फाट्क दुई भाग होगैल्। धर्ती हिल्ल, धेर चट्टान फुट्ल, ५२ धेर गन्या उभकगैल ओ परमेश्वरक मुस्याकल धेर मनै जीगैल। ५३ हुँक्र आपन-आपन गन्यमसे निकल, ओ येशू मुवलमसे फेदोस्त जील त, हुँक्र पवित्र शहरम गैल ओ धेरजन्हकठे देखपल।

५४ भुइँचाल गैलक ओ उहाँ हुइलक सब घट्ना देखक कप्तान ओ हुँकाहारसँग येशूह कुर बैठल सिपाहीहुँक्र जातसे डरागैल, ओ कल, "पक्क फे यी मनैया परमेश्वरक छावा रलह।"

५५ धेर जन जन्नीमनै फे दूरउसे यी सब घट्ना हेर्ट्टिरलह। हुँक्र

गालीलसे येशूक पाछ्व लाग्क आरलहा।  
५६ मगदाला शहरक मरियम, याकूब ओ  
योसेफक डाई मरियम, ओ जब्दियक  
दुइ भाइ छावन्हक डाई रलहा।

### येशूक लाश गन्यम

मर्क्स १५:४२-४७; लूका २३:५०-५६;

युहन्ना ११:३८-४२

५७ दिन बुनसि आघ, अरिमाथिया शहरक योसेफ नाउँ रहल एक जन धनी मनैया अइला। ऊ के येशूक चेला रलहा। ५८ ऊ पिलातसकठे जाक येशूक लाश मड्ल। पिलातस हुँकहीन येशूक लाश लैजिना अनुमति देल। ५९ योसेफ लाश लैजाक एकठो लौव मलमलिक लुगले लपेट्ल, ६० ओ चट्टान खोल्क आपन लाग बनाइल लौव गन्यम उ लाशह ढर्ली। ऊ एकठो बरानक पत्रले गन्यक मोहटा टुमदेल, ओ ओठेसे गैल। ६१ मगदालक मरियम ओ और मरियमजुन गन्यक आघ बैठल रलहा।

### गन्या कुर्ना सुरक्षा टोली

६२ द्वासर दिन, अर्थात् बिसैना दिन, मुख्य पुजेहोन ओ फरिसीहुँक एक साथ पिलातसकठे जम्मा होक कल, ६३ “हजूर, हम्र सम्बलबाटी, कि उ ठगा गधा जिटीह रहल समयम ‘मै मुलक तीसर दिनम फेदोस जिजैम’ कटी

न्याङ्गा। ६४ आब वाकर चेलाव॑ सुटुक्क आक वाकर लाश चोर्क लैजैना भर नैहो। हुँक्र लाश लैजाक ‘उहाँ त मुवलमसे फेदोस जीगैल’ कैक हल्ला फैलाइ सेक्ठ। यदि हुँक्र ओसिक करहीं कलसे, पाच्वक ध्वाखा पैल्हकसे झन खराब हुउइयाबा। उहओसे तीन दिनसम उ गन्या कुरक लाग सुरक्षा टोली खटादी।”

६५ पिलातस हुँकन कल, “ले ठीक बा, सिपाहीन लैजाओ ओ स्याकलसम सुरक्षा देओ।” ६६ तब हुँक्र जाक गन्यह सुरक्षा देहक लाग वाकर मोहटा टुमल पत्रम छाप लगैल ओ सिपाहीन कुर लगैल।

### येशु मुवलमसे फेदोस जीगैल

मर्क्स १६:१-११; लूका २४:१-१२; युहन्ना २०:१-१८

**२८** बिसैना दिनिक द्वासर दिन,  
अट्वारक बिहान अजरार



येशूक लाश गन्यम ढैक म्वाटा

टुमदेठ (२७. ६१)

मत्ती २८:२-१४

८२

हुइल् त, मगदाला शहरक मरियम ओ और मरियम येशूह ढरल गन्या ह्यार गैल।

२ उह समयम एकचोट्टे भारी भुइँचाल गैल, स्वर्गसे परमप्रभुक पठाइल एकठो स्वर्गदूत अइल ओ गन्यक मोहटमसे पत्था उस्टाक ओइहेँम बैठल। ३ हुँकाहार रूप बिज्जीअस चह्कार ओ लुगाजुन हिँअस उज्जर रलहन। ४ गन्या कुरुइयनजुन डरक मार लगलगैटी भुइँयम गिर्ल ओ मुवलअस होगैल।

५ स्वर्गदूत जन्नीमनैन कल, “जिन डराओ, महीह थाहाँ बा, दुळ क्रूसम मुवावापाइल येशूह ख्वाजटो। ६ येशू यिहाँ नैहुइट। आपन कहलअस उहाँ त मुवलमसे जीरल। आक उहाँक लाश ढरल ठाँउ हेरो ना! ७ आब झट्ट जाओ



येशू मुवलमसे जीगैल कैक स्वर्गदूत ख्बर देठ (२८.७)

ओ उहाँक चेलन ‘प्रभु त मुवलमसे फेदोस्त जिरल। उहाँ दुहनसे आघ गालीलम जैटीबाट, दुळ उहाँह उहाँ देख्बो’ कैक ख्बर देओ! मै दुहन यिह कह अइनहुँ।”

८ उ जन्नी मनैन डर-डर फे लग्लन, ओ एकदम खुशी फे लग्लन। हुँक गन्यमसे निक्रल ओ उहाँक चेलन स्वर्गदूतक कहल बात जनाइक लाग दगुर्टी गैल।

९ येशू हुँकन एकचोट्टे भेटैल ओ कल, “दुहन शान्ति ह्वाए!” तब हुँक उहाँक पाउ पकर्क उहाँह दण्डवत कर्ल। १० येशू हुँकन कल, “जिन डराओ, जाओ ओ म्वार चेलन गालीलम जाइक लाग कैदेओ। हुँक महीह उहाँ देख्हाँ।”

### गन्या कुरुइयन्हक ख्बर

११ उ जन्नी मनै येशूक चेलन ख्बर देह गैल् ब्याला, गन्या कुर बैठल कुछ सिपाहीहुँक शहरम जाक उहाँ हुइल् सब घटना मुख्य पुजेहोन्हकठे बट्वादेल। १२ मुख्य पुजेहोन और अगुवन्हकसँग जम्मा होक सरसल्लाह कर्ल। हुँक आपन बनाइल योजना अनुसार सिपाहीहुँकन धेर घूस देटी कल, १३ “दुळ ‘रात्क हम्र निंदाइल ब्याला येशूक चेलावँ आक वाकर लाश चोर्क लैगिल’ कहहो हाँ। १४ यदि शासक यी बात सुन्दरहाँ कलसे, हुँकहीन मनुइया हम्र बाटी, दुहन याकर बारेम कुछु चिन्ता कर नैपरी।”

१६ उसिपाहीहुँक्र पैसा लेल ओ मुख्य पुजेरोन्हक सिखाइल अनुसार कर्ला। यहूदीन्हक बीचम आझुक दिनसम फे यी बात फैलल बा।

### महान आज्ञा

१७ एधार जन चेलाव॑ येशू हुँकन कहल अनुसार गालीलम रहल पर्वत्वम गैल। १८ येशूह देखल त हुँक्र उहाँह दण्डवत कर्ल, तर कत्रा जहनजुन ‘येशू हुइट कि नाहीं’ कैक शड्का

लगलन। १९ तब येशू हुँकन्हकठे जाक कल, “हेरो, स्वर्ग ओ पृथ्वीम सारा अधिकार महीह देगैल् बा। २० आब सब जातिक मनैन्हकठे जाक हुँकन चेला बनाओ, ओ बाबा, छावा ओ पवित्र आत्मक नाउँम हुँकन बप्तिस्मा देओ।

२१ ओ मै टुहन देहल सारा आज्ञा हुँकन पालन कर सिखाओ। मै संसारक अन्त्य हुइना दिनसम फे टुन्हकसँग पलरहुइया बाटु।”



येशू आपन चेलन सारा मानव जातिन प्रचार कर्ना आज्ञा दिहट (२८.२०)



# शब्दक अर्थ

(नोट: ठुल अक्षरम लिखौल् थारु शब्दक पाछ कोष्ठम नेपाली शब्द फे देगैल् बा।)

## अगमवक्ता /अगमवाणी

अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोल्ना व्यक्ति या परमेश्वरक प्रवक्ता हुइट। अगमवक्तह कबुकाल “परमेश्वरक जन” (व्यवस्था ३३:१; १ शमूएल ९:६), ओ कबुकाल “परमेश्वरक दास” (२ राजा १०:१०; १७:१३) कैगिल् बा। हुँकन्हक ब्वालल् वचनह अगमवाणी कैजाए। अगमवक्तहुँक्र परमेश्वरक स्वभाव, इच्छा, योजना, अर्ती, चेतावनी, ओ न्याय सम्बन्धी वचन मनैन देहैंट। हुँक्र परमेश्वरसे पाइल वचन मनैन देना क्रमम कबुकाल भविष्यम हुइना घटनक बारेम फे कहैंट। उदाहरणक रूपम एलीशा (२ राजा ६:१२) ओ आमोस (आमोस १ ओ २ अध्याय)। कुछ अगमवक्ताहुँक्र परमेश्वरक वचन लिख्न। पुरान नियमम हुँकन्हक लिख्न किताब धेर बा। उ समयम झुटा अगमवक्ताहुँक्र फे रलह। हुँक्र आपन मनक बात बट्वाइँट, तर

परमेश्वरसे पाइल वचन कैक दाबी करैंट। परमेश्वर हुँकन नैबलैललन तर हुँक्र अपन्हे अगमवक्ता बन्लह। हुँक्र मनैन परमेश्वरक आज्ञापालन कर लगाइक लाग नाहीं तर आपन स्वार्थी इच्छा पूरा करक लाग वचन ब्वालैंट। जे होस्, परमेश्वरक अगमवक्ताहुँक्र राजदरवारम सल्लाह देना काम करैंट। हुँक्र देशम न्याय, नैतिकता ओ पवित्रता कायम हुइपर्ना बातम जोड्देहैंट। हुँक्र देशम आत्मिक अगुवक रूपम धेर महत्वपूर्ण देन देरख्ल। लौव नियमम फे अगमवक्तन्हक सेवा उल्लेख कैगिल् बा। पवित्र आत्मा विश्वासीहुँकन मण्डलीक हितक लाग अगमवाणी बोल्ना वरदान देठ (१ कोरिन्थी १२:१०)। पैल्ह शताब्दीम मण्डली स्थापना कर्ना कामम प्रेरितन्हक सँगसँग अगमवक्ताहुँक्र फे धेर देन देल।

## अगुवा (धर्मगुरु)

अगुवन कलक यहूदी समाजक गन्यमान्य मनै रलह। इस्राएल देशक इतिहास ह्यारबेर, अगुवन शासकअस

अधिकार कर्लरलह कना बात देखपर्ठा (व्यवस्था ३१:२८) ओ हुँक्र समाजम न्यायनिसाफ करुइयन फे रलह (व्यवस्था १६:१८; १९:१२)। येशूक समयम हुँक्र फे येशूह धर्मक बातम फँसाइक लाग मुख्य पुजेह्वोनसे ओ धर्मगुरुनसे मिल्क सँगसँग काम करँट। आखिरीम येशूह क्रूसम मुवैनाम हुँकन्हक फे हाँठ रलहन (मर्कूस ८:३१; १४:४३-६५; १५:१-१५)। हेरी “महासभा”, “पुजेह्वा”, ओ “धर्मगुरु”।

### अचम्मक काम (आश्चर्यकर्म)

मनैन्हक हिसाबले, धेर समय लग्ना काम (जस्त: च्वाग लागल मनै चोखैना) तुरुन्त हुइल् कलसे, ओ जीन्दगीम नैद्याखल या नैसुनल बात देख्लसे या सुन्लसे (जस्त: मुवल मनैया जीयल घटना), हमन अचम्म लगठा।

अचम्मक काम कलक कलकरोन्हक काला देखैना काम नैहो, ओ मन्त्रतन्त्र कैक चमत्कार देखैना काम फे नैहो, तर परमेश्वरक शक्तिले हुइना काम हो। बाइबलम, अचम्मक कामह कबुकाल शक्तिक काम (मर्कूस ६:५), कबुकाल चिन्हा (मर्कूस ८:११-१३) कैगिल वा।

येशू आन्धर (मर्कूस १०:४६-५२), नाङ्गर (मर्कूस २:१-१२), लुल (मर्कूस ३:१-६), लाट, ओ बहिर मनैन चोखैल (मर्कूस ७:३१-३६), ओ च्वागविच्वाग

ओ भूतपन्याटनसे दुःख पाइल मनैन चोखैल (मर्कूस १:२१-२७, ४०-४५; ५:१-३४; ९:१४-२७)। उहाँ मुवल मनैन फे जीयैल (मर्कूस ५:३५-४३; यूहन्ना ११:१-४४)। उहाँ पानीह अङ्गुरिक रस बनादेल (यूहन्ना २:१-११), रोटी ओ मच्छी बहादेल (मर्कूस ६:३०-४४; ८:१-१०), ओ गहिर तल्लोम उप्र-उप्र नेङ्गल (मर्कूस ६:४५-५२)। उहाँक करल उह कामह बाइबलम अचम्मक काम कैगिल वा। येशू रमाइलो कर्ना हिसाबले अचम्मक काम नैकर्ल, तर मनैन्हक आवश्यकता पूरा करक लाग, स्वागकमार, ओ उहाँ वास्तवम परमेश्वर॑ रलह कना बात सावित करक लाग अचम्मक काम कर्लह।

### अनन्त जीवन

अनन्त जीवन कलक यी जीवनम येशू ख्रीष्टक सम्बन्धम रहक जीना ओ मुलसे स्वर्गम जैना जीवन हो (यूहन्ना १७:३-२६; १ यूहन्ना २:२४-२५)। मनै येशूकम विश्वास कर्ल कलसे, हुँकन्हकम अनन्त जीवन शुरु हुइठन (यूहन्ना ३:१६), तर यी जीवनक पूर्णता भर हुँक्र मुलसे केल पैठ (१ कोरिन्थी १५:५२-५४)। हुँक्र पापक क्षमा पैठ ओ परमेश्वरक सन्तान हुइठ (यूहन्ना १:१२; १ यूहन्ना ३:१)।

### अनुग्रह

बाइबलम अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रक कारणले हम्र मुक्ति पैठी (एफिसी २:८; तीतस २:११)। हम्र पापी ओ परमेश्वरक विरोधी रहलम के परमेश्वर आपन छावा येशू ख्रीष्टह हमन मुक्ति देहक लाग पठेल (रोमी ५:८)। येशूक मृत्युद्वारा परमेश्वर आपन पाप स्वीकार कर्ना ओ उहाँकम विश्वास कर्ना मनैन क्षमा देठा। मुक्ति कुई फे कमाइ नैस्याकट, यी त परमेश्वरक अनुग्रहस्वरूप मनैन देगैल वरदान हो।

परमेश्वर आपन अनुग्रहद्वारा इस्त्राएलीहुँकन आपन मनै हुइक लाग रोज्लह (व्यवस्था ७:७-८)। मनै लौव हृदय पैना बात के परमेश्वरक देहल अनुग्रहक वरदान हो कैक अगमवक्ताहुँक बुझल (इजकिएल १८:३१)। परमेश्वरक अपार कृपक कारणले केल मनै उहाँक पवित्र मन्दिरम जाइसेक्ना बात भजनसंग्रहम लिखौल बा (भजनसंग्रह ५:७)।

येशूक सिखाइल वचनम के धेरजसिन अनुग्रहक सिद्धान्त पाजैठा। जस्तै – काम करुइयन्हक आहानम, डान्चे समय केल काम करुइयन फे पूरा ज्याला पैठ (मत्ती २०:१-१६),

बराभ्वाजक आहानम, निउँता पैना असम्भव मनै के भ्वाजम सहभागी हुइ पैठ (लूका १४:१६-२४), हेराइल छावक आहानम, छोट्की छावा दण्ड पैना योग्यक रलसे के घरमा स्वागत कैजिठा (लूका १५:११-२४)।

पावल धेरजसिन चिठीक शुरुम अभिवादन करबेर ओ अन्त्यम आशिषक कामना करबेर “अनुग्रह” शब्द प्रयोग कैरख्ल। पावल, रोमी १:१६-४:२५ म, मनै पापी बाट ओ परमेश्वरसे दूर होरल, तर परमेश्वर आपन अनुग्रहद्वारा हुँक्र कबु के पाप नैकरलअस हुँकनसे व्यवहार कर्ठा। हम्र पापी ओ परमेश्वरक विरोधी रहलम के परमेश्वर आपन छावा येशू ख्रीष्टह हमन मुक्ति देहक लाग पठेल (रोमी ५:८)। परमेश्वरक अनुग्रक कारणले हम्र मुक्ति पैठी (एफिसी २:८; तीतस २:११))।

### अयहूदी

अयहूदी कलक यहूदी जात नैरहल मनै हुइटा। हुँक परमेश्वरकम विश्वास नैकरँट, ओ हुँकन्हक आपन-आपन डिउँता रलहन। उहओर्से यहूदीहुँक्र अयहूदीहुँकन परमेश्वरकम विश्वास नैकरुइयन, अधर्मी ओ पापी सम्झौँट, ओ हुँकन अशुद्ध मानँट (प्रेरित १०:२८)।

## साब्दार्था – शब्दक अर्थ

८८

### अशुद्ध

व्यवस्था अनुसार इस्राएलीहुँक धेर किसिमले अशुद्ध हुइँटः

- व्यवस्थक त्वाकल अशुद्ध पशन्हक शिकार खैलसे (लेवी ११:१-२३)
- पशन्हक या मनैन्हक लाश छुलसे (लेवी ११:२४-२५)
- मजासे रकट नैनिट्रिल शिकार खैलसे (लेवी १७:१४-१६)
- जन्नी मनै लर्का पैलसे (लेवी १२:१-८)
- कोररोग लग्लसे (लेवी १३; मर्कूस १:४०-४४)
- पुरुष मनैन धातुरोग हुइलसे (लेवी १५:२)
- जन्नी मनै मैन्हावारी हुइलसे (लेवी १५:१९)

मौखिक परम्परामसे चल्ती आइल और नियमह के यहूदीहुँक व्यवस्था बराबर मानैँट। यी हिसाबले, अशुद्ध हुइना विषयम हुँकन्हक थप नियम के रलहनः

- यहूदी जात नैरहल मनैनसे सँग बैठक खैलसे (प्रेरित ११:३)
- यहूदी जात नैरहल मनैन छुलसे
- खाना खैनासे आघ रीत अनुसार हाँठ नैधुइलसे (मर्कूस ७:१-४)

तर अशुद्ध कना चिज मनक बात हो ओ कुछु रीतिरिवाज अनुसार चल्क

हुइना बात नैहो कैक येशू कल। उहाँ कल, “पाप काम सौँच्लसे या कर्लसे परमेश्वरक नजरम मनै अशुद्ध हुइठ (मर्कूस ७:२०-२३)। परमेश्वरक नजरम अशुद्ध हुइल मनै कुछु संस्कार पूरा कैक शुद्ध हुइ नैसेक्ट, तर येशूक रकटले केल शुद्ध हुइसेक्ठ।

### इस्राएली

हेरी “यहूदी”।

### एल्डर

अघटे जमानम धेरजसिन समाजम अनुभवी, परिपक्व, गन्नेमान्ने ओ प्रभावशाली मनै सामाजिक छलफल ओ क्रियाकलापम महत्वपूर्ण देन देना योग्य व्यक्ति मानजाइँट। हुँक्र एल्डर कैजाइँट। इस्राएल देशम फे समाजम सरसल्लाह देहक लाग, न्यायनिसाफ ओ शासन करक लाग एल्डरहुँक रलह। पुरान नियमम इस्राएलीन्हक बीचम हुँकन अगुवाइ करक लाग परमेश्वर एल्डर नियुक्त करँट् (प्रस्थान २४:१)। लौव नियमम मण्डलीम प्रचार कर्ना, सिखैना, सञ्चालन कर्ना, रेखदेख कर्ना मनै एल्डरहुँक रलह (प्रेरित ११:३०; १५:६; २०:१७)। जस्तै यूहन्ना एकठो एल्डर रलह (२ यूहन्ना १), पत्रुस एकठो एल्डर रलह (१ पत्रुस ५:१)। पावल तीतसह मण्डलीम एल्डरहुँकन नियुक्त कर्ना

आदेश देरख्ल (तीतस १:५)। मण्डली इतिहासम एल्डरहुँक्र मण्डलीक प्रशासनिक कामकाज करक लाग ओ विश्वासीहुँकन वचन प्रचार करक लाग, सिखाइक लाग, ओ हुँकन्हक आत्मिक जीवनक रेखदेख करक लाग अधिकार पाइल् अगुवन रलह।

एल्डरहुँकन्हक नियुक्ति, आवश्यक चारित्रिक गुण ओ व्यवहार सम्बन्धम थप जानकारीक लाग १ तिमोथी ३:१-१७; ४:१४; ५:१७-२२; तीतस १:५-९; याकूब ५:१४; १ पत्रुस ५:१-४ हेरी।

### कयिन

आदम ओ हव्वक बर्का छावा कयिन रह (उत्पत्ती ४:१)। हुँकन्हक मन्हला छावा हाबिल रह (उत्पत्ती ४:२)। कयिन आपन भैया हाबिलक हत्या करल (उत्पत्ती ४:८)। वास्तवम वाकरम दुष्ट स्वभाव रलहस। वाकरम परमेश्वरक दण्ड पर्लस, ओ ऊ परमेश्वरसे दूर हुइल्। हम्र कयिनअस नैहुइपरट (१ यूहन्ना ३:१२)। कयिनक बारेम थप जानकारी पाइक लाग उत्पत्ति ४:१-२४ हेरी।

### क्रूस

क्रूस दुझठो कट्ठोले बनल रठा। एकठो ठाहर कट्ठोम और ब्याँर कट्वा टाँसल रठा। रोमी सरकारक समयम, रोमीहुँक्र मृत्युदण्ड पैना अपराधीन

असिन क्रूसम टड्गाक मुवाइँद। हुँक्र अपराधीन्हक हाँठ-ग्वारम कील्ला ठोकक टड्गाइँद। असिक टाइगलम कौनो-कौनो अपराधीन मुना दुई-तीन दिन फे लागना। टड्गागैल् अपराधीहुँक्र झट्ट मुहीं कैक, रोमीहुँक्र कबु-कबु हुँकन्हक ग्वारा दुरदिहँद (यूहन्ना १३:३ १-३३)।

येशु ख्रीष्ट रोमीहुँकनसे मृत्युदण्ड पाक क्रूसम टड्गावापैल (मर्क्स १५:१३-१५, २०-३२)। हम्र पाइपर्ना पापक मृत्युदण्ड क्रूसम मुक येशु भोगला। (मर्क्स १०:४५)।

### खतना

लिंगक दुप्पक छाला काट्क फैक्ना यहूदी विधिह खतना कैजिठा। शुरुम परमेश्वर अब्राहाम ओ हुँकाहार सन्तानन् खतना कर्ना कैक आज्ञा कर्ल। उ खतनाचाहीं यहूदीहुँकनसे परमेश्वरक करल बाचक चिन्ह रह। यहूदीन्हक छावा लर्का जर्मलसे, हुँक्र लर्का जर्मलक आठवाँ दिनम उ लर्कक खतना करँद। उह फे मुक्ति पाइक लाग खतना कर्लक कुछु फाइदा नैरह (गलाती ५:६)। वास्तवम खतना कर्ना पक्का यहूदी बन्ना चिन्ह फे नैहो (रोमी २:२८-२९)। उहओर्से अयहूदी ख्रीष्टीयनहुँकन खतना कर्ना कुछु आवश्यक नैहो (प्रेरित १५:५-११)।

### खुशिक खबर (सुसमाचार)

साधारण हिसाबले खुशिक खबर कलक मजा खबर हो। तर बाइबलम, खुशिक खबर कलसे एकठो विशेष अर्थ लगठा। धेर वर्ष आघ, परमेश्वर इस्त्राएलीन मुक्ति देना बाचा कैरखलह (यशैया ९:१-७)। परमेश्वर उ बाचा येशू ख्रीष्टकम पूरा कर्ल ओ सक्कुजन्हक लाग मुक्तिक ड्वार खोलदेल (कलस्सी १:१३)।

खुशिक खबर कलक यिह हो कि येशू ख्रीष्ट सारा संसारह मुक्ति देना परमेश्वर हुइट, ओ उहाँ मनैन पापमसे मुक्ति दिहक लाग यी संसारम अइल (१ पत्रुस २:२४; रोमी ६:२३)। पापमसे मुक्ति पाइक लाग, मनै येशू ख्रीष्टकम विश्वास कर्ना बाहेक और कुछु कर नैपरट (यूहन्ना १:१२; ३:१६)। मनैन्हक लाग सबसे खुशिक खबर यिह हो।

### दया

दया कलक औरजन्हकम दुख, अभाव, आपतविपत परल समयम, हुँकन सहायता करक लाग मनम अइना एकठो भावना हो। यहीह कबुकाल कृपा या निगाहा फे कैजिठा। परमेश्वर गरीब मनैन, टुवर लर्कन, विधवन ओ अरदेशीपरदेशीन दया करपर्ठा कैक आपन वचनम कैरखल (भजनसंग्रह १४६:९; हितोपदेश

१९:१७; जकरिया ७:९-१०; मीका ६:८)। परमेश्वर आपन करल सारा सृष्टिम दया कर्लबाट (भजनसंग्रह १४५:९), ओ उहाँ हमन दया कर्लक कारण हम्र मुक्ति पारख्ली (एफिसी २:४; तीतस ३:५)। येशू आपन चेलन कल, “टुन्हक स्वर्गक परमेश्वर बाबा दयालु रहलअस, टुह फे दयालु होओ” (लूका ६:३६)। एकठो मुवमुव मनैयह देख्क सामरीया क्षेत्रक मनैयह दया लग्लन् (लूका १०:३३)। दया एकठो भावना हो, जेहीह कामले ओ व्यवहारले व्यक्त कैजिठा।

### दर्शन

दर्शन कलक सपनम, या ध्यानमग्न रहलम, या एकदम उत्साहित अवस्थम कौनो मनैया आपन मनम परमेश्वरसे प्रकट करागैल् अलौकिक बातक घट्ना देख्ना हो। दर्शन द्याखल मनैन्हक मनम विशेष घट्नक चित्र अइठन या एकठो स्पष्ट विचार अर्थात् अवधारणा सूजना हुइठन। कर्नेलियस दिनक तीन बजेओर दर्शनम परमेश्वरक पठाइल एकठो स्वर्गदूतह आपनओर आइद देख्ल (प्रेरित १०:३)। पत्रुस प्रार्थना कर्टिकटी ध्यान-मग्न हुइल ओ दर्शन देख्ल (प्रेरित १०:१०)। पावल दर्शनम माकेडोनिया क्षेत्रक एकठो मनैयह देख्ल (प्रेरित १६:९)।

## दाऊद

दाऊद इस्त्राएलीन्हक सबसे नाउं चलल् राजा रलहा। उहाँ परमेश्वरकम धेर विश्वास करँट्। ऊ येशू ख्रीष्ट जर्मनासे लगभग १०४० वर्ष आघ जर्मलह ओ चालीस वर्षसम इस्त्राएल देशम राज्य कर्लहा। ऊ इस्त्राएलक राजधानी यरुशलेमम स्थापना कर्ला। हुँकाहार शासनकालम, परमेश्वरक सहायताले, इस्त्राएल देश बरा ओ शक्तिशाली हुइल्। इस्त्राएलीहुँक्र दाऊद राजा पैलकम धेर गर्व करँट्, ओ अझना ख्रीष्ट दाऊदजसिन रना बात फे कल्पना करँट्। ऊ ख्रीष्ट आपन मनैन मुक्ति देर्हीं ओ दाऊदक सिंहासनम बैठक सड्डभर राज्य कर्टीरहीं कना हुँकन्हक आशा रलहन। येशू ख्रीष्ट दाऊदक वंशमसे जन्मलह (मत्ती १:१, २०; लूका १:२६-२७, ३२-३३)।

## धर्मगुरु (शास्त्री)

धर्मगुरु कलक खास कैक पुरान नियमक व्यवस्था ओ व्यवस्थमसे आइल परम्परा अध्ययन कर्ना, अर्थ लगैना, ओ मनैन सिखैना यहूदी विद्वान रलह। धेर जसिन धर्मगुरुहुँक्र फरिसी या सदुकी समूहक सदस्य रलह। येशू धेर लोकप्रिय हुइलकओर्से, हुँक्र के आपन अधिकार लिहावापाडर्ठी कि कैक डरारलह। उहओर्से हुँक्र के येशूह धर्मक बातम फँसाइक लाग लागलरलह

(मर्कूस ७:१-६; ११:२७)। आखिरीम येशूह क्रूसम मुवैनाम हुँकन्हक फे हाँठ रलहन (मर्कूस ८:३१; १४:४३-६५; १५:१-१५)। हेरी “महासभा”, “पुजेह्वा”, ओ “अगुवा”।

## नरक

बाइबलक हिसाबले, मनै मुलसे, कि त नरकम जैठ, कि त स्वर्गम जैठ। नरक कलक येशूकम विश्वास नैकरुयन, ओ शैतान ओ वाकर पाछ्य लगुइयन दण्ड देना ठाउँ हो। ऊ सह नैसेकजैना दुःख भोग्ना ठाउँ हो, ओ उहाँ गैल् मनै कबु फे उम्कसेकुइया नैहुइट (मत्ती १८:८; २५:४१-४६; मर्कूस ९:४२-४८; यहूदा ६-७; प्रकाश २०:१०)।

## न्यायक दिन

न्यायक दिन कलक इतिहासक अन्तिम दिन अर्थात् परमेश्वर सारा जगतक अन्तिम न्याय कर्ना दिन हो। ऊ दिन संसारक अन्त्य हुउइयाबा ओ सबजन्हक अनन्त गनतव्य तोकजउइयाबा। परमेश्वरक प्रकट हुइल् इच्छम मनैन्हक जनाइल प्रतिक्रियक आधारम हमार न्याय कैजउइयाबा। हमार करल अनुभव, मनक विचार, मुहक बोली ओ करल क्रियाकलापह हमार न्याय कर्ना आधार मानजउइयाबा। परमप्रभु परमेश्वर सत्य-सत्यसे हरेक व्यक्तिक न्याय

करुइयाबाट ओ उहाँक करल न्याय सब  
जन स्वीकार करुइयाबाट।

### परमेश्वर

परमेश्वर आत्मा हुइलकओर्से,  
उहाँह द्याख नैसेकजाइट (रोमी  
१:२०; कलस्सी १:१५; १ तिमोथी  
१:१७; ६:१५-१६)। तर फे बाइबलम  
का लिखल वा कलसे उहाँ बोल्ठ  
(उत्पत्ती ३:८-१९; ९:१६; मर्कुस  
१:११), सुन्ठ (अच्यूब ३४:२८;  
भजनसंग्रह ११६:१), देख्छ (भजनसंग्रह  
३३:१३-१४; हितोपदेश ५:२१),  
रिसैठ (प्रस्थान २२:२४; रोमी १:१८,  
प्रेम कर्ठ (यूहन्ना ३:१६), ओ सोगैठ  
(हिन्दू ४:१५-१६)। परमेश्वर एक  
समयम सब ठाउँम बाट (भजनसंग्रह  
१३९:७-१०; यर्मिया २३:२३-२४),  
उहाँ सब चिज जन्ठ (भजनसंग्रह  
१३९:१-४; दानियल २:२०-२२),  
उहाँ सक्कुनसे शक्तिशाली बाट (अच्यूब  
४२:२; लूका १:३७), उहाँ सङ्डभर  
पलबाट ओ पलरहुइयाबाट (१ तिमोथी  
१:१७; प्रकाश ११:१७; १५:७), ओ  
उहाँ कबु फे पाप नैकर्ल ओ कबु फे पाप  
करुइया नैहुइट (याकूब १:१३ १; पत्रुस  
१:१:१५)।

उहाँ स्वर्ग, पृथ्वी ओ उहिम रहल  
सबचिज सृष्टि कर्ल (यर्मिया ५१:१५;  
हिन्दू २:१०)। उहाँ मनैन्हक भलो चहठ  
(यर्मिया २९:११)। उहओर्से परमेश्वर

मनैन पापमसे मुक्ति देना योजना  
बनाक उह अनुसार काम कर्ल। येशू  
ख्रीष्टकम विश्वास कर्लसे मुक्ति पैना  
बात बाइबलम लिखल वा (रोमी  
५:१०; हिन्दू २:१४-१५)।

परमेश्वर तीनठो व्यक्तित्वम बाटः  
बाबा परमेश्वर, छावा परमेश्वर, ओ  
पवित्र आत्मा परमेश्वर (मर्कुस १:१०-  
११)। ख्रीष्टीयन इतिहासम यहीह  
त्रिएक परमेश्वर कैगिल् वा। हम्र  
बाइबलम का देख्छी कलसे, हुइना त  
परमेश्वर तीनठो व्यक्तित्वम बाट, तर  
उहाँ एकठो परमेश्वर हुइट, तीनठो  
परमेश्वर नैहुइट (व्यवस्था ६:४)।

### परमेश्वरक छावा (परमेश्वरको पुत्र)

परमेश्वर तीनठो व्यक्तित्वम बाटः  
परमेश्वर बाबा, परमेश्वर छावा,  
ओ परमेश्वर पवित्र आत्मा। येशू  
ख्रीष्ट परमेश्वरक छावा हुइट।  
परमेश्वरक छावा रलसे फे, उहाँ  
परमेश्वर बाबक सृजाइल नैहुइट।  
कन्या मरियमक कोखिमसे जरमक  
उहाँ परमेश्वरक छावा हुइलक नैहुइट।  
उहाँ सङ्डभर परमेश्वरक छावा  
पलबाट ओ पलरहुइयाबाट। उहाँ  
अधिकार, शक्ति, आदर, ओ अस्तित्वम  
परमेश्वर बाबसे कम नैहुइट। उहाँकम  
परमेश्वरकम रहपर्ना गुण रलकओर्से,  
उहाँ परमेश्वर द हुइट (यूहन्ना  
१:१-२; कलस्सी १:१५-२०; हिन्दू १)।

येशु ख्रीष्ट मनैया होक यी संसारम  
जरम लेल त, उहाँकम मनैन्हक गुण  
फे थपगैलन। उहाँ परमेश्वर बाबक  
आज्ञाकारी होक जील ओ क्रूसम मुल।  
मनैया हुइलकओर्से, उहाँ क्रूसम मुवबेर  
सारा मनैन्हक प्रतिनिधित्व कर्ल ओ  
सबजन्हक पाप बोकल (हिब्रू २:५-  
१८)।

### परमेश्वरक राज्य (परमेश्वरको राज्य)

परमेश्वरक राज्य संसारक  
राज्यअस नैहो। उहाँक राज्यम  
भौगोलिक सिमा नैरहट, राजनैतिक  
पार्टी नैरहट, वर्गीय ओ जातिय  
भेदभाव नैरहट। परमेश्वरक राज्य  
कलक परमेश्वरक शासन हो। उ  
शासनम परमेश्वर राजक रूपम  
शासन कर्ठ, तर परमेश्वर निरङ्कुश  
शासन नैचलैट। उ शासनम अन्याय,  
अत्याचार, शोषण, दमन, या  
भ्रष्टाचार कुछु नैहो।

उहाँक शासन त धार्मिक, न्यायिक,  
ओ पवित्र बाटन। उहाँ प्रेमम, शान्तिम,  
मिलापम, एकताम राज्य कर्ठ  
(भजनसंग्रह १४५; यशेया ९:१-७)। उ  
राज्य मनैन्हक मनम स्थापित हुइना  
राज्य हो। मनम परमेश्वरक राज्य  
स्थापित हुइल् मनै आपन जीवनम  
परमेश्वरह शासन कर देठ।

### परमेश्वरक सन्तान

परमेश्वरक सन्तान हुइना कलक  
मानवीय डाईबाबक सन्तान हुइनासे  
धेर फरक बात हो। उहाँक सन्तान  
हुइना कलक विशेष अनुग्रह, महान  
आशिष ओ उच्च सम्मान पैना बात  
हो। येशूह स्वीकर कर्ना ओ उहाँकम  
विश्वास कर्ना मनै परमेश्वरक सन्तान  
हुइना अधिकार पैठ (यूहन्ना १:१२)।  
परमेश्वरक सन्तान कलक उहाँक गुण  
या स्वभाव रहल मनै अर्थात् पवित्र  
आत्मासे जन्मल मनै हुइट (यूहन्ना  
३:६)। उहाँक सन्तान हुइल् मनै ठीक  
काम कर्ठ (१ यूहन्ना २:२९), पाप  
कर्टी नैरट (१ यूहन्ना ५:१८), पाप कर  
नैसेक्ट (१ यूहन्ना ३:९), प्रेम कर्ठ (१  
यूहन्ना ४:७), येशू जो ख्रीष्ट हुइट कैक  
विश्वास कर्ठ (१ यूहन्ना ५:१)।

### पवित्र आत्मा

पवित्र आत्मा कलक परमेश्वर  
हुइट (प्रेरित ५:३-४; २ कोरिन्थी  
३:१७-१८)। येशु ख्रीष्टकम विश्वास  
कर्ना मनैन्हकम पवित्र आत्मा बास  
कर्ठ (रोमी ५:५; ८:९)। पवित्र आत्मक  
सहायताले, ख्रीष्टीयनहुँक येशूह  
परमेश्वरक छावा कैक प्रचार कर्ठ  
(प्रेरित १:८), बाइबलक वचन बुझना  
शक्ति पैठ (यूहन्ना १६:१३), सेवा  
कर्ना अगुवाइ पैठ, आत्मक फारा  
फराइ सेक्ठ, पापम नैफँस्ट, ओ लौव

जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, पवित्र आत्मा ख्रीष्टियनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।

### पानीजहाज

पानीजहाज समुद्रम चल्ना एकठो साधन रह। यी मालसामान औसारपसार करक लाग ओ यात्रा करक लाग प्रयोग कैजाए। पावल धेरजसिन पानीजहाजम चिहुर्क मिसनरी यात्रा कर्ला। पावल पकाउ पर्ल त पाछ्छ, हुँकहीन पानीजहाजम चिउहाक रोमम लैगिलिहिन। उ जहाजम २७६ जन मनै रलह (प्रेरित २७:३७)। समुद्रम चल्तीरहल पानीजहाजह च्वाकपरल कलसे, हुँक्र जहाम बान्धल लङ्गर पानीम खसादेहँट (प्रेरित २७:२९)। ओ च्वाकल जहाजह चलाइपरल कलसे, हुँक्र पानीम खसाइल लङ्गर ज्ञिकदेहँट (प्रेरित २७:४०)।

पानीजहाजक प्रयोगले मनैन्हक जनजीवन सजिलो रलहन। तर मौसम खराब रहल समयम जहाजक प्रयोग धेर खतरा के रह। हिँदम समुद्रम आँधीबौखा अइना हुइलकओर्से उ समयम यात्रा कर्ना खतरा रह

(प्रेरित २७:९)। कबुकाल पानीजहाज ध्वस्त के होजाए (प्रेरित २७:४१; २ कोरिन्थी ११:२५)।

### पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सकु खराब विचार (जस्त: ल्वाभ कर्ना, हेल्हा कर्ना, बिहू मुना, घमण्डी हुइना, ओ मूर्ख हुइना) ओ सकु खराब काम (जस्त: बेश्या काम कर्ना, चोर्ना, हत्या कर्ना, झग्ना कर्ना, लभना, ठग्ना, बदला लेना) हो (मर्क्स ७:२१-२२; गलाती ५:१९-२१)। पाप परमेश्वरक विरोधम हुइना काम हो, ओ सबसे छिटिमिटि पाप काम के परमेश्वरक नजरम नैमजा काम हो। पाप मनैन परमेश्वरसे अल्गैलरठा (रोमी ६:२३)। पाप कर्लक कारण मनैन्हक जीवनम डर, शरम, ओ दुःख आइल (उत्पत्ती ३)। अत्र केल नैहोक, मनै मुव पर्ना के हुइल (रोमी ६:२३)।

पाप साधारण बात नै हो। बास्तवम मनै पापक बन्धनम परल बाट। पापक यी बन्धनमसे मनै अपन्हे मुक्ति पाइ नैसेकट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा ओ येशूकम विश्वास कैक

परमेश्वरकठे आइपर्ठा (मर्कुस १:४; यूहन्ना ३:१६)।

पापमसे मुक्ति पैना कलक पापक दण्डसे बच्ना हो। हुइना त, येशूकम विश्वास करुइयन पूरा रूपम पापमसे अल्पैना सम्भव नैहो, तर, परमेश्वरक आत्मक सहायताले, हुँक्र आपन मनह पापओर जाइ नैदेना सम्भावना भर बा। असिक, हुँक्र परमेश्वरक उपस्थितिम आनन्दित ओ स्वतन्त्र जीवन जीठ (रोमी ६:८)।

### पापी मन घुमाक परमेश्वरकठे अइना (पश्चात्ताप)

“मै पापी हुइटुँ, परमेश्वरसे म्वार बिग्रल्सम्बन्ध ठीक बनाइपर्ना बा” कैक सौँच्ना, ओ “पाप घिनलगिटक गल्ती बात हो ओ मै आपन जीवनम पाप नैचहटुँ” कैक निर्णय कर्ना काम पापी मन घुमाक परमेश्वरकठे अइना हो (मर्कुस १:४-५)। पापी मन घुमाक परमेश्वरकठे आइल मनैन्हक सौँचविचार, कामकाज, रहनसहन, सक्कु क्षेत्रम, परिवर्तन हुइलरठन (प्रेरित २६:१९-२०)।

ख्रीष्टीयन जीवनम आपन पापी मन घुमाक परमेश्वरकठे अइना सबसे पैल्हक कदम हो। पापी मन घुमाक परमेश्वरकठे अइना शक्ति परमेश्वर देठ। पापी मन घुमाक परमेश्वरकठे नैआइट्सम, पापमसे छुटकारा पैना

सम्भव नैहो (हितोपदेश २८:१३; मत्ती ५:३-४; मर्कुस १:४, १५; प्रेरित २:३७-३८; २०:२१; २ कोरन्थी ७:१०; २ पत्रुस ३:९)।

### पिलातस

पिलातस रोमी सम्राट सिजर तिबेरिअसक नियुक्त करल बडाहाकिम रलह। उ यहूदीया क्षेत्रक पाँचाँ बडाहाकिम रलह। उ ईस्वी सन् २६ से ३७ सम यहूदीया क्षेत्रम शासन कर्ल (लूका ३:१)। हुँकाहार शासनक केन्द्रीय कार्यालय सिजरीयम रलहन, तर के उ टैटिहारक समयम यरूशलेम शहरक जनजीवन सामान्य करैलराखक लाग उहैं रहैंट (मत्ती २७:२७)। शासक रलकओर्से अपराधीन मृत्युदण्ड देना लगायत उ क्षेत्रक सारा अधिकार हुँकाहार हाँठम रलहन। उ यहूदी महासभक करल निर्णयह समेत उल्ट्याइ स्याकैंट। उ प्रधान पुजेहोह नियुक्त करैंट ओ मन्दिरह आपन अधीनम ढरैंट। हुइना त ऊ धेरजसिन सिजरीयम रहैंट, तर यरूशलेम आइल ब्याला शहरक गस्ती करक लाग थप सेना आनराखैंट।

“मुक्ति-दिवस” कना यहूदीन्हक टिहारक समयम पिलातस यरूशलेमम रलह। उह समयम यहूदीहुँक्र येशूह पकर्क पिलातसक हाँठम सुम्पलह (लूका २३:१)। येशू निर्दोष बाट कना

बात जन्टीजन्टी ऊ येशूह दोषी ठहैल  
ओ कूसम टड्गाक मुवैना आदेश देल।

### पुजेह्वा (पूजाहारी)

बाइबलक समयम यहूदी / हिन्दू पुजेहोन परमेश्वर ओ मनैन्हक बीचम रहक काम करँट। हुँक्र मोशक डाडु हारुनक सन्तान रलह। खास कैक मन्दिरक सरसामान रेखदेख कर्ना, ओ परमेश्वरह आराधना ओ परमेश्वरसे पुकारा कर्ना कामम अगुवाइ कर्ना, हुँकन्हक जिम्मा रलहन (प्रस्थान २७:२०-२१; २९:३८-४४; लेवी ६:१२; १०:११; २४:८; गन्ती १०:१-१०; व्यवस्था १७:८-१३; ३३:१०; मलाकी २:७)। पुजेहोन परमेश्वरक बात मनैन जनादिहैंट (मलाकी २:७)।

लौव नियमम हम्र तीन तहक पुजेहोन देछ्ठी। साधारण पुजेहोन छ्वार पुजेहोन्हक और दुई वर्ग रलहन: प्रधान पुजेह्वा ओ मुख्य पुजेहोन।

प्रधान पुजेह्वा: प्रधान पुजेह्वा एकठो केल रहैंट, ओ उ यरूशलेमम रहैंट। येशूक समयम प्रधान पुजेह्वा कैयाफास रलह (मत्ती २६:५७)। प्रधान पुजेह्वा केल मन्दिरक महापवित्र ठाउँम (वर्षम एक दिन केल (लेवी १६:२-३)) बलि चहाइल पशक रकट छिट, ओ यहूदीन्हक पापक क्षमा

माझ्गक लाग परमेश्वरसे प्रार्थना कर जाइ स्याकैट् (हिन्दू ९:७)।

मुख्य पुजेहोन: मुख्य पुजेहोन एक समूहक मनै हुइट, ओ हुँकन्हक अधिकार साधारण पुजेहोन्हकसे धेर रलहन। ७१ जन सदस्य रना महासभम (यहूदी सर्वोच्च अदालत) मुख्य पुजेहोन कार्यकारी समितीअस रलह। मुख्य पुजेहोनम समावेश हुइना मनै हिँक रलह: प्रधान पुजेह्वा, हुँकाहार घरक मनै, और बर-बर पुजेहोन्हक घरक मनै, मन्दिरक डोरपालेन्हक कप्तान, ओ आघक प्रधान पुजेहोन। येशूह कूसम मुवैनाम, धर्मगुरुन्हक ओ अगुवन्हक सँगसँग, हुँकन्हक बरा हाँठ रलहन (मर्कूस ८:३१; १४:४३-६५; १५:१-१५)। हेरी “महासभा”, “धर्मगुरु”, ओ “अगुवा”।

### प्रभु-भ्वाज (प्रभु-भोज)

कूसम टड्गावापाइल दिनिक आघक रात, येशू आपन चेलनसे मुक्ति-दिवसक खाना खाइबेर, प्रभु-भ्वाजक शुरु कर्लह (मर्कूस १२:२२-२५)। मुक्ति-दिवसक खाना खाइबेर, इस्वाएलीहुँक रोटी खाइंट ओ अझ्गुरिक रस पियैंट।

मुक्ति-दिवसक खाना खैटी-खैटी, येशू एकठो रोटी लेक खन्टिखन्टा पर्ल ओ आपन चेलन देल। येशू कल, “यी म्वार शरीर हो।” रोटी उहाँक शरीरक संकेत रह कना उहाँक आशय रलहन। रोटी

खन्टिखन्टा हुइलअस, उहाँक शरीर मन्वा पाक घाउ केल हुउइया रलहन (यशैया ५३:१-१२; मर्क्स १५:१६-१९).

दोस्र, अङ्गुरिक रस पिएबेर, येशू कल, “यी म्वार रकट हो” अङ्गुरिक रस उहाँक रकटक संकेत रह कना उहाँक आशय रलहन। उ रकट उहाँ मुवावापैना बातह जनाए। परमेश्वर इस्त्राएलीनसे करल बाचह जनावरन्हक रकटले छाप लगाक पक्का कैगिलाहा (प्रस्थान २४:६-८), ओ घरी-घरी बलिक आवश्यक परा तर परमेश्वर मनैनसे कर्लक लौव बाचह येशूक रकट छाप लगैठा, ओ और बलिक आवश्यक नैपरट (हिन्दू १०:१८)।

इस्त्राएलीहुँक्र आपन पूर्खाँओँ मिश्रदेशक बन्धनमसे छुट्कारा पाइल सम्झनम मुक्ति-दिवस मनाइअस, ख्रीष्टीयनहुँक्र पापक बन्धनमसे छुट्कारा पाइल सम्झनम प्रभु-भ्वाज मन्ठ। प्रभु-भ्वाजक समयम, ख्रीष्टीयनहुँक्र रोटी ओ अङ्गुरिक रस खैठ। उ ब्याला हुँक्र, “येशू क्रूसम मुक हमार पापक दण्ड तिरदेल ओ हमन पापमसे मुक्त करैल,” कना बातक घोषणा कर्ठ (१ कोरिन्थी ११:२३-२६)।

### प्रार्थना कर्ना

परमेश्वरसे प्रार्थना कर्ना कलक साधारण अर्थम ख्रीष्टीयनहुँक्र परमेश्वरसे बातचित कर्ना हो। अत्र केल नैहोक, परमेश्वरसे प्रार्थना कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे पुकारा कर्ना फे हो (दानियल ९:३-२३; १ यूहन्ना १:९)। परमेश्वरसे आपन घटिकमीक माग कर्ना फे हो (याकूब १:५; फिलिप्पी ४:६-८)। यदि हम्म परमेश्वरक आज्ञाकारी जीवन जीलबाटी कलसे, परमेश्वर हमार करल प्रार्थना सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२९)। परमेश्वरसे प्रार्थना कर्ना काम उहाँसे सम्बन्ध बहैना एकठो मजा तरिका फे हो। परमेश्वरसे प्रार्थना कर्लकओसे, उहाँकम विश्वास करल मनैन्हक जीवनम भारी-भारी शक्तिक काम हुइल बाटन (याकूब ५:१३-१८)। उहमार परमेश्वरसे प्रार्थना कर्ना ख्रीष्टयन जीवनक एकठो मुख्य भाग हो।

### प्रेरित

बाइबलम प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक न्वाजल बाह जन चेलावॉ हुँट (मर्क्स ३:१४; ६:३०)। येशू ख्रीष्ट स्वर्गम उठागैल त, उहाँक कामह उह प्रेरितहुँक निरन्तरता देल। हुँक मुवलमसे फेदोस जीलक येशू ख्रीष्टह आपन आँखिले देखलह ओ परमेश्वरक आत्मले भरलरलह। हुँक ठाउँ-ठाउँम मण्डली स्थापना कर्ल, ओ मनैन परमेश्वरक वचन सिखैल। पाछ्य जाक यी बाह जन बाहेक पावल लगायत और मनै के प्रेरितम गनगैल (प्रेरित १४:१४; १ कोरिन्थी ९:१-२)। येशूक न्वाजल, ओ पाछ्य थपगैल, उह प्रेरितहुँक मण्डलीक जग हुइल।

### फरिसी

येशू ख्रीष्ट जर्मनासे लगभग २०० वर्ष आघसे, यहूदी धर्मम, फरिसी ओ सदुकी कैजिना दुइठो मुख्य समूह रलह। धेरजसिन फरिसीहुँक कर्मचारी रलह। यहूदी धर्मम राजनैतिक बात मिलैना ठीक नैहो कना हुँकन्हक विचार रलहना। धेरजसिन धर्मगुरुहुँक, टर्क दर्जक पुजेहोन, ओ अगुवन फरिसी समूहम रलह।

धेर जसिन फरिसीहुँक, धर्मगुरुहुँक समेत, मोशक व्यवस्था ओ पूर्खसे चल्ती आइल यहूदी परम्परा मान

पर्ना बातम धेर ध्यान दिहॄंट (मर्क्स २:२३-२४; ७:१-१३)। छिटी-छिटी रीतीभाँती के एकदम होशियार होक मन्ना हुइलकओसे, हुँक अपन्हेह केल धर्मी सम्झॄंट ओ और मनैनसे अल्ला रहॄंट (मर्क्स २:१६)।

येशू हुँकन महा कर्से डॅट्ल, काजेकलसे हुँक बरे कपटी रलह (मत्ती २३:१३-३६)। हुँक मनैन्हक आघ भर धर्मी देखपर चाहॄंट, तर वास्तवम, हुँक आपन पूर्खसे चल्ती आइल परम्परा मानक लाग, परमेश्वरक वचनह रद्द करॄंट (मत्ती २३:१-७; मर्क्स ७:१-१३; १२:३८-४०)।

येशू धेर लोकप्रिय हुइलकओसे, फरिसीहुँकन आपन अधिकार लिहावापैना डर लगलन। उहओसे हुँक उहाँह मुवाइ चाहॄंट (मर्क्स ३:६)। हुँक सदुकीहुँकनसे मिल्क उहाँक मान ओ लोकप्रियता घटैना उद्देश्यले, धर्मक बातम उहाँह फॅसाइक लग क्योचो कोसिस कर्ल (मत्ती १६:१-१२; २२:२३-४५; मर्क्स १०:२-३; १२:१३-३२)।

फरिसीहुँक मनै मुगैलसे के हुँकन्हक हंसा नैमुटिन, ओ मनै मुवलमसे फेदोस जीजैठ, दोस्र परमेश्वर हुँकन्हक न्याय कर्ठ ओ स्वार्ग या नरकम पठैठ (हिब्रू ९:२७) कैक विश्वास करॄंट (प्रेरित २३:६-८)। हुँक स्वर्गक खबर पुगुइयन जाटीसे रठ कैक के विश्वास करॄंट।

### बन्दरगाह

बन्दरगाह कलक पानीजहाज रोकना समुद्रकिनारक ठाउँ अर्थात् पानीजहाजक स्टेसन हो जहाँ पानीजहाज रोकठा ओ मनै जहाजम चिहुर्ना या उत्रना कर्ठ ओ मालसामान लड्ना या उत्रैना काम हुइठा। बन्दरगाह बनाइक लाग खासकैक बयाल ओ छल्कसे सुरक्षित रहल गहिँर फैलहर समुद्रकिनारक ठाउँ रोजजैठा। पावल ओ और जन रोमम जाइक लाग पानीजहाजम चिहुर्ला। उ पानीजहाज चलल् ओ एशिया क्षेत्रक सुमुद्रक किनारम रहल विभिन्न शहर हुइटी जउइया रहा। एक दिन हुँक लासिया शहरक लग्घ रहल ‘सुन्दर बन्दरगाह’ कना ठाउँम पुग्ल (प्रेरित २७:१-८)।

### बप्तिस्मा

बप्तिस्मा एकठो यहूदी संस्कार रहा। जब यहूदी जात नैरहल मनै परमेश्वरकम विश्वास कर्ना ओ यहूदी धर्मक हिसाबले चल्ना निर्णय करैट, तब बप्तिस्मा लिहैंट। येशूक समयम बप्तिस्मा देहुइया यूहन्ना येशूक लाग मनैन तयार पर्ना कामम, उह बप्तिस्मा संस्कार प्रयोग कर्ला। मनै आपन-आपन पाप स्वीकार कर्टी, पापी मन घुमाक परमेश्वरकठे आइपर्ना ओ परमेश्वरक कहल अनुसार चल्ना चाहना कर्लक

प्रमाणक रूपम बप्तिस्मा लिह पर्ना बात यूहन्ना बट्टवैल (मर्कूस १:४)।

येशू आपन चेलन उहाँकम विश्वास कर्ना मनैन बप्तिस्मा दिह पर्ना आज्ञा देल (मत्ती २८:१८-२०)। शुरुक मण्डलीम येशूक चेलावै येशू ख्रीष्टकम विश्वास करल मनैन बप्तिस्मा देलक बात इतिहासम बा (प्रेरित २:३८, ४१; ८:१२-१३, ३६-३८; १०:४६-४८)।

येशूक समयठेसे चलल् ख्रीष्टीयन बप्तिस्मा संस्कार मण्डलीम आम्हीसम चल्ती बा। येशूह मुक्ति देहुइया व्यक्ति कैक करल विश्वासह सार्वजनिक रूपले घोषणा करक लाग, ख्रीष्टीयनहुँक्र बप्तिस्मा लेठा।

धेर जसिन, बप्तिस्मा लिहबेर ख्रीष्टीयनहुँक्र पानीम बुर्ठ। पानीम बुर्ना कलक आपन पापी स्वभावक लेखि मुना संकेत हो, ओ पानीमसे उठ्ना कलक लौव आत्मिक जीवन पैना संकेत हो (रोमी ६:३-४)। पापी स्वभावक लेखि मुना कलक आब पाप हमार मलिक्वा निहो कहल हो, याकर मतलब हम्र कबु फे पाप निकर्टी कहल निहो। याकर मतलब त हम्र पाप कर लगैना हमार पापी स्वभावक कब्जम निहुइटी कहल हो। आब हम्र परमेश्वरक इच्छा अनुसारक जीवन जीएक लाग स्वतन्त्र बाटी।

### बिसैना दिन (शबाथ दिन)

यहूदीहुँक शनिच्चरक दिन कुछ काम नैकरँट्, तर परमेश्वरक आराधना करँट्। उहओर्से, यहूदी धर्मअनुसार, शनिच्चरक दिनह “बिसैना दिन” कहँट्। परमेश्वर यहूदीहुँकन यी आज्ञा देरखलह : बिसैना दिन पवित्र मनहो, छ दिनसम परिश्रम कैक आपन सक्कु काम करहो, तर सातवाँ दिन दुह कुछ काम जिन करहो (प्रस्थान २०:८-१०)।

यहूदीन्हक चलन अनुसार, बिसैना दिन शुक्क क सन्द्या दिन बुरलठेसे (लगभग छ बजेसे) शनिच्चरक सन्द्या दिन बुरट्सम (लगभग छ बजेसम) रहन। येशूक समयम, अस्त चलन रलहन, ओ आम्हीसम फे उ चलन पलबाटन।

### ब्रत रना (उपवास बस्नु)

बाइबलक समयम मनै व्यक्तिगत रूपम या सामूहिक रूपम ब्रत रहँट्। सामान्य रूपम ब्रत रना कलक पानी/ तरल पदार्थ बाहेक कुछ निश्चित समयसम (प्रायः एक दिन) खाना नैखैना बात बुझजाए। हुँक ब्रत रहल समयम परमेश्वरक भजन गैना, प्रशंसा कर्ना, वचन पहर्ना ओ परमेश्वरसे प्रार्थना कर्ना करँट्। हुँक ब्रत रहक आपन-आपन करल पाप कामक कारण दुखि हुइलक महसुस करँट् ओ आबठेसे पाप काम नैकर्ना कैक आपन मनम

निश्चयता करँट्। असिक अपन्हेह नम्र बनैना एकठो तरीका फे रह यी। मनै खासकैक परमेश्वरक आत्मक अगुवाई ओ सहायता पाइक लाग ब्रत रहँट्।

फरिसीहुँक ब्रत रहँट् (लूका १८:१२), हन्ना ब्रत रहक परमेश्वरसे पुकारा फे करँट् (लूका २:३७), येशू चालीस दिन चालीस रात ब्रत रल (मत्ती ४:२; मर्कूस १:१२-१३; लूका ४:१-२), मण्डलीक सदस्यहुँक ब्रत रल (प्रेरित १३:१-३), पावल फे ब्रत रल (२ कोरिन्थी ६:५; ११:२७)।

### मण्डली

मण्डली कलक ख्रीष्टीयनहुँकन्हक भेला हो। उ भेलम हुँक परमेश्वरक प्रशंसा ओ आराधना कर्ठ, संगती कर्ठ, एक औरजहन उत्साह देठ, ओ परमेश्वरक वचन सुन्ठ आदी (प्रेरित २:४२-४७)। असिक हुँक विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्र बुझपर्ना महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

### मन्दिर

येशूक जमानम, एकठो मन्दिर रह, ओ उ फे यरूशलेमम अवस्थित् रह

(मर्कुस ११:११)। मनै मन्दिरम बलि चह्नाइँट, परमेश्वरक आराधना करॅट, ओ परमेश्वरसे प्रार्थना करॅट। युदीहुँक उ मन्दिरह परमेश्वरक घर मानेंट। तर उहिम मूर्ति नैरह, काकरकि परमेश्वर मूर्तिपूजह गल्ती काम मन्थ।

उ मन्दिरम “पवित्र ठाउँ” ओ “महापवित्र ठाउँ” कना दुइठो क्वाठा रह। उ दुइठो क्वाठह अल्गैना लुगक एकठो बोक्लार बरानक पर्दा रह। महापवित्र ठाउँम एकठो खास बाक्स रह। उ बाक्सम परमेश्वरक दिहल दश आज्ञा रह। उ आज्ञा ओ परमेश्वरक और नियम यहूदी धर्मम धेर महत्वपूर्ण रह। प्रधान पुजेहवा केल महापवित्र ठाउँम वर्षक एकचो जाइ पाइँट। उ परमेश्वरक मनैन्हक प्रतिनिधित्व करॅट, ओ परमेश्वरसे क्षमा पाइक लाग हुँकन्हक नाउँ पार्क बलि चह्नाइहैंट। येशु क्रूसम मुक सबजन्हक पापक म्वाल तिर्ल, ओ फेदोस्त बलि चह्नाइपर्ना आवश्यकता नैरहल्। मन्दिरक पर्दा फटाइ जुन परमेश्वर ओ मनैन्हक बीच मिलाप हुइल कना संकेत देठा॥।

उ मन्दिर पत्थ्रले बनल बरानक दरवार रह (मर्कुस १३:१-२)। धेर अडग्नले घ्यारलरह। पवित्र ठाउँसे ज्वारल एकठो अडग्नह “पुजेहोन्हक अडग्ना” कहैंट। यहूदी पुरुषहुँक केल उ अडग्नम जाइ पाइँट। पुजेहोन्हक

अडग्नसे ज्वारल और अडग्ना रह, ओहीह “जन्यौन्हक अडग्ना” कहैंट।

सबसे बाहार रहल अडग्नह “अयहूदीन्हक अडग्ना” कहैंट। उ अडग्ना छान्ही बनाइल बरण्डाअसक पर्खालिले गिन्यौरसे घ्यारल रह। बरण्डाअसक उह पर्खालिक छैहेँम धर्मगुरुहुँक मनैन सिखाइँट, व्यापारीहुँक व्यापार करॅट, बेरम्हेन या गरीब मनै भीख मागैंट। कबुकाल “मन्दिर” कलक एक्कठो मुख्य दरवार केल नैहोक बरण्डाअसक पर्खालिले घ्यारल पूरा मन्दिर क्षेत्रह जनाए (मर्कुस ११:१५-१६; १२:३५)

### महासभा

यहूदी समाजक मामलम, मुख्य शासन कर्ना सभा या सम्मेलनह “महासभा” कैजाए। उ सभम प्रधान पुजेहवा अध्यक्ष रहैंट, ओ सदुकी ओ फरिसी समूहक धर्मगुरुहुँक, पुजेहोन, ओ अगुवनमध्येमसे सहत्तर जन सदस्यन रहैंट। रोमी सरकारक समयम, महासभा यहूदीन्हक सामाजिक ओ धार्मिक बातम पूरा अधिकार चलाए। तर उ महासभा रोमी सरकारक विरोधम कुछु कर नैस्याक। किहुह मृत्युदण्ड देना अधिकार उ सभम नैरह, तर हुँक येशुह क्रूसम टङ्गाक मुवैही पर्ना अवस्था रोमी अधिकारीहुँकन्हक सामुन्ने

अनादेल (मत्ती २६:३-५, १४-१६, ४७-६७; २७:११-२६; १४:४३-६५; १५:१-१५)।

### मुक्ति

मुक्ति कलक खतरामसे बँचाजैना ओ सुरक्षित ठाउँम स्वतन्त्र रूपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना (यूहन्ना ३:१६; रोमी ६:२३), ओ लौव जीवन पैना हो। हम्र पापक बन्धन ओ परमेश्वरक दण्डसे छुटकारा पाइल मनै यी लौव जीवन जीए सेक्ठी (रोमी ६:१-१३; ८:१, ३२-३४; कलस्सी १:२२), ओ परमेश्वरक चाहल अनुसार यी जीवन जीएक लाग शक्ति पैठी (रोमी ८; एफिसी ५:१८; कलस्सी १:९-१२)। बाइबलक हिसाबले मनैन पापमसे बँचाइ सेक्ना व्यक्ति येशु ख्रीष्टकम विश्वास कैक केल मुक्ति पाजैठा (प्रेरित ४:१२; १ तिमोथी २:५)।

### मुक्ति-दिवस कना टिहार (निस्तार-चाड)

मुक्ति-दिवस कना टिहार यहूदीन्हक मनैना एकठो बरा टिहार हो, जौन समयम हुँक्र मिश्रदेशक बन्धनमसे छुटकारा पाइल बातक सम्झना करँट (प्रस्थान ३-१२; मर्कूस १४:१)। इस्ताएलीहुँक्र (या यहूदीहुँक्र)

मिश्रदेशम कमारा-कमारी होक चार सय तीस वर्षसम बन्धनम परलरलह। पाछ मोशक समयम, परमेश्वर हुँकन उ देशक निरङ्कुश राजक कब्जमसे छुटकारा देलहन। मुक्ति पाइक लाग, कसिक तयार हुँझना कना बारेम परमेश्वर हुँकन कैरखलहन। उहाँ मिश्रदेशक सबजन्हक बर्का छावन मुवाइक लाग रलह, काकरकि ओसिक मुवैलससे केल उ निरङ्कुश राजा हुँकन स्वतन्त्र रूपम जाइ देहुइया रलहन। परमेश्वर इस्ताएलीहुँकन हुँकन्हक आपन-आपन घरक इवारीक चौकसम बलि चहाइल भैरीक पठ्ठरुक रगत लगाए कलन। याकर मतलब इवारीक चौकसम रगत लगाइल घरम परमेश्वरक मनै (या इस्ताएलीहुँक्र) बाट कना हवाए। मिश्रदेशक मनै आपन-आपन घरक इवारीक चौकसम रगत नैलगैलरलह।

रात्क परमेश्वरक पठाइल स्वर्गदूत अउइया रलह, ओ मिश्रदेशक सबजन्हक बर्का छावन मुवैया रलह। हुँक्र इवारीक चौकसम रगत लागल घर पुगँट त, उ घर छोरदिहँट। हुँक्र इवारीक चौकसम रगत नैलागल घर पुगँट त, उ घरक ज्याठ छावन मुवाइँट। उह रात परमेश्वरक योजना अनुसार काम पूरा हुइल् त, अन्तम उ निरङ्कुश राजा इस्ताएलीन जाइदेलन (प्रस्थान १२)। असिक मुक्ति-दिवस

कना टिहारक शुरु हुइल् ओ यी टिहार हेरेक साल मनाजाए। जौन देशम रलसेफे, यी टिहार, एक्कसँग मनाइक लाग, यहूदीहुँक्र यरूशलेमम जम्मा हुइँद।

मुक्ति-दिवसक खाना टिहारक पैल्ह दिन सन्ध्याक खाजाए। खानम बलि चह्वाइल भैरीक पठरुक शिकार फेरह (मर्कूस १४:१२)। मुक्ति पैलक दिनम, भैरीक पठरुक रगत ड्वारीक चौकसम लगाइल घरम परमेश्वरक दण्ड नैपरला।

यी बात क्रूसम मुवावापाइल येशू ख्रीष्टक रगतह संकेत कर्ठा। येशूक बलि हमन परमेश्वरक दण्डसे बँचैठा (हिन्दू १०)। इस्त्राएलीहुँक्र मिश्रदेशक बन्धनमसे छुट्कारा पाइलअस, येशूकम विश्वास कर्लसे हम्र पापक बन्धनमसे छुट्कारा पाइसेकठी (रोमी ६)। येशू ख्रीष्ट बलि स्वरूप मुसेक्लकओर्से, आब हम्र मुक्ति-दिवस कना टिहार मनाइपर्ना आवश्यक नैहो (हिन्दू १०:११-१८)।

ख्रीष्टीयनहुँक्र येशू ख्रीष्ट बलि हुइलक ओ पापमसे मुक्ति पैलक सम्झना स्वरूप प्रभु-भ्वाज मनैठा। थप जानकारीक लाग “प्रभु-भ्वाज” शब्दक अर्थ हेरी।

### मुवलमसे फेदोस्र जीना (पुनरुत्थान)

येशू क्रूसम मुल त, मनै उहाँक शरीरह एकठो बरानक पत्थ्रा खोल्क बनाइल गन्यम ढर्ल (मर्कूस १५:४३-४६)। पाल्ह, येशू फेदोस्र जीगैल। यी चाहिँ और जुनी लेक अझना काम नैहो (अर्थात् च्वालाला फेर्ना काम फे नैहो), भेष बदल्ना काम फे नैहो। तर मुनासे आघ येशूक उमेर, रूप, रङ्ग जसिन रलहन, मुवलमसे फेदोस्र जील त, उह उमेरम, उह रूप, रङ्गम उह येशू जीटी बाट कना बात हो।

संसारक पूरा इतिहासम सबसे महत्वपूर्ण घटना येशू ख्रीष्ट मुवलमसे फेदोस्र जीयल घटना हो (मर्कूस १६:१-८)। इतिहासक अन्यम सब मनै मुवलमसे फेदोस्र जीजउइयाबाट - येशूकम विश्वास कर्ना मनै सबजन स्वर्ग जउइयाबाट, विश्वास निकरुइयन भर नरकम जउइयाबाट। स्वर्ग जउइयन्हक शरीरम, भूतपञ्चात लाग नैसेकट, चागबिचाग नैलागट, पाप नैरहट, ओ कुड फे मुवाइ नैस्याकट (१ कोरिन्थी १५:५१-५७)।

### मोशा

मोशा इस्त्राएलीन्हक सबसे बरा अगुवा रलहा। उ येशू ख्रीष्टसे १५०० वर्ष आघ जर्मलहा। मोशा, परमेश्वरक सहायताले, इस्त्राएलीन मिश्रदेशक बन्धनमसे छुटैल। “इस्त्राएलीन दिहस,”

कैक परमेश्वर मोशह व्यवस्था देल। उ व्यवस्थम दश आज्ञा के रह (प्रस्थान २०-३१)। परमेश्वरसे पाइल उ व्यवस्था मोशा मनैनसे बटोइल ओ पाछ्छ लिख्क इस्ताएलीन देल। मोशक लिख्ल उ व्यवस्था बाइबलक पैल्ह पाँचठो किताबम बा। उहओर्से उ व्यवस्थह कबुकाल मोशक व्यवस्था के कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)। हेरी “व्यवस्था”।

### यरुशलेम

इतिहास ओ संस्कृतिक धनी मानजैना यरुशलेम धेर पुरान एकठो ऐतिहासिक शहर हो। येशूक समयम यी शहर यहूदीया क्षेत्रम रह। यहूदीन्हक हिसाबले, यी सबसे महत्वपूर्ण शहर रह काजेकलसे यहूदी धर्मक केन्द्र मानजैना परमेश्वरक मन्दिर यिह शहरम अवस्थित रह। सालो मुक्ति-दिवस मनाइक लाग यहूदीहुँकन, सक्यासम, यरुशलेमम जाइपरन। वर्तमान समयम, यी शहरह जेरुशलेम कठ, ओ यी इजराएल देशम पठा।

### यहूदी (हिब्रू /इस्ताएली)

यहूदी, हिब्रू, या इस्ताएली एक जतिक मनैन जनैना नाँह हो। पुरान नियमम सबसे पैल्ह हिब्रू अब्राहाम रलह (उत्पत्ती १४:१३), ओ हुँकाहार

सन्तान फे हिब्रू हुइल। हुँकन्हक बोल्ना भाषह फे हिब्रू कैजाए ओ येशूक समयम फे हुँक उह भाषा ब्वालैट् (यूहन्ना १९:२१; प्रेरित २२:२)। आम्हीसम उ भाषा बोलजैठा।

अब्राहामक नद्या याकूब रलह (उत्पत्ती २५:१९-२४)। याकूबक नाँह पाछ्छ जाक इस्ताएल हुइलन (उत्पत्ती ३२:२९)। इस्ताएलक बार भाइ छावन रलहन (उत्पत्ती ३५:२२-२६)। उह बार भाइ छावन्हक सन्तान बार जाति हुइल, ओ हुँक एकमुष्ठ रुपम इस्ताएली कैक चिन्हगैल। पाछ्छ जाक हुँक यहूदी कैक फे चिन्हगैल।

वास्तवम “यहूदी” शब्द यहूदामसे आइल हो। याकूबक बार भाइ छावनमध्येम एकठो छावक नाँह यहूदा रलहन। यहूदक बसोबास करल क्षेत्रक नाँह फे यहूदा हुइल। तर उ ठाँ बार कुल रहल देशक एक भाग केल रह। पाछ्छ हुँक उत्तरी राज्य ओ दक्षिणी राज्य कैक दुई भाग हुइल (हेरी १ राजा १२ अध्यायसे पाछ्छओर)। उत्तरी राज्यह इस्ताएल कैगिल्, दक्षिणी राज्यह यहूदा कैगिल्।

पाछ्छ जाक अश्शूर देश उत्तरी राज्यह हमला कैक लैगिलन। तबदोस्र उ उत्तरी राज्यक सब इस्ताएलीहुँकन अश्शूर देशम लैगिल, ओ आपन मनैन उत्तरी राज्यम बसोबास कर लगैल। उ ब्याला दक्षिणी राज्य केल बाँचल, ओ

यहुदा देशक मनैन ‘यहूदी’ कहलगलन। यहुदा राज्यह, धेर पाछ, ग्रीकहुँकन्हक ओ रोमीहुँकन्हक समयम, यहूदीया कैगिल। हुँकन्हक धर्मह यहूदी धर्म कहँट। उ व्याला “इस्त्राएलक सन्तानन्” एकमुष्ठ बुद्धाइक लाग, कबुकाल “इस्त्राएली” कहँट् ओ कबुकाल “यहूदी” कहँट। आजकाल फे इजराएल देशम ओ संसारक धेर मुलुकम यहूदीहुँक पलबाट। हुँक आम्हीसम के पुरान नियमक धेर बात ओ हुँकन्हक आपन परम्परा मन्तीरठ।

### येशू ख्रीष्ट

हुइना त येशूक अस्तित्व सड्डभर पलबाटन, तर फे उहाँ लगभग २००० वर्ष आघ इस्त्राएल देशम मनैया होक जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइट। उहाँ एकठो मनैया केल नैरलह, तर परमेश्वर के रलह। उहओर्से उहाँकम परमेश्वरक गुण रलहन। उहाँ मनैया होक जर्मल त, उहाँकम रहल परमेश्वरक गुण नैहेरैलन (यूहन्ना १:१-२; कलस्सी १:१५-२०; हिन्दू १)। असिक उहाँ परमेश्वर त पलरलह ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहन। उहाँ धेर प्यारा पापम फँस्ना अवस्थम पर्ल,

तर पापम कबु फे नैफँस्ल (हिन्दू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे मुक्ति दिहक लाग, परमेश्वरक योजना अनुसार उहाँ कूसम मुल। उहाँक मुवल शरीरह मनै एकठो गन्यम ढर्ल। वाकर तीसर दिन, उहाँ मुवलमसे फेदोस्त जीगैल (मर्कूस १५-१६)। फेदोस्त जीलक चालीसवाँ दिनम, धेर मनै देखैटी-देखैटी, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाऊजर बैठल बाट (हिन्दू १:३; १०:१२)।

येशू एक दिन आपन राज्य स्थापना कर फेदोस्त अउइयाबाट। तबदोस्त येशू ख्रीष्टकम विश्वास करल मनै स्वर्गम सड्डभर परमेश्वरकसँग रहपैर्हीं, तर उहाँकम विश्वास नैकरल मनै नरकम जैर्हीं (मत्ती २४-२५)।

### रङ्गशाला

रङ्गशाला कलक सभा, खेलकुद, नाटक, नाचगान तथा सांस्कृतिक कार्यक्रम जीवन्त प्रदर्शन कैक रङ्ग कर्ना हजाराँ मनैन्हक क्षमता रहल भव्य भौतिक संरचना अर्थात् रङ्गमञ्च हो। प्राचीन समयम

रङ्गशाला बनाइक लाग खासकैक दुइठो पर्वत्वक बीचक ठाउँह रोजजाए। कार्यक्रम पदर्थन कर्ना ठाउँ सबसे टर रह ओ वाकर गिन्यौर मनै बैठक लाग भन्याडअस ठाउँ बनाइल रह। बैठना ठाउँ जत्र उप्पर ओत्रह फैलहर रह। उ समयम ग्रीस, एफिसस ओ रोमम रहल रङ्गशाला धेर प्रचलित रह। एफिसस शहरम डेमेत्रियस ओ आर्तेमिस देवीक छुट्टिछुटि मन्दिर बनैना कामम लागल मनै पावलक विरोधम हूलदड्गा मच्चैल त पाछ, मनै एकजुट होक पावलक संघरेन माकेडोनियासे आइल गायस ओ अरिस्तार्खसह पकर्ल ओ रङ्गशालम धँस्यैटी लैगिल (प्रेरित १९:२३-२९)।

### रोटी खैना टिहार (अखमिरी रोटीको चाड)

रोटी खैना टिहार परमेश्वरक स्थापना करल और टिहार हो (प्रस्थान १२:१७)। यी टिहार फे इस्त्राएलीहुँक्र मिश्रदेशक बन्धनमसे छुट्कारा पैलक सम्झनम मनाइँद॒। इस्त्राएलीहुँक्र धेर जसिन पाउरोटी खाइँद॒। उ पाउरोटीम खमीर कना एक मेहिक चिज मिलाइलरह। उह खमीर रोटी फुलाए।

मिश्रदेशसे छुट्कारा पैलक रात, हुँक्र हतार-हतार जाइपर्ना हुइलकओर्से, परमेश्वर हुँकन रोटीम खमीर जिन मिलाओ कलन। (पिठम खमीर

नैमिलैलसे पाउरोटी नैबनट, रोटी केल बन्था।) यी टिहारक समयम इस्त्राएलीहुँक्र परमेश्वर हुँकन मिश्रदेशक बन्धनमसे छुट्कारा दिहल सम्झनम खमीर नैमिलाइल रोटी खाइँद॒।

वास्तवम, मुक्ति-दिवस ओ रोटी खैना टिहार सम्बन्धित बा तर फे उ अल्ला-अल्ला टिहार हो (लेवी २३:५-६)। मुक्ति-दिवसक द्वासर दिनसे सात दिनसम रोटी खैना टिहार रह। तर यी दुन टिहार सँगसँग मनाजैना हुइलकओर्से, यी एककठो टिहारअस फे रह (मर्कूस १४:१)। उहओर्से यी टिहारक लाग दुन नाउँ अदल-बदल चलाजाए। याकर मतलब मुक्ति-दिवस कलसे फे, उह टिहार, ओ रोटी खैना टिहार कलसे फे, उह टिहारह जनाए (प्रस्थान १२:१४-१८)। थप जानकारीक लाग “खमीर” शब्दक अर्थ हेरी।

### लङ्गर

चल्तीरहल लाऊ या पानीजहाजह पानीक माझम च्वाक परल कलसे ढाँरी या साङ्गलाले बाहान्गैल् पानीम टरसम खसाजैना फलामक साधन हो। खासकैक लाऊ या पानीजहाजह कौनो ठाउँम च्वाक परल कलसे पानीम लङ्गर खसाजैठा, ओ आघ लैजाइपरल कलसे खसाइल लङ्गर पानीमसे तानजैठा।

रोमम जाइबेर पावलक चिउह्ल जहाज चट्टानम ठोक्क्याजाई कि कना डरले हुँक्र जहाजह अड्काइक लाग पाद्धओरिक चारठो लड्गर खसादेल (प्रेरित २७:२९)। हुँक्र 'मुन्दर बन्दरगाह' कना ठाउँम जहाज रोकरखलह। हिउँद बिताइक लाग सुरक्षित ठाउँ नैरलकओर्से जहाजक धेर जन जसिक हुइलसे के फोनिक्स शहर नैपुगक नैहुई कह लग्ला। उहओर्से हुँक्र फोनिक्स जाइक लाग जहाजह अड्काइल लड्गर झिक्ल (प्रेरित २७:१२-१३)।

## विश्वास

सामान्य रूपम विश्वास कर्ना कलक केक्रोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्म परमेश्वरह ओ हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख नैसेक्टी। तर हम्म बाइबलम परमेश्वरक कहल बात विश्वास कर्ठी, जसिन कि, उहाँ हमन प्रेम कर्ठ (१ यूहन्ना ४:८-१०), उहाँ हमार वास्ता कर्ठ (१ पत्रुस ५:७) ओ आत्मिक जीवन जीएक लाग, आवश्यक पर्ना सब चिज उहाँ हमन

देरख्ल (२ पत्रुस १:३-४)। हुइना त, रुख्वाबरेख्वा या चिरैचुरुङ्गन या हमार आसपासम रहल भौतिक वस्तु द्याखअस असिन बात हम्म आँखिले निदेख्टी, तर के हम्म असिन बात सत्य हो कैक विश्वास कर्ठी ओ उह अनुसार जीठी।

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुग्ठी। उ सङ्गवा बल्या बा कैक विचार कर्ठी, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्म विश्वास निकर्ठी। तर, यदि उ सङ्गवमसे उपार जैठी कलसे, उ सङ्गवम भर पर्ली कना बात थाहाँ हुइठा। यी बात सङ्गवम विश्वास करल बात हो।

ओसहेँक, परमेश्वर परम उपकारी बाट (भजनसंग्रह १४५:८-९; मर्कुस १०:१८), उहाँ हमन मुक्ति देठ (एफिसी २:८-९), ओ उहाँ हर समयम हमार भलो हुइना काम कर्तीबाट कना बात हम्म विश्वास करपर्ठा (रोमी ८:२८)।

## वेदी

वेदी कलक माटी या पत्थ्रले बनाइल् बलिदान चहैना ठाउँ रह (प्रस्थान २०:२२-२६)। बाइबलम खासकैक नोअक समयसे यिहोर विभिन्न व्यक्तिहुँक्र वेदी बनाक बलिदान चहाइल घट्ना उल्लेख हुइल्

बा (उत्पत्ति ८:२०; १२:७; १३:१८;  
२२:९; २६:२५; ३३:२०; ३५:३;  
प्रस्थान १७:१५)।

### व्यवस्था

साधारण हिसाबले थारु समाजम व्यवस्था कलक राजनीतिक व्यवस्था बुझैठा। तर पुरान नियमम, व्यवस्था कलक जीवनक सकु पक्षह समेट्ठाः मजा ओ नैमजा व्यवहार, धार्मिक क्रियाकलाप, ओ सामाजिक जीवन (राजनीति समेत)। इस्राएलीन्हक शासक परमेश्वर हुइलकओर्से, व्यवस्था कलक परमेश्वरक इच्छा, आज्ञा, ओ नियम हो। व्यवस्था भड्ग कर्ना कलक परमेश्वरक आज्ञा नैमन्ना हो, या नियम उल्लङ्घन कर्ना हो, या पाप कर्ना हो। उहओर्से इस्राएलीहुँक्र सब काम व्यवस्था अनुसार करँट। सब काम कलक पारिवारिक ओ सामाजिक क्रियाकलाप (जस्त: भ्वाजकाज, मर्नीकर्नी, स्वास्थ्य ओ सरसफाइ), धार्मिक क्रियाकलाप (जस्त: परमेश्वरक आराधना, ओ टैटिहार) आदि पर्ठा।

शुरुम, परमेश्वर मोशह दश मुख्य आज्ञा देलह (प्रस्थान २०:१-१७)। पाद्ध, यी आज्ञह मोशा विस्तारित रूपम बाइबलक पैल्ह पाँचठो किताबम लिख्ल (उत्पत्ती, प्रस्थान, लेवी, गन्ती, ओ व्यवस्था)। बाइबल पुरान

नियम ओ लौव नियम कैक दुई भागम लिख्ल बा। पुरान नियमम, यी पाँचठो किताब समेत, जम्माजम्मी उनन्चालीसठो किताब बा। पुरान नियमक और किताब परमेश्वरक वचन बोलुह्यन, राजाहुँक्र, ओ और मनै लिख्लह। यी सकु मनै यहूदी रलह। कबुकाल पूरा पुरान नियमह व्यवस्था कैजिठा (यूहन्ना १०:३४; १२:३४; १५:२५)। कबुकाल जुन पुरान नियमक पैल्ह पाँचठो किताबह केल व्यवस्था कैजिठा (लूका २४:४४)।

परमेश्वर “इस्राएलीहुँकन दिहस” कैक मोशह दश आज्ञा ओ बाइबलक पैल्ह पाँचठो किताबम रहल और व्यवस्था दिहलओर्से, मोशक लिख्ल यी पाँचठो किताबह कबुकाल मोशक व्यवस्था के कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)।

ख्रिष्टीयनहुँक्र बुझपर्ना महत्वपूर्ण बात का हो कलसे पुरान नियमक धेर जसिन व्यवस्था, जसिन खाना ओ स्वास्थ्यसे सम्बन्धित व्यवस्था ओ निश्चित धार्मिक व्यवस्था, हमार लाग येशूक आनल मुक्तिक कारणले प्रभावकारी निहो (गलाती ३:२३-२९; हिन्दू ९:१-१०:१८)। तर येशू व्यवस्था भड्ग कर अइलक निहुइट, उहाँ त व्यवस्था पूरा कर अइलक हुइट (मत्ती ५:१७-२०)।

## शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ के आत्मा रलकओर्से, ओही द्याख नैसेकजाइट्। वाकर मुख्य काम कलक परमेश्वरक विरोध कर्ना हुइस, तर शैतान मनपर्दी कुछु फे कर नैपाइट्(अय्यूब १)। शैतान परमेश्वरक विरोध केल नैकरट, तर मनैन दुःख देना काम के कर्ठा। उ मनैन्हकम पापी मन जगादेठा, उहओर्से मनै औरजहन ठग्ना, ढँठना, लुट्ना, ओ मुवैना काम कर्ठ। असिक मनै पापम फँस्ठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट् (२ कोरिन्थी ४:४)। उ परमेश्वरक करल सृष्टि ओ योजना भताभुड्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।

हम्र परमेश्वरक शक्तिले केल शैतानह हराइसेकठी। यदि हम्र शैतानक विरोध कर्बी कलसे, उ हमारठेसे भग्नेबा (याकूब ४:७)। क्रूसम टड्गागिल येशू शैतानह हरारख्ल (हिन्दू २:१४-१५)। उह के संसारम वाकर शक्ति आम्हीसम पलबाटस। तर अन्तम, शैतानह सह निसेकजैना दुःख भ्वाग परहिँस, काकरकि उ

आगीक भट्ठीम फाँकजैनेबा (प्रकाश २०:७-१०)।

## संसार

सामान्य हिसाबले संसार कलक मनै देख्ना, छुना, ओ अनुभव कर्ना सारा भौतिक जगत हो। बाइबलम, खासकैक यूहन्नक लिखल किताबम, “संसार” शब्द धेर ठाउँम प्रयोग हुइल् बा ओ अवस्था अनुसार याकर अर्थ फरक-फरक बा।

१. भौतिक संसार (प्रेरित १७:२४)

– परमेश्वरक सृष्टि करल संसार।

२. पृथ्वी (१ यूहन्ना ४:९) –

परमेश्वर आपन छावह पठाइल् ठाउँ, संसार।

३. मानव संसार (यूहन्ना ३:१६)

– परमेश्वरक प्रेम करल करल मनैन्हक संसार।

४. मानव जीवनशैली (१ यूहन्ना

३:१७) – मनैन्हक दुखसुख, धनसम्पत्ति, खुसी, आनन्द, इच्छा, चाहना रहल संसार।

५. दुष्ट संसार (१ यूहन्ना ४:१९)

– परमेश्वरक ओ उहाँक मनैन्हक विरोध कर्ना संसार, झुटा शिक्षा सिखैना संसार।

पैल् चारठो बुँदा अनुसार “संसार” शब्दक नकारात्मक अर्थ नैहो। तर पाँचवाँ बुँदा अनुसार “संसार” कलसे नकारात्मक अर्थ के लगठा, काकरकि

यी बुँदा मनैन्हक पापी मन, स्वार्थी इच्छा, खराब चाहना, लालच, घमण्ड आदि विषयसे सम्बन्धित बा, जौन विषयम परमेश्वरह कुछ मतलब नैकैजाइट्। ओसिन विशेषता रहल मनैन संसारक मनै कैजिठा, जे परेमश्वरकम विश्वास नैकर्ट। संसारक मनै स्वभावले परमेश्वरह नैचिह्न्ट, ओ भौतिक जीवनसे सम्बन्धित सिद्धान्त ओ उद्देश्यम रहक केल जीवन जीठ। दुष्ट चाहना ओ घमण्डले भरल घिनलग्निक यी संसारह पवित्र परमेश्वर दयाख नैसेक्ट। ख्रीष्टीयनहुँक यी संसारम रलसे फे, संसारक मनैन्हक हिसाबले नैजीएपरट्, अर्थात् आपनम संसारक पापक दाग लाग नैदेहपरट् तर परमेश्वरक चाहना अनुसार पवित्र जीवन जीएपर्ठा।

### सदुकी

सदुकीहुँक धर्मक हिसाबले यहूदी रलह, तर हुँक राजनीतिम के हाँठ डाररख्लह (प्रेरित ५:१७-४२)। असिक हुँक धेर जसिन धार्मिक मामिलम ध्यान देना फरिसीहुँकनसे फरक रलह। जनसंख्यक हिसाबले सदुकीहुँक फरिसीनसे कम रलसे फे, हुँक धनी-धनी रलह ओ समाजम हुँकन्हक प्रभाव धेर रलहन काकरकि

धेरजसिन बराबरा पदम हुँकन्हक बाहुल्यता रलहन। सदुकीहुँक मोशक व्यवस्था बाहेक और यहूदी परम्परा नैमानेंट्, तर समाजम अधिकार जमैना हुँकन्हक उद्देश्य रलहन। मनै मुलसे फे, हुँकन्हक हंसा नैमुटिन ओ मुवल मनै फेदोस्त जीजैठ कैक सदुकीहुँक विश्वास नैकरंट् (मर्कूस १२:१८; प्रेरित २३:६-८)। अत्र केल नैहोक, हुँक जीन्दगीक सक्कु घटना परमेश्वरक अधिनम रठा ओ स्वर्गक खबर पुगुइयन जाट्टीसे रठ कैक फे विश्वास नैकरंट्।

फरिसीन्हकअस सदुकीहुँक फे धर्मक बातम येशूह फँसाइक लग क्यौचो कोसिस कर्ल (हेरी “फरिसी”)।

### सभाघर

सभाघर कलक साइया घर रह। उह घरम सर्वसाधारण मनै ओ अगुवन एक-आपसम भेटघाट करंट्, ओ उहै यहूदी धर्मक शिक्षा सिखाजाए (मर्कूस १:२१)। उ घर परमेश्वरक आराधना कर्ना ओ परमेश्वरसे प्रार्थना कर्ना ठाँ रह। परमेश्वरक वचन सिखैना घरह धर्मगुरुहुँक सञ्चालन करंट्। हुँक सामाजिक झेज्जग्रा उहै मिलाइंट् ओ दोषी ठह्ल मनैन दण्ड फे उहै दिहैंट्।

### स्वर्ग

स्वर्ग परमेश्वरक घर हो। स्वर्गक खबर पुगुइयन उहै परमेश्वरक

आराधना कर्टिरठ। येशूकम विश्वास करुइयन मुलसे, स्वर्गम सड्डभर परमेश्वरकसँग रहुइयाबाट। मुक्ति पैना कलक स्वर्ग जैना हो (२ कोरिन्थी ४:१६-१८; १ पत्रुस १:४)। स्वर्ग कलक दुःखकष्ट, रोगवेराम, झग्राझाँटी, या चिन्ताफिक्री नैहुइना ठाउँ हो, तर खुशी, आनन्द, सुखचैन, रमाहटम रहपैना ठाउँ हो (२ तिमोथी ४:१८; १ पत्रुस ५:१०; प्रकाश २१:१-४)।

### स्वर्गक राज्य (स्वर्गको राज्य) हेरी “परमेश्वरक राज्य”।

#### स्वर्गदूत

स्वर्गदूत परमेश्वरक सेवा करुइयन हुइट (हिन्दू १:७)। हुँक्र मनै नैहुइट, ओ हुँकन्हकम पाप नैरटिन। सामान्य रुपले हुँकन द्याख निसेक्जाइट, तर जब परमेश्वर हुँकन मनैन्हकठे खबर पुगाइ पठैठिन, तब हुँक्र मनैअस देखपर्ठ। कवुकाल मनैन्हकठे देखपरबेर, हुँक्र चहकार उज्जर झुल्ला घाललअस देखपर्ठ। हुँकन्हक मुह फे चहकार उज्जर देखपर्ठिन, ओ हुँकन देखक मनै डैरेठ (मत्ती २८:२-३; मर्क्स १६:५-८; लूका १:११-१३; २:९)।

जे होस्, स्वर्गक खबर पुगुइयन मनैअस नैहुइट, काकरकि हुँक्र भ्वाजविहा नैकर्ट, ओ लक्षिपर्का

नैजर्मेट (मर्क्स १२:२५)। हुँक्र परमेश्वरक सेवा ओ उहाँक खबर मनैन्हकठे पुगादेना काम केल नैकर्ट, तर परमेश्वरक आराधना फे कर्ठ (लूका २:१३-१४; हिन्दू १:६; प्रकाश ५:११-१२)।

#### हिन्दू


हेरी “यहूदी”।

#### हेरोद


हेरोद नाउँ रहल शासकहुँक्र धेर जन रलह। हुँक्रमध्ये मुख्य ‘हेरोद महान’ रलह। हुँकाहार कारणले और शासकहुँक्र फे हेरोद नाउँ पैल।

हेरोद महान ‘यहूदीन्हक राजा’ रलह ओ ऊ यहूदीया क्षेत्रम ३३ वर्षसम्म शासन कर्ल। यिह राजक समयम येशू ख्रीष्टक जन्म हुइलहन (मत्ती २:१)। ऊ भारी निर्दीयी राजा रलह। ऊ बेथलेहेमम बहुत लक्ष्न्हक हत्या कर लगैलह (मत्ती २:१-५, १३, १६-१८)।

ऊ महत्वपूर्ण भौतिक संरचना बनैना काम फे कर्ल। यरुशलेमम सैनिक किल्ला, सरकारी महल, आपन महल ओ यहूदीन्हक लाग एकठो भव्य मन्दिर बनैल (मत्ती २७:२७; मर्क्स १३:१; यूहन्ना २:२०; १९:१३; प्रेरित २३:१०, ३५)।



नेपालसे इथाएल कहूँ पर्था कैक देखाइल नक्सा



इस्लाएलक नक्सा